

ANTONII LE GRAND

2

DISSERTATIO

De

CARENTIA

Sensus & Cognitionis

IN

BRUTIS.

PSALM. XXXI.

Nolite fieri sicut equus & mulus, quibus non est intellectus.



NORIMBERGÆ,

Impensis, JOHANNIS ZIEGERI, Bibliop.

M DC, LXXIX.

10

11

12



HENRICO JENKESIO,
PHILOSOPHO
CHRISTIANO,


Amico suo plurimum colendo,
ANTONIUS LE GRAND
S. P. D.

Ornatissime Domine,


USI inter *Authores*
receptum est, patro-
nos, quibus lucubra-
tiones suas nuncu-
pant, Novitatis titulo, sibi conci-
liare, & nuperae proli, recen-
tem substituere parentem. Quippe
Vilia sunt nobis, quaecunque
prioribus annis
Vidimus, & sordet quicquid spe-
ctavimus olim.

Admirationem enim incutit Novitas, & eorum animos percellit, quos adoritur. Verum à via hac communi impræsentiarum declinare cogor, & tibi non nova, non peregrina offerre; sed quæ repetita conversatio, jamdudum familiaria reddidit. Effecit enim Humanitas Tua, ut mentis meæ partus apud Te liberè efferre audeam, & in eorum pluribus, quæ aut cogito, aut molior, Judicium Tuum consulere, priusquam cæterorum oculis exponam. Adeo ut, Opusculum hoc, quod nomini Tuo inscribo, nihil Tibi novi deferat, præter aliam characterum formam, quod à prælo mutuatum est. Haud ingratum tamen Tibi futurum esse auguror, quod vix

natum



natum tantoperè laudasti, & ut
in publicum prodiret, non annui-
sti modò, sed exhortatus es. Ea
enim est Ingenii Tui indoles, ut in
omnibus, quæ consulis, agisque,
commune Bonum semper spectes,
illaque maximè promoveas, quæ
ad generis humani emolumentum
conducere arbitraris. Hic fru-
ctus Philosophiæ Tuæ Christianæ,
Omnibus Bene velle, & quam-
plurimis prodesse. Et certe, quan-
tum Tibi hoc nomine devincta
sit Juventus Academica, novissi-
ma INSTITUTIONIS meæ
PHILOSOPHIÆ editio, Do-
mino Henrico St. John, Filio na-
tu maximo Domini Gualteri St.
John Baronetti inscripta, Testis
est & præco. Te enim Monitore



plurimum adaucta est, eamque
adepta est formam, quam nulla
Cogitationes meae secundae immu-
tabunt, ni per Te constiterit, id
commodum fore ac proficuum.
Opusculum igitur hoc qualescun-
que a quo animo accipe, illudque
intuere, non tanquam meritis
tuis par, sed veluti propensi erga
Te animi mei pignus, & eter-
num serae gratitudinis monumen-
tum. Deum obsecro, à quacun-
cta Bona procedunt, ut caepta
Tua secundet, & spiritu suo san-
ctissimo, quaecunque aggredieris,
regere dignetur. Vale.

Dabam Londini 25. Febr.
Aerae Christi 1675.

DIS

DISSERTATIO DE CARENTIA Sensus & Cognitionis IN BRUTIS.

A Deò invaluit inter Homines, de Bru-
torum Animantium Cognitione opi-
nio, tamque firmam in eorum men-
tibus fixit radicem; ut vix temerita-
tis notam effugiant, qui aliter cense-
re audent, & tam manifestæ causæ, ut ajunt, non
patrocinantur. In hac sententia, omnes penè
Philosophi conveniunt, & sive Bestiarum industria
illecti, sive sensuum, quibus pollent, vivacitate
perciti, sive etiam nonnulla Rationis simulachra
contemplari, intrepidè Scientiam illis assignant,
& perceptionum, quibus homines gaudent, red-
dunt participes. Imaginari enim nequeunt, quo-
modo belluæ tam mira patrent, tantamque in
agendo solertiam ostendant citra Rationis sub-
sidium. Quomodò *Apes*, exempli causa, absque
Cognitione, sexangulares suas cellulas tam Geo-
metricè ædificent, easque certis quibusdam tem-
poribus, melligine impleant. Quid! nullam earum
mores, consilia, selecti duces, missi ad ulter-
iora pabula speculatores, animadvertentiam in-
dicant? Atque ad hæc peragenda, cæco dum-
taxat Naturæ impetu feruntur? Verùm, quæ
Naturæ vis, qui corporum motus, tantum valet,
ut meræ *Machina* Regem sibi constituent, ejus

Quid nonnullos Philosophos moveat, ad credendum, cognitionem Brutis inesse.

imperio obsecundent, & tantum non venerabundæ, ei adsint, auxilientur, protegant? Quid, circa illum insciæ conglobantur; alis insidentem contegunt, nec patiuntur in examinis medio discerni? Unde illa Militum turba, in ejus custodiam deputata? Cur hi potius, quam alii, Satellitum munus agunt? Casu Lictores electi, qui assidua autoritate conservent, & fessum humeris nonnunquam sublevant? Si *Ratione* destituuntur, si eorum, quæ agunt, ignari sunt, aperite, unde vita functos cæteræ foribus efferant, & funerantium more, exequias comitentur. Insulsum mecastor est, *Rationis* vestigia, non *Rationi* accepta referre, & effectibus detectis, latentem causam non eruere.

2.

*Aranea-
rum in-
dustria
suspicio-
nem in-
genis Ra-
tionis,*

Non minora præbent *Araneæ*, solertiæ suæ indicia; dum telas suas texunt, & laxos in foribus suspendunt cañes. Nam *Muscis* insidiantes, quorsum in telæ centro potius, quam in extremis excubant? nisi quoniam æquales, quæ à medio feruntur, lineas esse norunt, & instar periti Aucupis se gerentes, trahi rete, eo in loco facilius sentiunt. Si aliorum quorundam *Animalium* indolem probè scrutemur, patebit non infirmiori donari *Ratiocinio*, eaque opera patrare, quæ ad humanam solertiam proxime accedunt. Referunt Historici, *Cervos* in Africa, dum siti premuntur, & aquæ deest copia, lapidibus in situlam dimissis, liquorem attollere, & supposito graviore pondere, sursum levius adducere; quod hauriant scilicet, & gutturis ariditatem, qua vexantur, depellant. Non minus pro-

providentiæ præ se ferunt *Cilices Anseres*, qui natura garruli, & concubia etiam nocte clangentes, ubi *Taurum* montem trajecturi sunt, *Aquilas* in eo degentes veriti, calculo os obstruunt, nerauco suo strepitu hostes transitus sui admo-
neant, & in suam perniciem prodantur. Quis non *Formicarum* industriam, & disciplinam miratur, quæ urbes tanto artificio condunt, ut varia loca reperiantur, tum comitiis celebrandis, tum in annum asservando penu, tum defunctorum corporibus sepeliendis. Urbem quadrangularem se spectasse testatur *Aldrovandus*, quatuor pedes latam, in qua per vias, velut ad negotia ultrò citròque cursitare, tanquam cives, ipsi *Formicæ* videbantur. Angulorum, & laterum directæ erat delineatio; urbis longitudinem mediâ secabat via, profunditate, latitudineque digitali, quam rursus per transversum, æqualibus inter se spatiis, tres aliæ viæ, eadem digitali profunditate, & latitudine, directissime intersectabant. In extremis viarum angulia, velut angiporibus, *æva* in acervos erant collecta. Altera urbis parte, antra *frumenta* repleta, ut in ipsas vias redundarent. Viæ omnes erant mundissimæ. In urbis denique longitudinis medio, unica porta *Zephyro* objecta.

Hæc, & similia, quæ de Animantibus decantantur, satis superque eorum cognitionem assertum eunt, coguntque etiam pervicaces fateri,

*Esse Apibus partem Divina mentis, & haustus
Æthereos.*

Virgil. IV. Georg.

A 5

Quare

3.
*Anima
 Bruto-
 rum, se-
 cundum
 quosdam
 veteres, à
 nostris
 non di-
 stinguun-
 tur.*

Quare his rationibus adducti veteres, credide-
 re incorporeas esse Brutorum Animas, & ab iis,
 quæ Homines constituunt, nullo modo dissentien-
 tes. Aut si aliquod inter eas discrimen inter-
 cederet, non ab essentia, sed à quibusdam acci-
 dentibus, esse sumendum, & ut nonnulli loquun-
 tur, non nisi quoad perfectionis gradus distin-
 gui. Hinc Galenus sub initium exhortat. ad Art.
 lib. stud. *An Animantia, quæ dicuntur Bruta, pror-*
sus expertia sint rationis, nondum satis liquet. For-
tas sis enim, tametsi non habeant eam Rationem, quæ
juxta vocem intelligitur, nobiscum communem,
quam vocant enunciativam; certe eam, quæ secun-
dum Animam accipitur, quam Rationem appellamus
effectuum capacem, habent nobiscum communem, li-
cet alia magis, alia minus.

4.
*Sunt se-
 cundum
 illos par-
 tes ani-
 mæ gene-
 ralis
 mundi*

Huic quoque sententiæ favet Plato, Pythago-
 ras apud Laërtium, & Thales apud Plutarchum,
 atque omnes pene illi, qui tantorum Philoso-
 phorum doctrina, & autoritate glorientur.
 Quippe quum existiment Animam quandam esse
 mundi generalem, qua Planta vegetant, & adole-
 scunt; Animalia nutriuntur, & sentiunt; & Homi-
 nes quoque informantur, & intelligunt; colligunt,
 tam Brutorum quam Hominis Animas illius esse
 partes, & ex multiplici ejus divisione, oriri & ad-
 venire.

Iude Hominum, Pecudumque genus, vitæque vo-
lantium,

Et quæ marmoreo fert monstra sub aquore pontus.
 Huic sententiæ adstipulatus Thales, asserere au-
 sus est, plena esse Diis omnia, nul amque adeò vile
 extare

extare corpus, quod suum Dæmonem non habeat: & in se aliquid Divini non complectatur. Hoc quoque præjudicio obcæcati Platonis discipuli, Animas non Hominum modò, sed & cæterorum Animantium immortales esse asseruerunt, & omnis corruptionis expertes. Nam quum acti-
væ sint, vique propria *se moveant*, ab agente externo ad quietem adiginequeunt; cum necessum sit, perpetuò existeret, quod ab alio non penderet, & suæ durationis permanentiam non mutatur.

Verùm, jamdudum inolevit hæc opinio, & inter anilia Platonis figmenta, à patribus annumeratur. Quare opus non est, ut eam rationibus expugnemus, & in debellanda *hæres*, arma capiamus, quæ tam sæpè prostrata est. Notasse sufficiat, quam enormia, ea sententia admissa, absurda proveniant, & inter rerum naturas confusio nascatur. Nam si *æterna* sunt Bestiarum Animæ, & immortalitate donantur, quæ erit inter Homines, & cætera Animantia distinctio? An illa, sicut & nos, interminata felicitas manet? Se nè de Buellarum beatitudine nimium sumus solliciti, ubi Animæ illæ degunt, quæ ab Orbe condito extitere, quibus in locis recon-
duntur? An iis peculiare campi Elisei assignati sunt, in quibus vagentur, & excurrant? Quid de *Pulicibus*, *Aduscis*, variique generis *insectis* factum est, quibus olim *Ægyptii* divexati sunt? Quæ illis post interitum officia? Quem in finem asservantur? Aut quam universo orbi utilitatem adferunt? Cum in confesso sit, *Deum* summa

f.
Admissa
veterum
opinionis,
Bruta ab
Homini-
bus non
discrepa-
bunt.

ma

ma Sapientia cuncta moderari, & omnes Creaturas ad certum finem dirigere; Rationi maxime consentaneum est, ut Brutorum Animæ in Terram, ex qua protectæ sunt, relabantur, & vivere cessent, quum apud nos existere desinunt.

6.
Ordo discen-
dum in
prima
huius
disserta-
tionis
parte.

Sed nè nimium in hujus Dissertationis vestibulo aberremus, ad propositum revertamur, examinemusque, an *Animalia*, vera cognitione imbuantur, deque rebus, extra se positis, dijudicent, ac ratiocinentur. Quod ut facilius attingamus, operæ pretium erit, in hujus dissertationis priori parte, investigare, quid sit *Anima* & qualis Brutis Animantibus competat. Dein, quid *Cognitio*, & in quo formalis ejus ratio consistat. Postremo, an Bestiæ percipiant, & quodnam in illis sit actionum suarum principium. Non de, candide lector, præliminaris hæc Digressio terreat, magnam tibi messem pariet, nec gravaberis, ni fallor, ad principiorum explicationem attendisse, quæ ad præstituti thematis intelligentiam tantopere conducet.

7.
Anima
definitio
ab Ari-
stotele
data sy-
stilis &
Gaga.

Ut igitur ab eo, quod primo loco à nobis propositum est, initium ducamus, prænosse juvabit, quid sit *Anima*, & quid per vulgare illud nomen importetur. Nam cum homines primum rebus vocabula imposuerint, priusquam earum naturas apprime callerent, & proprietates earum ab invicem amolirentur, factum est, ut *Anima* vocem omnibus viventibus indiscriminatim tribuerent, & non minus Plantas, & Arbores, quam *Animalia*, & *Homines Anima-*
bus

bus imbuerent. Sed ea in re nemo crassius *Aristotele* peccavit, quippe eam generalibus verbis definiendo, vir natura versutus, sibi cavet, ne à posteris carperetur, ac proinde talem protulit Animæ definitionem, quæ omnibus pene rebus conveniret, & veluti commune emplastrum, vulneribus omnibus mederetur. Nam *secundo libro de anima*, Animæ essentiam explanaturus, hoc pacto eam definit: *Perfectio, seu actus corporis naturalis organici, potestate vitam habentis*. Quam vaga autem sit hæc definitio, ex eo colligi potest, quod *Theologi, Medici, Chymici*, eam usurpent, & diversis rebus, propriam reddant. Nam asserunt *Theologi*, sacriq; *Textus interpretes*, *Sanguinem* Brutorum esse Animam, aut *spiritum* è sanguine emanantem: præsto est *Aristoteles*, suggeritque sanguinem, *Actum esse corporis naturalis organici, potestate vitam habentis*. Placet *Medicis*, Animam corporis esse *temperamentum*, & humorum, qui in eo sunt, harmoniam. Hæc, *Actus* erit, secundum *Aristotelem*, *corporis organici, potentia vitam habentis*. Afferunt *Antiqui Philosophi*, Animam *aërem* esse, ore conceptum, defervesfactum in pulmone, & in corpus diffusum: Huic quadrat *Aristotelis* Animæ definitio, nempe quod *Aër* sit *perfectio corporis naturalis potestate vitam habentis*. Arbitrantur alii Animam in calore consistere, aut tenuem spiritum corpori sensum motumque tribuere; haud oblitabitur *Aristoteles*, sed mordicus tuebitur, hujusmodi calorem, aut spiritum, aliud non esse quam *actum corporis naturalis organici, potentia vitam*

vitam habentis, Adeo ut, quicquid assignaveris, imo quicquid quantumvis obscurum comminiscaris, hac definitione comprehendetur, & genus, differentiamque sibi vindicabit.

8. Sed quantumvis non ita spatia-
Imo ob- nitio, & certis dumtaxat rebus assignaretur, nō
scura, esset propterea inter Philosophos retinenda.
Consi- Nam quid in ea continetur, quod reprehendi
distin- non debeat? Nullum enim in ea habetur attri-
cte ex- butum *absolutum*, quod Animæ essentiam expli-
plicans. cet: sed *respectiva* dumtaxat prædicata, & generalia, quæ cum aliis mixta, & quodammodo colligata sint, non nisi confusam, notitiam pariunt. Præterea, quid nobis distincti, per *Actus* vocem innotescit? nihil amplius mehercules, quam si quis *lucem*, Actum corporis lucidi esse definiat, & *calorem*, Actum corporis calidi: Quæ definitiones, tantum abest, ut nos doctiores efficiant, quinimò in inextricabilem labyrinthum nos detrudunt, & rem, per se claram, verborum ambagibus obnubilant. Unde *Hermolaus* Barbarus, vir eruditus, & inter suos, ob animi dotes, celebris, cum aliquandò cum Dæmone convenisset, & aspirante fortuna, colloquium nactus esset, nihil ab eo efflagitasse fertur, quam ut nominis *Actus*, in prædicta *Aristotelis* definitione, significationem aperiret, & tanti Philosophi, hac in re, saltem Discipulum efficeret. Hæc addidi, ut inde videre liceat, quam obscuritatem generet Animæ vocabulum, si ad *Vegetativam*, *Sensitivam*, & *Rationalem* referatur, quamq; exigui luminis ab iis mutuemur, qui res diversas

una definitione complectuntur, & confun-
qua natura sua dirimuntur.

Ut igitur accurratius, tum circà Animalium
animam, tum circà eorum cognitionem proce-
damus; supponendum est ex *Institutione Philoso-*
phia, duo dumtaxat esse rerum genera admit-
tenda; una *Intellectualis*, seu cogitans; altera *ma-*
terialis, seu corporea. Sub prior *imentes*, & *spiri-*
tus comprehenduntur. Sub posteriori, omnia
corpora, quæ passim naturalia nuncupantur.
Non obest, quod homo utriusque naturæ parti-
ceps sit, & cogitationem simul, & extensionem
involvat: Quippe homo non res *simplex* est, &
generis unius; sed *composita*, & veluti medium,
utrumq; extremum includens. Quare evidens
est, Bruta Animantia diversè ab Hominibus esse
naturæ, nullaque mente, seu spiritu donari.
Quandoquidem omnia, quæ Bestiæ complectun-
tur, ad *materiale* principium referenda sint, &
nihil cum Hominibus, nisi quoad corpus, affini-
tatis habeant. Disquirendum igitur est, quod-
nam sit in *belluis* principium, quo non modo nu-
triantur, crescant, respirent, moveantur, &c.
sed quo operentur, & illa mira peragant, qui-
bus ad Hominum solertiam, & astutiam, non
accedere modò, sed & illos superare videntur.

Clarissimus *Gassendus*, insignis inter *modernos*
Philosophus, & cui laus præcipua debetur,
quod Antiquorum opiniones, novo lumini re-
stituerit; arbitratur *sensitivam* Brutorum Animam
(quippe nullam aliam præstantiorem, nemo,
quod sciam, comminiscitur) *Flammulam* quan-
dam

9.

Duo
sunt
tantum
rerum
genera,
mater-
iales,
& spi-
rituales

10.

Gassendi
de opi-
nio de
natura
Anima
in Bru-
tis.

dam esse, seu tenuissimi ignis speciem, quæ Animal vitam impertit, ac omnes ejus partes actuat, ac perficit. Adeo ut Animal tamdiu vivat, quamdiu hæc flammula viget; moriatur autem, dum perit, & extinguatur. Nam licet *Ignis* ille corpus sit, tenuitatis tamen suæ respectu, immaterialis censeri potest, si ad reliquam massam comparetur, & ejus exilitas cum cæterorum membrorum crassitudine contendat: Adeo ut, ea ratione, Animæ nomen sortiatur, & vere dici queat, Animal ex corpore & Anima constare. Itaq; sicuti in hoc sita est Bruti essentia, quod ejus partes subtiles sint, & continuæ, motu cito agitentur, & aliæ semper, atq; aliæ in deperditarum locum succedant; pari modo, *Ignis*, seu flammula, qua Bestiæ animantur, subtilissimarum atomorum congeries est, & contextura, quæ pernici motu concitantur, & continua aliquarum *genesis*, & aliarum *abscessu*, eandem semper conservant, ac tuentur. Nam in quod aliud principium referendus est corporis calor, si interno igni non attribuitur? A quo ejus motus? quæ *Sensus* organa objectorum impressiones recipient, nisi calore foveantur? Unde vero is calor, nisi ab Anima, quæ omnes Animalis functiones obit, & exequitur? Nam quamvis dici possit, Animam à calore servari potius, quam ab Anima calorem, manifestum tamen est, calorem à motu pendere, & non, nisi ob interni principii actionem, in corpore reperiri. Ita ut necessarium sit, secundum *Gassendum*, ad aliquam materiale Animam deveniri, quæ æstum producat,

ducat, motum membris largiatur, & cæteros Animalis actus obeat.

Haud multum ab hac sententia abhorret 11.
Honoratus Fabrii libr. secundo de Homine, qui *Honoratus*
 Brutorum Animam agnoscit utique Ignem ef- *Fabrii cen-*
 se, sed purum, & à cæterorum elementorum *set animam*
 mixtione liberum. Ad quod asserendum, ma- *Brutorum*
 ximè adducitur, quod Ignis *vegetus* sit, & plus *esse ignem*
 virtutis, experientia teste, insit, ubi plus calidi *purum.*
 est, & ubi fortius elementum illud dominatur.
 Nam quum in simplicibus aliis corporibus
 nullum discernatur actionis indicium, solusque
 ignis vi productiva polleat: Ratio postulat, ut
 loquitur *Fabrii*, ut, si quod elementum sentien-
 di virtute instructum est, Igni potius, quam ulli
 cæterorum assignetur. Non quod Ignis, absolu-
 tè sumptus, eam vim nactus sit, ut sentientis
 scilicet Animæ vicem gerat, sed quatenus in tali
 organi plexu, tali partium dispositione, fibra-
 rum ductu, communione, textura consti-
 tuitur.

Illustriissimus *Cartesius*, qui obscura quæque 12.
 è Philosophiæ sinu deturpavit, nihilque docet, *Cartesius*
 quod non Rationi apprime conveniat, existimat *astimat*
 belluarum Animam aliud non esse, quam san- *Animam*
 guinem; nec opus esse sensitivam Animam in au- *Brutorum*
 xilium advocare, qua illarum operationes per- *sanguinem*
 ficiantur, & ex qua movendi, sentiendique facul- *esse.*
 tas proveniat. Nam cum videret vir solertissi-
 mus, sanguinem corpus esse fluidum, subtilio-
 remque ejus portionem, ab arteriis in Cere-
 brum, & per illud in nervos, & musculos con-

tinuo circuitu deferri; asserere haud dubitavit, sanguinem in corde calefactum, & in spiritum attenuatum, Brutorum Animam constituere, & à solo ejus motu, varios illorum motus proficisci. Huic sententiæ plurima sacri *textus* loca favent, eamque à quorundam Detractorum pertinacia vindicant, qui fingunt, ea opinione, viam Atheis sterni, ut idem de Hominibus sentiant, & Rationalem Animam ab Humano Corpore amoliantur. Nam tanta est inter Hominum & cæterorum Animantium *Animas* distinctio, tantumque inter utrarumque operationes discrimen, ut vix etiam à stupidissimo ambigi queat, quin à diversis principiis oriuntur.

13.

Animalium Vita in continuo sanguinis motu consistit.

Consistit igitur Animalium vita, in perenni *sanguinis motu*, qui à dextro cordis ventriculo, cursum suum exorsus, per *venam arteriosam* in pulmones demigrat, è quibus in sinistrum cordis ventriculum defluens, mox in *Aortam*, seu magnam arteriam, cujus rami per universum corpus sparguntur, transit, qui ramis venæ cavæ juncti, eundem sanguinem iterum in dextrum cordis latus deferunt. Aded ut *sanguis*, in corde calefactus, & in spiritus conversus, *Vegetativa*, & *Sensitive* Animæ nomen in Animalibus obtineat, & proximum sit, ac præcipuum omnium actionum organum. Id luculenter in quibusdam Animalibus agnosci potest, exempli causa, *Muscis*, *Serpentibus*, *Scorpis*, *Ranis*, & aliis similibus, quæ urgente hyemali frigore intereunt, vitæque ad aliquod tempus

pus privantur ; dum scilicet sanguis cieri destituit, & spirituum generatio ad tempus sufflaminatur. Quæ, ver geniale novis cū dat primordiis rebus, ut loquitur Mantuanus, recuperato per calorem sanguinis motu, denuò ad vitam sollicitantur, & diu intermissas functiones repetunt. Idem in Hominibus cernere licet, qui *laqueo* suspenduntur, aut aquis suffocantur; quippe statim animam agunt, brevique mortem obeunt, eo quod Sanguis, *respiratione* adempta stagnat, & non amplius à dextro cordis thalamo in sinistrum propellitur. Est igitur Sanguis pars Animalium principalis, à quo nativus calor, & spiritus profluunt, ex quo vita nascentibus primum oritur, & morientibus ultimo definit.

Percepto, quod Sanguis universum corpus circumfluens, ad cor, à quo primum profluxerat, iteratis vicibus, in orbem continuo rotatus, sit Brutorum Anima: ad *secundum* veluti fundamentum progrediendum est, ut nimirum, quid *Cognitio* sit, apprehendatur, quid ejus indolem constituat, & in quas potissimum species distribuatur. *Cognitionis* idea adeò manifesta est, ut vix quicquam menti nostræ notius occurrat: & si qui forte in ea explicanda hallucinati sunt, id factum esse arbitror, quod rem planè dilucidam, verbis suis obscurarint, & faciem Soli præferre, ut ita loquar, voluerint. In hoc enim Philosophos non raro errare deprehendi, quod res simplicissimas, ac natura sua evidentes, Logicis definitionibus explicare

14. *Quid Cognitio & in quo natura ejus consistat.*

niterentur, & certis verborum ambagibus, ea perspicua reddere, quæ sponte menti nostræ se ingerunt. Nam quid nobis clarius obversatur, quam ipsa *Cognitio*, quum si quid percipio, ejus simulachrum, seu Ideam animo intueri videor, & illud veluti præsens mentis oculis spectare. Nam licet forte de rebus omnibus, in natura existentibus, ambigere possim, & quæ manibus tango, oculis contemplor, auribus excipio, naribus odoror, & lingua gusto, in dubium revocare; fieri tamen nequit, ut non cogitem, cum ipsa *dubitatio*, cogitatio quædam est, quæ me latere non potest.

15.

Omnes Co-
gnitio inclu-
dit conscien-
tiam.

Quare Cognitionis nomine, intelligendum est, id omne, quod sic à nobis est, ut ejus immediate *consciis* simus: Adeo ut cogitare, seu cognoscere, aliud non sit, quam eorum, quæ in nobis sunt, *perceptionem habere*. Quod ut res exemplo dilucidior evadat; unde quis novit, se intelligendi, volendi, affirmandi, negandi facultate pollere; nisi quia hujusmodi virtutem in se experitur, & talis potentiz sit conscius, dum illam exercet? Id vero non de Cognitione *Reflexa* dumtaxat est intelligendum, qua quis scilicet percipit, seu animadvertit, se aliquid animadvertisse; sed idem de quacunque *prima* perceptione, aut intellectione, qua ad rem aliquam attendit. Unde oritur, ut si aliquis eorum, quæ agit, aut patitur, conscientia careat, nullam eorum notitiam in se experiatur; Ac proinde *Sensu & Cognitione* propriè dictis destituatur. Nam quo pacto, illi rei actionis passio-

nisve

nivè Sensus attribui potest, si se agerè, aut pati nesciat? Hinc fit, quod si Homines in rem aliquam attentius defixi, ita ejus contemplatione occuparentur, ut facem præ oculis accensam, aut Tonitru fragorem non perciperent, tales Homines, nihil earum rerum revera aut sentiunt, aut percipiunt: Ac idcirco, ut sentire, percipere, judicare, affirmare, negare dicantur, eorum, quæ percipiunt, sentiunt, judicant, conscios esse oportet.

Omnes cogitationes, quæ *Conscientiam* involvunt, duorum præcipue generum sunt; *Actio-* 16. *Cognitio in*
nes scilicet, & *passiones*. Dicuntur *Passiones*, *quatuor*
 omnes perceptionum, sive cognitionum *spe-* *species di-*
cies, quæ in nobis reperiuntur; sive, quæ à *Po-* *videtur.*
tentia, quam habemus, percipiendi & cognoscendi proficiscuntur: & tales operationes, in quatuor species dividuntur. Prima est, *Intellectus purus*, per quem mens circa speciei corporeæ auxilium, omne objectorum genus percipit, tam immaterialium, quam materialium. Secunda, est *Sensus*, tam is qui externus, quam qui internus nuncupatur. Tertia, *Imaginatio*, quæ sub se Sensem communem complectitur: quia eodem organo donantur, & circa eadem objecta occupantur. Quarta, est *Memoria*, sive *Reminiscentia*, hoc est, ea facultas, per quam deprehendimus, nos eandem prius habuisse cogitationem. Cogitationes, quæ actiones dicuntur, sunt omnes nostræ *Voluntates*, quia eas experimur ab Anima nostra directè provenire, & à qua sola pendere videntur. Ad has *judicia*
nostra,

nostra, inclinationes, appetitus, omnesque voluntatis nostræ Motus referuntur, qui nunquam non potentiam volendi, & se determinandi comitantur. Et illæ in nostra esse potestate dicuntur.

17.

Ut res corporea ab immateriali & incorporea differat.

His, quantum per brevitatem licuit, explicitis, & veluti fundamenti vice, præmissis, nunc discutiendum est, num *Cognitio* supra explanata *Brutis animantibus* conveniat; seu ut clarioribus verbis dicam: an *Bestiæ* percipiant, sentiant, imaginentur, recordentur, &c. *Hominibus* in his operationibus ita imitentur, ut aliquid *Rationis* præ se ferant. Quod ut clarius appareat, in memoriam revocandum est, *res corporea* naturam in hoc præcisè sitam esse, quod longitudinem, latitudinem, & profunditatem includat; sive quod sit *res extensa*, nam aliud non est, tribus dimensionibus constare, quam *extendi*; & aliud non est extendi, quam illas tres proprietates involvere. Corpori, seu *materiæ*, ex diametro *res spiritualis* opponitur, cujus natura in *Cogitatione* posita est, quæque omnem longitudinem, latitudinem, & profunditatem excludit. Quicquid enim in *re spirituali* esse agnoscitur, est, quod sit *res cogitans*, hoc est, percipiens, affirmans, negans, volens, nolens, &c. Quæ omnia, citra omnem extensionis ideam, intelliguntur, nihilque cum *divisibilitate, figura, situ*, cæterisque aliis corporis affectionibus, affipitatis habent: Ac proinde statuendum est, *Cogitationem* attributum esse *Substantiæ*, nullam extensionem includentis; & vice

vice versa, *Extensionem* attributum esse Substantiæ, nullam cogitationem admittentis. Quippe duæ illæ idææ penitus differunt, & nihil prorsus simile menti nostræ repræsentant. Quid autem ad rerum distinctionis evidentiam magis confert, quam quod una absque alia concipi queat? Nam si rectè inferimus, ea corpora figuram *spharicam* induere posse, quæ non sunt *quadrata*, & corpora quadrata, quæ non cientur, quoniam quis *quadraturam* imaginari potest, absque *rotunditate*, & aliquo *motu*: Annon eadem ratio suppetit concludenti, quasdam dari Substantias posse, extensionis expertes, quia idea, quam de extensione formamus, à notitione Cogitationis discrepat? Nam ad differentiam inter res duas stabiliendam, sufficit, quod una absque altera, *clare & distinctè* percipiatur.

Hoc itaque dato principio, evidentissimè deducitur, Bruta Animantia, *Cogitatione* privata esse, & non Judicii modo, sed & cujusvis simplicis perceptionis esse expertia. Nam qualiscumque Anima ipsis inesse fingatur, vel *Sanguis* per universum Corpus circumactus, ut vult Nobilissimus Cartesius: Aut *Ignis purus*, flammulave, omnes ejus partes vivificans, & inspirans, ut *Fabro & Gassendo* placet, admittere cogimur, hujusmodi Animam, Corpoream esse, nec aliquid à materiæ indole alienum includere. Quippè licet Sanguis, in corde rarefactus, in spiritus Animales abeat, qui *venti* subtilissimi instar, in Cerebrum ascendunt, & per Ner-

18.

*Anima
Brutorum;
qualiscumque
fingatur,
Cogitationis
est experta.*

vos in Musculos feruntur. Licet flammula illa, ex partibus subtilissimis componatur, quæ tanquam è crassiori massa emergens, rerum spiritualium, ut ita loquar, agilitatem æmuletur; non tamen ob id materialis esse desinit; nec accidentariæ illæ qualitates, eam supra Corporis conditionem evehunt. Quare si *Materie* denegatur *Cogitatio*, & res extensa inepta est, quæ rei, quæ ipsi contingit, conscientiam habeat, & illud quoque à materia removendum erit, quantumcunque subtili, & per totum corpus aliquod se diffundente. Partium enim *tenuitas*, non materiæ rationem tollit, & sat est, ut quid extendi possit, ut materia dicatur, & ejus imbecillitatem participet, & induat. Quis dicet subtilem illam materiam, quæ *Auri*, *Adamantis*, *Chalybis*, & cujuscumque corporis, utcumque solidi meatus ingreditur, à corporis natura abhorrere? non mutant Accidentia rerum essentiam, & necessum est, subjectum idem semper, quoad proprietates essentielles, manere, quantumvis alteretur, & novas denominationes subeat.

19.

*Materia
passiva est
Omnis
actionis in-
capax.*

Haud me fugit, Philosophorum nonnullos, huic demonstrationi obviam ituros, neque passuros, ita materiam vilipendi, ut tota iners, otiosaque reputetur, & omnis actionis reddatur aliena. Quo pacto, inquit, ad compositi constitutionem concurret, si mere *passiva sit*, & nequaquam moveatur, nisi ab altero mota? Annon, *Atomes* in sublunari nostro Aëre, spectamus, nullo impellente cieri, & sursum, deorsumque

sumque sponte deferri? Unde provenit hic impetus? quæ continuæ hujus propulsionis causa? præter ingenitam quandam materiæ vim, qua se ad motum determinat, & prout expedit, sese agit, & contorquet. Quis inficiat ibi, *Gravia*, exempli causa, *lapidem* ultro descendere: *Arcum tensum*, amoto obstaculo reflecti, & ad statum pristinum reverti. Verum, quodnam invisibile agens illic supervenit, quod corpus grave deorsum pellat, & Baculum deflexum, ad locum priorem restituat? Si igitur actionis capax est materia, vimque agendi, commovendique habeat, quidni & *percipiendi* virtutem obtineat, & ex certa Conditoris lege, certis organis instructa, sentiat, apprehendat, imaginetur, recordetur, & alias intelligentis naturæ functiones exerceat.

Arbitror me compendio complexum esse, quicquid contra materiæ inertiam adferri potest: quare, mihi nunc incumbit, ut has rationes diluam, ostendamque materiam ignavam esse molem, & non minus motus, quam cognitionis incapacem. Norunt omnes Philosophi, si quid de materiæ indole norunt, illam *potentiam* esse, & in hoc potissimum à re intellectuali discrepare, quod hæc *Actus* sit, illa autem *potentia*, hoc est, si res probe apprehendatur, iners, otiosaque moles, & omnem actionem refugiens. Nam illud inter substantiam cogitantem, & extensam intercedit; quod Cogitatio semper menti præsens est, motus autem non nisi corpori contingit, dum nimirum ab agente

B 5

exter-

externo impellitur, & vim aliud corpus movendi mutuatur.

20.

*Aristotelis
authoritas
ad proban-
dum, mate-
riam iner-
tem esse, &
otiosam.*

Sed quia magni semper habita est *Aristotelis* authoritas, & oraculi loco æstimata, quæ ex illius scriptis eruuntur; haud parum ad assertionem nostram stabiliendam, conducet, si, quid hac de re senserit ille Philosophus, aperiâmus. Etenim libro de generat. & corrupt. fatetur *materiam nudam, ac per se passivam tantummodo esse*, ni externum agens superveniat, quod eam agitet, & à quo impressionem accipiens, nihil obest, quo minus & ipsa agat, & aliud quoque corpus ad motum concitet. In iisdem libris, affirmat variis in locis, *pati, & moveri, proprium materiae esse, movere vero, & agere, alterius esse potestatis*. Imò primo *Metaphysicæ*, cap. 3. ubi motus originem exactius inquit, priscos acriter reprehendit, quod *solam materiam consideraverint in Physicis, neglecto primo motus principio*. Et in *Meteorologicis*, sententiam suam clare explicans, asserit, *nec formam, nec motum materia competere, nisi in quantum aliunde imprimitur*. Non responderi debet *Aristotelem*, de materia dumtaxat in communi locutum fuisse, quum expressè sermonem de particularibus corporibus faciat, certa figura præditis, quæ passim in *Physicis Naturalia* nuncupantur. Quippe verbis expressis ostendere satagit, *nullum corpus à seipso moveri*, & *Animantia ipsa, quæ sponte moveri videntur, ab alio quoque moveri*. Nam quum octavo *Physicæ*, cap. 2. cum vulgo sibi objecisset, quod *Animal prius*

prius quiescens, postea moveatur, & ambulet, nullo, ut videtur, eorum, quæ extra sunt, movente: Reponit ilico Philosophus, hoc falsum esse; certumque, inquit, semper aliquid eorum, quæ innata sunt Animalibus, moveri: hujus autem motus, non ipsum Animal est causa, sed id forte, quod ambat.

Ex quibus locis satis evidenter constat, Aristotelem existimasse, materiam principium purè passivum esse, & ab alio habere, quod moveatur, aut corpus aliud agitet. Non obstat, quod Atomis in aëre nostro volitent, actionemque aliquam, ab una parte, in aliam transmigrando testentur. Quippe non ipsis motus ille debetur, sed subtili materia, quam institutione Philosophi diximus in continuo esse motu, omniumque corporum meatus subire, ac penetrare. Et quum hujus materiæ plurimum Aëri insit, ejusque penetralia continuo occupet, mirum non est, si tenuissima corpuscula, seu Atomis, è vicinis corporibus emergentia concutiantur, & variis ejus motibus obsecundent. Pari ratione, experimentum de tenso Arcu explanatur; quoniam vis illa elastica, qua Arcus ad statum priorem se reducit, non ad ipsam Arcus materiam referenda est, sed ad Ætherem subtilissimum illud corpus, quod per apertiora superficie spiracula subiens, eaque in concava superficie angustiora offendens, vim facit, impetumque molitur, quo constrictos, ex extremitatum adductione meatus referet, & liberum sibi transitum paret.

21.

Explicatur;
qui Atomis
in aëre mo-
veantur, &
arcus tensus
reducatur.

Si

22.

*Subtilis
materia à
primo moto-
re sua acti-
vitate vim
mutatur.*

Si requiras, quomodò sit igitur, ut materiæ motum denegemus, si subtilissimus ille *Æther* agitetur, & corpora aliæ commovendi, partien- di, & propullandi vim habeat? Te tantillum contine, ô bone, non enim subtilissimam mate- riam, sui motus principium esse constituto; sed primum Motorem, nempe *Deum*, qui à primo conditæ materiæ instanti, varium ejus partibus motum impertit; & nunc eadem actione, qua materiam conservat, eandem omnino inditi motus quantitatem in mundo retinet, ac tuetur. Nam finge subtilissimum illud corpus ab omni prorsus motu cessare, putas illum recuperandi vim habere? nequaquam; nam quum movere, actio quædam sit, à principio incorporeo pro- fluere debet, & non nisi ab eo manare potest, à quo primum profecta est.

23.

*Nulla est
gravitas
corporibus
intrinseca.*

Non magis materiæ activitati, objecta cor- porum gravitas patrocinator: Quippe insulsum est, gravitatem, imaginari, terrenis corporibus ingenitam, qua ad Terram feruntur, aut eam appetunt: Quid aliud id est, quam rebus mere passivis *Intellectum* affingere, & *Voluntatis* actiones impertiri? Aliud de gravitate intelligi ne- quit, quam quod subtilis materia, inter nos, & Lunæ orbem interjecta, quæ pernici motu, cir- ca Terræ molem acta, corpora omnia centrum versus propellit, & illa è locis superioribus amandat. Aded ut, sublato illo fluidissimi liquo- ris impetu, nullum corpus grave foret; & *Lapis*, qui pro exemplo allatus est, in aëris medio suspensus semper maneret, & nunquam deor- sum

sum laberetur, ni subtile illud agens adesset, quod Terram versus protruderet. Nullum igitur corpus à se ipso movetur, & dicendum est, pati potius, quam agere, dum concutitur, & de loco in locum transmigrat.

Id etiam dilucidius evadet, si partet, quibus substantia materialis constat, consideremus aut homogeneas, aut heterogeneas: nam si *Homogenea* ponantur, & à se ipsis omnes immediate moveri, haud apparet, cur cur unquam quiescerent, aut ita inter se compingerentur, ut coalescerent, & illas moles componerent, quæ cotidie oculis nostris obijciuntur. Quia cum talis motus, materię partibus sit innatus, & ab illis necessario dimanet, fieri nequit, ut coagulentur, sed potius ab invicem distinctę maneant, & omnem consilientiam aversentur. Alioquin si ab eo motu continere se valerent, & ad quietem, pro lubitu, se redigere, quidni eas libertate donemus, fateamurque rebus inanimis & consilium, & deliberationem inesse. Si vero partium, quibus conflatur, congeries *heterogenea* sit, & ex iis nonnullę actuosę sint, ut *Gassendo* videtur, & alię inertes, omnique mobilitate destitutę; non minor, ex hac positione, confusio in mundo nasceretur, quam si omnes se movendi facultate gauderent: quia quum illę, quę eam vim obtinent, non possint non vicinas impellere, istę vero mutatum motum deponere non valeant, nisi cum aliis contiguis & minus agitatatis impertiendo, nec hę ultimę, ullam suę celeritatis jacturam faciant, quum illis ingenua sit,

24.

sive partes in materia, homogenea, sive heterogenea sint, movere se non possunt.

fit, & invariabilis, sequitur, quod universa mundi machina nunc concuteretur, ne quidem minima ejus particula à motu cessante. Unde celebris *Henricus Morus*, in suo *Enchiridio Metaph.* quamvis Cartesii doctrinæ data opera adverteretur, in hoc tamen physicæ fundamento, opinioni ejus subscribere cogitur, dum corpus in genere sic definit: *Substantia materialis, vitæ, omnique etiam motu ex se prorsus destituta, Vel aliter: substantia materialis, aliena vi in unum coalescens, vitam itidem ac motum participans.* Quibus verbis sat indicat vir clarissimus, inertem esse materiam, & omnis actionis omnino expertem.

25.

Uti materia
expers est
motus, illa
perceptionis
est incapax.

Postquam igitur ostensum est, res corporeas nulla vi motrice esse præditas, ac proinde motum aliunde debere proficisci: haud arduum erit demonstrare, illas quoque *Cognitione* esse destitutas, & ad nullum cogitandi genus, posse aliquo jure aspirare. Nam quid cognitionis habet *Extensio*, cum *perceptione*? Quæ affinitas, quæ relatio inter mentem, & corpus intercedit? nisi quod ambo eidem generi, nempe *Substantiæ* substituuntur, & ex æquo, per se entia audiant. Verum apud *Logicos* plusquam notum est, generis alicujus supremi species, non nisi in essentialibus istius Generis attributis convenire; Aliàs immeritò hujusmodi species primæ nuncupari deberent, & summum illud Genus, in quo convenirent interjectum potius genus dicendum esset, illas, & genus aliud superius dividens: At *Substantia* genus est su-

prec

premiū, cujus immediatæ species sunt Corpus, & Spiritus, non nisi igitur in attributis Substantiæ essentialibus, qualia sunt, *Ens per se, esse subiectum proprietatum, nulli substratum esse, &c.* convenire possunt. Sed de horum numero non est perceptio, & extensio: cum dentur Substantiæ, quæ non percipiunt, & aliæ, quæ non sunt extensæ; ac proinde Cogitato & Extensio ad Substantiam in genere non spectant. Nunc tantillum procedamus: Id quod in attributis dumtaxat essentialibus consentit, à cæteris aliis oportet, ut discriminetur: At Mens, & Corpus non nisi in attributis essentialibus conveniunt: igitur Mens, & Corpus ab omnibus reliquis discrepant, ipsisque opponuntur in iis, quæ Substantiæ naturam non ingrediuntur. Contradictionem enim implicat, quod duæ res in hoc ipso uniantur, per quod differunt, & in eo affinitatem ineant, per quod formaliter opponuntur.

Huic Ratiocinio haud parum lucis accedet, si demonstretur Cogitationem nulla ratione Extensioni posse competere, hoc pacto: Si Extensioni perceptio tribui potest, aut illi tribuitur tanquam *aliquid ejus essentiam* constituens; aut tanquam *proprietas*, quæ ejus essentiam comitatur; aut denique tanquam *Modus*, sive Accidens, quod illam denominat. Non potest autem Cogitatio, ut *essentiale attributum*, Corpori convenire, quoniam inde sequeretur, Corpora omnia Cogitatione imbuta esse, ac proinde non tantum Bruta, sed & Arbores, Lapides, Saxa,

26.

Cogitatio non convenire potest Extensioni, neque ut pars essentialis, nec ut proprietas aut modus.

Saxa, cognitione esse prædita. Non etiam ut essentia *proprietas*; quia cum proprietas omni, soli, & semper conveniat, sequeretur, quod facultas perceptiva, omni *rei* materiali competere, atque nullum adeo vile corpus existeret, cui Cogitatio non tribueretur. Non denique tanquam *modus*, Substantiam efficiens; quoniam ea est modi indoles, ut licet *subiectum* absque *modo* intelligi queat, non autem vice versa, Modus abque Subiecto. Sed clarè & distinctè concipere possumus Cogitationem, secludendo omnem substantiam corpoream, imo negando talem in rerum natura existere: Igitur Cogitatio ne quidem, ut modus, materiae attribui potest; ac proinde Cogitatio Rei materiali prorsus est extranea.

27.
*Argumen-
tum Regii
contra præ-
dicta,*

Aliqui forsitan, *Henrici Regii* opinioni adhaerentes, assererent, id tantum verum esse, quamdiu existentia nondum constat; secus autem, si in Rerum natura esse supponatur: nam tunc quidniâ Cogitatione modificari queat, & ejus adventu novam denominationem sortiri. Nam licet forte quis se in loculo *Cæsaris* imaginem gestare certus sit, ignoret autem, an illa ex *auro*, *argento*, aut quocunque alio metallo insculpta sit, is affirmare potest, se *Cæsaris* imaginem habere, quamvis ei nulla auri, aut alterius metalli representatio occurrat: Imò, maxima ei suspicio oriatur, nullum metallum inter Res mundanas reperiri: Et tamen inferre nequit *Cæsaris* imaginem, & Aurum, vel Argentum duo esse distincta, quamvis ille se junctim intelligere possit,

possit. Ad eum modum, etsi *Cogitationem* concipere valeamus, ut Rem à Corpore distinctam, non tamen indè rectè concluditur, duas esse Substantias, ab invicem distinctas, hoc solo motivo impulsæ, quod unam ab altera separatim concipere possumus.

Sed hoc, aut simile exemplum, quod ab Adversariis adferri potest, tantum abest, ut ipsis favoreat, quin potius adversetur, & assertum nostrum corroboret; quippe non *Aurum*, aut quodlibet aliud metallum primum est *Cæsaris imaginis* subjectum, sed Extensio, hoc est, *Aurum*, in quo insculpta est Cæsaris effigies, non ideo istius imaginis susceptivum est, quod ea sit hujus metalli indoles; Aliàs ex *Auro solo* effingi imagines possent: sed quia *Aurum* substantia est materialis, id est, Res extensa, & in qua efformari Hominum simulachra possunt. Ex averso, hoc exemplum in rem nostram facere videtur. Nam si ex eo, quod aliquis *Cæsaris imaginem* in loculo gestet, idque animo considerat, fingere non potest, nullum esse corpus in universo, ac proinde talem imaginem debere esse corporis modum: Haud apparet, cur parè ratione inferre nobis non liceat, *Cogitationem* Corpori non competere sive non esse ejus attributum; quum supponere possimus, nullum corpus in rerum natura existere, eo ipso tempore, quo nos cogitare animadvertimus. Manifestum igitur apparet, in cogitationis conceptu, nihil materiæ involvi, & corpus, qualemcumque figuram subeat, & quantumcumque

28.

Solentur argumentum Regii.

C

agile,

agile, purum, tenue fingatur, ad *perceptionem* non posse quicquam conferre. Etenim si res corporea perceptione imbuatur, si oblata objecta apprehendit, quæ futura est inter *Animam* & *Corpus* distinctio? quo pacto Animalia ab Hominibus discrepabunt? qui Bruta, *bruta* erunt, si Ratione utantur, & non secus, quam nos, sentiunt, percipiunt, imaginantur, judicant, ac discunt. Frustra indubiè Homines Rationis titulum sibi vindicant, Animaque spirituali gloriantur, si materia detur, earum functionum capax, quæ incorporeis substantiis competunt, & eas à rebus cæteris dirimunt.

29.

*D. Hobbes
Ratio, quæ
probat, Cogitationem
esse motum
corporeum.*

Verùm, hic Dominum *Hobbes* inelamantem audire videor, me citra ullam necessitatem, ad immateriale principium recurrere, ut cogitatio enascatur, quum & ipse *motus, vel unius partis materia reactio, contra alteram, aut saltem hujus Reactionis debita continuatio*, id efficere queat. Nam quis in seipso non experitur, Caput fervere, omnesque Cerebri partes concuti, & commoveri, dum seriis meditationibus plus æquo occupatur, aut diuturnioribus studiis sedulò incumbit? Id certè haud contingeret, si *Sensatio*, aut *Perceptio*, materiæ opus non esset, & ab eorum partium agitatione & motu non proficisceretur. Quo dato, quidni ex diversitate *Reactionum* partium materiæ, in se invicem, cogitationum diversitas oriatur; dum scilicet variis modis se comprimunt, & in se invicem reagent, & remittuntur? Quare talis futura est uniuscujusque particulæ cogitatio, qualis in ea motus

pro-

producetur, & alius atque alius inter eas pulsus, sive pressura continget.

Aliquid hoc argumento *D. Hobbes* probaret, si primùm in suam sententiam pellicere nos posset, ut credamus, nihil substantiale in Universo, præter materiam existere, & quicquid productum est, extensum esse, ac divisibile. Nam cum constet, Homines perceptione præditos esse, & destinatis à natura organis, rerum exter-

30.
Hobbes hypothesis examinatur, & falsitas arguitur.

narum impressiones recipere, vix posset, data ea hypothese, aptior meo iudicio Perceptionis causa assignari, quam *reactio*, unius partis materiæ in aliam, & motus varietas in illa excitati. Sed cum hypothesis ista omnino falsa sit, & univ-
versum hoc aliud præter corporum congeriem includat, & possit, quod corpus non est, *eius partem facere*, excusatum me habebit *D. Hobbes*, si ego longe diversa sentiam, & ab ejus opinione penitus absum. Nam quidni hoc pacto Animalia ipsa, non modo in *catechis* sopita, sed & ipsorum etiam exuviz, sive cadavera, vitali flamma extincta, sentire dicantur, & percipiendi potestate esse prædita; cum tunc temporis, non minus *reactionum* capacia sint, & corporearum impressionum susceptiva. Quidni Bovis mortui *oculus* videre, objectaque percipere affirmetur, dum fenestræ foramini ita immittitur, ut pars ejus *anterior*, aream, varia objecta Sole illustrata, respiciat; *posterior* autem interius conclave, quod totum tenebrosus, nihil luminis admittere debet, præter illud, quod per oculum subit, & circa fundum omnes tunicæ auferun-

tur, & ne humor defluat, ovi putamen applicatur, aut aliud aliquod corpus candidum: quoniam eo tempore animadvertere poteris, objectorum externorum imaginem æquè distinctè in eo efformari, ac si super viventis Animalis retinam effinguntur, præsertim si pro objectorum distantia, aliquanto magis, vel minus prematur. Non obest, quod in *seriis* meditationibus *Caput* ferveſcat, & aliquæ Cerebri partes solito vehementius concutiantur; quia hujusmodi locales motus, tantum connotant, mentem, quamdiu Corpori alligatur, à quibusdam Corporis motibus pendere, & nostris Sensationibus Corporis actionem intervenire: Adeò, ut sentiamus, requiritur, ut *organum* alicujus ex nostris Sensibus, certo aliquo modo dispositum sit; quod citrà motum fieri nequit. Magnum enim discrimen interest, inter id, quod in sensationibus nostris ad *Corpus* spectat, & id, quod ad *mentem* pertinet; motus quidem externum objectum imprimit, & organi, *Cerebrique* mutatio, ad Corpus referuntur; sed in nullam perceptionem involvit; quoniam illa non in *motu*, non in *reactione*, aut etiam in species *impressionis* consistit; sed in *Conscientia*, aut cognitione interna, quam per nosmetipsos immediate percipimus, quando eorum, quæ facimus, aut quæ in nobis peraguntur, consci sumus. Cum verò talis conscientia sit aliquid penitus à motu locali distinctum, non potest Cogitationis essentia in motu locali consistere.

Sed materiæ indolem paulò pressius exami-
nemus, eamque in *Monadas*, sive minutissimas
physicas particulas dividamus: mox quæro, an
singulæ monades, à se mutuo separatæ, perci-
piant, sensusque capaces sint: An verò *compo-*
situm dumtaxat, ex iis resultans? Neminem ar-
bitror, adeò fore Atomis amicum, ut earum
cuilibet intelligentiam assignet; nam quis cre-
dat, exiguam, quam fingere possumus, materiæ
particulam *Sensu* donari, & objectorum impres-
siones, ad extra venientes, percipere, & medi-
tari? Si autem *Totum* solummodo, istis mona-
dibus constans, sentit, & intelligentia imbui-
tur; qua ratione, quo artificio fieri potest, ut ex
rebus insensibilibus, alia *Sensus* capax oriatur?
Quomodò ex varia Atomorum coitione, quæ
omnis qualitatis expertes sunt, *Animal cogi-*
tans, id est, videns, audiens, percipiens, &c.
exurgere potest? Nam si Atomus una dolere
non possit, ut asserit Galenus libr. de const. art.
cap. quarto, illud Hippocratis, *Si unum esset Ho-*
mo, non doleret; quia non foret, unde doleret, ex-
plicans, quod alterationis, & *Sensus* incapax sit.
Patet, si dum acu caro pungitur, Atomus una
non sentiat, non sensuras duas, nec tres, nec
quatuor, nec plures: perinde fore, ut si Ada-
mantum, aliarumque rerum invulnerabilium
acervus fodiatur. Et ut digiti connexi absque
dolore separantur, sic iri Atomos diductum,
absque ullo doloris *Sensu*, cum se mutuo so-
lum contingant, Hinc ad rem præsentem præ-
clare Plotinus; *Si quis asseveret, concurrentes*

31.

Non partes
materia,
non totum
ex iis constans
capax
est cognitio-
nis.

Atomos efficere Animam, ille passionis consensione, naturæque copulatione refellitur: Quippe cum non fiat, per totum, unum & compatiens ex corporibus non patientibus, nec ullam unionem admittentibus, ipsa vera Anima sit, sibi metipsi omnino compatiens.

32.

*Quomodo
res sensa-
lis secur-
dum Gas-
sendum ex
insensibilibus
fieri possit.*

Clarissimus Gassendus, hac in re Epicurum secutus, respondet, Atomum quidem unam, Sensus esse expertem: nihil tamen ob stare, quominus natura, ex pluribus Atomis, certa ratione commixta, Alterationis & Sensus capacem sit; ac proinde mirum non esse, si *Adamantum*, exempli causa, aliarumque similium rerum acervus non sentiat; quandoquidem ille non ita componitur, neque ex partibus sic affectis constat, ut sentiendi vim obtineat. Quare existimat, Sensibile & Insensibile haud multo ab invicem distingui, quam *accensum*, & *inaccensum*: & sicuti videmus lignum ex face accendi, & flammam in novo subjecto progigni: Ita nihil vetat, quin res sensibilis, ex insensibilibus fiat & ex mortuis, ut ita loquar, viva enascatur. Quemadmodum Lucretius, Epicureis principiis conformiter differit.

*Uti omnes Natura cibos in corpora viva
Vertit, & heinc Sensus animantium, procreas
omnes,*

*Non alia longervatione, atque arida ligna
Explicat in flammæ, & in ignes omnia versat.*
Vult his verbis præclarus Vates, quod quemadmodum *caro viva*, ex pane, aut herbis, non sentientibus efformatur: Et sicut ex ligno insensibili,

sensili, quædam particula eruuntur, quæ quamdiu ligni substantiæ immersæ sunt, immotæ manent, & quodammodo torpidæ oriantur; admo-
to autem incendio, explicantur, novoque modo dispositæ, lucendi, calefaciendique virtute pollent: Ità corpuscula ignea, quamdiu *sejuncta* sunt, & in materiæ penentralibus reconduntur, sentiendi facultate destitui: ubi verò sese extricaverint, & cicerint, corpus agitant, vegetant, animant, sensumque illi, ac perceptionem impertiunt.

Quamvis hæc omnia ultrò *Gassenda* concederemus, admitteremusque Animam in Corpore, Ignis instar accendi, & Sensum ejus partem esse, qua à rebus cæteris insensibilibus distinguitur: eadem adhuc difficultas maneret, qui nimirum sit, ut quum caloris, flammulæque Atomis, seorsim à se mutuo divulsæ non sentiant, neque percipiant; vim autem percipiendi, & sentiendi nanciscantur, dum conjunguntur, & sibi vinculo associantur. Nam quæri adhuc potest, quam ratione, ex *monadibus* illis committis, perceptio oriatur, & ex earum unione, tanta vis aceedat, ut, quæ prius insensiles erant, sensitivæ reddantur. Hic hæret *Gassendus*, ingenuèque fatetur, se haud concipere, qui res Sensu carens aliis permixta, Sensationem efficiat, & aliis perceptionem largiatur, qua destituitur. Sane fatendum est, inquit, non videri quam obrem speremus posse rem manifestam fieri: quando aut longe fallimur, aut fugit omnino humanam solertiam, capere, quæ textura sit, contemperatioque,

33.
*Repugnat
Sensum ex
rebus insensibilibus
oriri.*

sive flammula, ita censei anima, ac sentiendi principium valeat, sive partis, aut organi, quo animato, vegetatoque, Animo ut sentiat utatur. Verum est, quod paucis interjedis, exempla quædam adfert, quibus progressum demonstret, quæ res sensiles, ex insensibilibus oriantur. Primo *Arborum fructibus*, qui *dulces* ex acerbis evadunt, *odori* ex inolentibus, *flavi* ex viridibus, temporis successu adeo imperceptibili, ut sub initium, nihil ejus qualitatis discernatur, quæ futura est, & sub finem plerumque, nihil ejus, quæ initio fuit. Quibus insinuare satagit, pari temporis progressu, scilicet imperceptibili, rem insensilem, sensilem evadere, & quæ primum cognitionis expers fuerat, perceptivam effici.

34.
Gassendi
exemplis
non probatur,
rem sensilem fieri posse ex insensili.

Sed parum his exemplis videtur Gassendus proficere: nam facile intelligimus *Fructum*, dum maturescit, *saporem* mutare, & qui acerbus fuerat, *dulcem* evadere, quia nimirum succus, ministro calore subactus, defæcatur, coquitur, percolatur; qua actione, asperis corpusculis foras erumpentibus, humor digestus superest, qui gustum blandè afficit, & gratum præfert saporem. Satis clare apprehendimus, quomodo *Fructus colorem* mutet, & colore viridi depositò, *flavum* induat; quoniam fructus dum maturescunt, percolatio perficitur, partes subiguntur, defæcatur succus, & in spumæ modum intumescit: quæ omnia cum sine partium transpositione fieri nequeant, necessum est, quoque colorem mutari, & alio modo, quam antea, ejus

eius aspectu, oculos affici. Nullatenus verò concipere possumus, quod plures *atomi*, simul junctæ perceptionem generent, & ex varia earum positione, sensitiva facultas exurgat: Quia quum *Conscientia*, ut prænotatum est, & in *Cognitione*, & *Sensatione* includatur, non possunt *Atomi*, seu materiæ *monades*, eam dispositionem sortiri, aut ita inter se coire, ut illam affectionem in corpore pariant, utpote soli substantiæ immateriali propriam & ab ea inseparabilem.

Præterea, Intellectu arduum est, quomodo in materiam, seu corpoream illam Animam, quam Igneam appellant, Cogitatio recipi queat. Nam aut in *tota materia* tota Cogitatio recipitur; aut tota in *singulis monadibus*, sive exiguis particulis; Aut denique singulæ perceptionis partes in *singulis materia partibus*. Si tota materia, Bruti scilicet Anima, objecti speciem admittit, haud videtur, quomodo possint in ea Sensus distingui; quum singulæ monades sensorii vicibus fungantur, & per totam corpoream illam substantiam emissæ species promiscuè effundantur. Nam quomodo *Auris*, exempli causa, sonis excipiendis deputabitur, potius quam *Oculus*, si in tota Anima, hæc sensatio recipiatur, & quælibet ejus particula audit, & aëris undulatione percellitur? Cur *oculus* magis, quam *Nares*, detegendis ad extra objectis, organum statuatur; si tota Anima, res longe distantes, perceptione celerrima apprehendat, & in quolibet ejus puncto, rerum species

35.
Cogitatio
nulla ratio-
ne Anima
Corporea
competere
potest.

effigientur? pari ratione de cæteris Sensibus est differendum. Si autem *singula partes*, totam objecti imaginem admittunt, necessum est, ut unum materiæ percipientis *punctum*, innumeras objecti species contempletur, & id æquet objectum, à quo infinitis propemodum vicibus superatur. Quod neminem, ut arbitror, sanæ mentis esse admissurum. Nam qui fieri potest, ut monas una physica, quæ minima existimatur esse materiæ particula, *expansi* alicujus objecti, & varii coloris *tincti*, integram imaginem recipiat? Si demum singulæ materiæ partes singulis perceptionis partibus respondent, totum objectum nunquam percipi poterit: Quia quum singulæ percipientis partes, singulas imaginis objecti partes tantummodo admittant, nihil supererit, quod totum objectum percipiat, deque eo judicium ferat; non magis quam si tres *Musici*, qui trium partium canticum canerent, & ad propriam dumtaxat vocem intenti, aliorum partem non audirent, de tota *Symphonia* decernere valerent.

36.

Potest Deus
Machinas
creare, quæ
Brutorum
actiones
imitentur.

Ubi igitur innotuit, variisque argumentis confirmatum est, materiam non posse esse *Motus* principium, & obtusæ adeo indolis esse, ut nullius Rei, quam patitur, possit esse *conscia*, seu, ut aliquid ullatenus percipere queat: Quis inficias ibit, summum Naturæ Opificem, & à cujus nutu creata quæque dependent, potuisse eiusmodi Machinas effingere, quæ eisdem prorsus motus referant, actionesque omnes iis simillimas exerant, quas in *Brutis* Animantibus fieri

fieri cernimus? Quod tales Machinas fabricare Deus valeat, in confesso apud omnes est, & à sapientissimo Augustino, epistola centesima secunda, clare asseritur, his verbis: *Miror tibi videri sonitum illius vocis, quæ dictum est, Tu es filius meus, non mediante animo, sed Divino nutu, sola corporali natura sic fieri potuisse; & non videri eodem modo posse fieri cujuslibet animalis speciem corporalem, motumque viventis similem, divino nutu, nullo animali interposito spiritu. Si enim obtemperat Deus creatura corporea, sine vivificantis anima ministerio, ut edantur soni, quales edi ex corpore animato solent, ut forma locutionis articulata auribus inferatur, cur non obtemperes, ut sine vivificantis anima ministerio, figura motuq; volucris eadem potentia Creatoris ingeratur aspectibus. Quis non miratur portatile horologium, ex certa partium figura, rotarum dispositione, chalybis convolutione, seu elaterio, tempora metiri, & horas certo indicare? Quis non Machinam illam cum stupore contempletur, quam se spectasse in Monetario Segoviensi testatur Illustris Eques Digbanus? quæ tanto artificio est elaborata, ut pars ejus quælibet, variis muneribus deputetur, & ad propriam actionem sit destinata. Quippe pars una, Auri, Argenteive massam in latitudinem extendit, eamque crassitiam largitur, quam cudenda moneta postulat. Huic altera jungitur, quæ laminam sic distentam haurit, imagineque designat, quo peracto alteri jam signatam transmittit, à qua pondus, figuramque debitam, juxta impressum sibi signum,*

gnum, accipit. Denum moneta sic perfecta, in receptaculum, ad id exstructum dilabitur, ubi is, cui eiusdem colligendi, & custodiendi munus incumbit, paratum nummum offendit. Quis non *ligneam* Dædali *Venerem* miretur, quæ circumactis oculis, spectantes contemplari videbatur, pedibus huc & illuc moveri, & adeo scitè *mulieris* actiones æmulari, ut ab omnibus vivere, ingredi, egredique putaretur. Et tamen nemo est, qui ad hæc omnia peragenda, *Animam*, aut Cognitionem in talibus machinis requiri existimet, & non ultrò fateatur, huiusmodi operationes, à partium figura ordine, certa-que magnitudine proficisci. Quidni igitur idem de Animalibus sentimus, cum omnes eorum partes ita aptari, connectique possint, ut eadem prorsus Sanguinis *circuitio*, idem spirituum impetus vigeat, qualem in *vivo Cane*prehendimus. Quum varii illi motus, in Automatis, humana industria fabricatis, ope quarundam rotularum, aliorumve instrumentorum eduntur, quæ paucissima sunt, si cum infinita propemodum multitudine *ossium, musculorum, nervorum, articularum, venarum*, aliarumque partium Organicarum conferantur, quæ in corpore cujuslibet Animalis inveniuntur: Ac proinde mirum non est, si huiusmodi machinamentum motus admirabiliores habeat, quam quodlibet aliud, quod arte humana fabricari possit.

Verum, ut similitudo inter *Automata*, artificis manibus constructa, & *Animalia* magis eluce-

elucescat, supponatur, quod Deus machinam, *Canis*, exempli causa, actiones & passiones exacte imitantem, inter alios Canes collocet; quibus indiciis verum Canem, cujus motus cum cognitione & proposito fieri existimantur, ab machina, cujus motus omnes & actiones, per solam organorum ejus dispositionem, obsectorumque impulsione, distinguere valebimus? *nullis* mecastor, & æquam utrique vim, parem solertiam, similemque agendi, movendi sentiendique facultatem assignabimus. Imò, ut res magis manifesta reddatur, examinetur, quod foret hominis judicium, qui in deserta Insula relegatus degeret & ab omnibus Animalibus, quæ *Bruta* vocamus, semomotus, nulla præter Homines, per totum vitæ curriculum, spectaret: quique mechanicis artibus addictus, Automatis conficiendis occuparetur: aut iis adesset, qui varia machinamenta, exempli causa, *Hominis, Equi, volucris, &c.* struerent. Supponatur deinde, quod Automata illa non modo gradirentur, comederent, & respirarent; sed etiam omnes Animantium motus ita imitarentur, ut perfectum eorum speciem referrent, adeo ut, ad percutientis ictum, clamorem ederent, strepitu oborto, se in pedes conjicerent, accederent, dum vocarentur, uno verbo, ea omnia agerent, quæ Homines solent, dum passionibus corripuntur, & in motus varios se contorquent. Indubie vir ille, omni semota animi ambiguitate, tales machinas vera esse Animalia arbitraretur,

37.

Comparatio

Canis & Automatis

cum Automatis

artibus fabricatis

iii.

iii.

tur, & vivere, sicut nos, moveri, agere, appetere, sentire, cognoscere. Quemadmodum *Chinensium* ille princeps, conspectum primo portatile *horologium*, non solum vita, verum etiam sensu ac ratione instructum esse ducebat, ob motuum, quos in eo deprehendebat, constantiam: donec illius adapertio, & rotarum denuo ad motum applicatio, artificium detexit, & illum à concepto errore revocavit.

38.

Eorū error,
qui ex ex-
terna mem-
brorum for-
ma in Bru-
tia judicant
ut nos co-
gnitione uti.

Hinc videre licet, quam crassus sit eorum error, qui animadvertentes Brutorum membra, in forma externa à nostris non dissentire, & eorum motus nostris motibus esse similes; illicò statuunt, commune utrorumque esse principium, ac proindè sicuti in nobis est *Anima*, quæ hos effectus producit, quæque & corpori motum impertit, & cogitandi facultate pollet; Ita in Animalibus Animam reperiri debere, quæ similia munera exequitur, sive, quæ eorum membra agitat, & cognitionis eorum est *principium*. Enimvero, dubitari nequit, quin magna, inter plurimas Animalium actiones, affinitas intercedat, quæ nobis ab ineunte ætate, occasionem judicandi præbuerunt, illa pari modo, ac nos, actiones suas exerere, & Animæ opera, passionem habere, sibi congrua appetere, odisse adversa, certis objectorum imaginibus delectari, aliorum autem speciem horrescere. Sed revera, si rem ad amussim perpendamus, indagemusque, quid illud sit, quod Animalium functionum principium facimus, facile liquebit, nos mero infantie præjudicio duci, & non

& non nisi à natura fuisse hac opinione preoccupatos. Quoniam si hujusmodi machinamenta oculis nostris proponerentur, nulla in eis Rationis vestigia agnosceremus, quanquam *Canis*, exempli causa, aut *Equi* speciem referrent, & omnium eorum actiones imitarentur: ac proinde censendum est Animalia vere Automata esse, & omni Cognitione, ac Sensu destituta.

Quidni, inquires, idem de *machinis*, corporum nostrorum imaginem referentibus, statuamus judicium? cum illæ actiones humanas quoque imitarentur, & motus nostris simillimos ederent, ac proinde sicut inferimus, machinas Animantibus similes Cognitione carere; quoniam easdem in Automatibus, ad eorum speciem effictis, similes actiones intneremur, ad eundem modum concludendum foret: Homines quoque Cognitione esse destitutos, quoniam motus prorsus iis similes in machinamentis, quantum ad externam figuram, organaque omnia in simiis spectamus, quæ in veris Hominiibus deprehenduntur.

Ad id Respondeo, quantumvis illa Automata Hominum figuram exhibeant, & actiones nostras, quantum moraliter fieri potest, æmulentur: duobus modis, à veris Hominiibus posse adhuc dignosci. Quorum *primus* est, quod illa, nunquam *loquendi facultate* forent prædita, ut verbis, aut signis, Cogitationes suas manifestarent, & ad ea, de quibus interrogarentur, apposite responderent; Uti inter

39.

*Quid inter
Homines &
Bruta in-
tercedat.*

lo-

loquendum homines solent, qui certis signis, mentem suam aliis aperiunt, & Cordis sui arcana detegunt. Nam licet machinam eo artificio fabricatam imaginari possumus, quæ *vocabula* aliqua efferat, imo etiam enuntiet, quæ obiectorum præsentia, externa ipsius organa moventium ad amussim respondeant; ut si in aliqua ejus parte percutiatur, quid nobis *placeat*, efflagitet: si in altera, leviori manu tangatur, nos illi *blandiri* dicat, & id genus similia: Nunquam tamen, ut vocabula ita proprio Marte adaptet, ad iis omnibus congrue respondendum, quæ coram ipsa proferentur: Quemadmodum Homines quantumvis ingenio hebetes, atque etiam mente *capios* facere cottidiè experimur. *Alter modus* est, quod, etsi talium machinarum motus ordinati sint, & sapientissimorum etiam Hominum motus certitudine superent, in plurimis tamen rebus aberrant, & à nobis maxime deviant, in quibus imitari nos maxime deberent. Ex quibus manifestum fieret, hujusmodi machinas non à ratione duci, non cognitione imbui: sed ex sola organorum suorum dispositione ad hæc agenda impelli. Homines autem, quantumcunque *stupidi*, imo etiam amentes, ac insani, voces diversas aptè construere valent, atque ex iis orationem componere, qua Cogitationes suas patefaciant, & quod animo moliantur, indicent. E diverso nullum Animal reperitur adeo perfectum, tamque faventi fidere natum, quod ad eam intelligentiam accedat, & simile quicquam exequatur. Quod Bestiis contingit,

tingit, non organorum imbecillitate, non partium defectu, non voces efformandi impotentia, cum videamus *picas*, & *psittacos* loquaces esse, & humanos promere sonos: non tamen sicut nos loqui queunt, hoc est, adeo ut quædam verba proferendo, eorum responsa nostris interrogationibus quadrent, & nobis manifestent se intelligere, quod proferunt. Cum nihilominus usu cottidiano appareat, Homines à nativitate *surdos* & *mutos*, (qui indubie intuitu organorum, Animalibus cedunt) signis tamen, eodem modò quo nos, uti; imò quædam propria industria invenire, quibus conceptus suos divulgant, & quod in animo habent, iis, cum quibus conversantur, patefaciant. Quod cum idem facere Bruta Animantia nequeant, manifestum est, non minori tantùm cognitionis vi, quàm Homines pollere; sed Rationis prorsus esse *expertia*, non humana tantùm cognitione carere, sed quacunque alia, quæ fingi potest, esse destituta; uno verbo *Automata* esse, & non delectu, sed mero *impetu* agere. Hinc videre licet, quàm vana sit nonnullorum Indiæ orientalis populorum opinio, existimantium *Simias*, & *Cercopithecos*, qui apud eos in magno sunt numero, intellectu valere, atque etiam loqui posse, sed nolle, ne ab *Hispanis* occupentur, & ad laborem, operasque adigantur.

Quod vero nulla *cognitione* Animalia imbuta sint, facile potest demonstrari: nam si per aliqua signa cognitionem suam nobis indicare possent, id necessariò per *loquelam* efficere deberent.

40.

*Bruta nullis signis possunt cognitiones suas de-
gere.*

berent, aut per alias aliquas notas, ad obvia quævis accommodatas, vocis nimirum suæ variationes, aut alias aliquas corporis sui actiones determinando, ut cogitationum suarum essent signa, & talia quidem signa, quæ non tantum naturalia, sed ex *instituto* significarent: Cum vero talia in Brutis Animantibus non deprehendamus, & naturalia dumtaxat suarum passionum in illis observemus, imò moralia, & ex *instituto* reperiri in ipsis nequeant, intrepide concludendum est, Bestias nulla Cogitandi facultate pollere. Rationes autem, quæ me adigunt ad asserendum, nulla ex *instituto* signa in Animalibus reperiri, duæ sunt præcipuæ. *Prima*, quoniam signa ex *instituto*, quum à solo rei cogitantis arbitratu dependeant, & efficaciam suam ab ejus Voluntate mutuentur, moraliter impossibile videtur, quod ea varia non sint, pro diversitate *locorum, temporum personarum*, apud quas usurpantur; quia nimirum rei cogitantis cognitiones, & scopi, nullam necessariam connexionem habent, cum actionibus, quibus sociantur. *Secunda* est, quod si *Gallinæ*, exempli causa, *clamor*, milvo ejus pullis insidias instruente; aut cujusvis alterius Animalis ejulatus, ex *instituto* plane essent, impossibile foret, ut *pulli*, aut catuli hujusmodi sonos unquam intelligerent, quandoquidem ad placitum ederentur, & pro bestiarum arbitrio fierent. Nam quamvis *Hirundinum pulli*, quorum meminit *Gassendus*, audito, nescio quo parentum gannitu, illicò avolarunt, & arbore relicta, parentum

vestigia sunt secutæ. Ibat siquidem Vir clarissimus, via publica solus, cum transiens sub ilicis ramo satis humili, tres hirundinis pullos animadvertit, recens eductos, cui insidentes illo prætereunte, non avolarunt: quare reversus, ac tertio subtransiens, manu in eas intentus, ut comprehenderet, immobiles nihilominus permanserunt, nullo signo, se fugam parare, exhibito; verum ubi duæ majores hirundines supervenire, & nescio quod *murmur* obtrudere, dicto citius aufugerunt, & perpete penna se in auras tulere. Si obgannicus ille ex *instinctu* fuit, quomodo eum statim pulli, nuperrime etiam nati, dignoscere potuerunt? Quo magistro didicere, se à parentibus increpari, admoneri que, ut Hominem tanquam *inimicum*, & sibi insidiantem fugerent? Imò, quod omnem fidem superat, quo pacto, ut ex ovis erupere pulli, & ex Matribus orta Animantia, similes edunt sonos, & parentum, si ita dicere liceat, sermonem imitantur? Hæc satis indicant, ingenitas esse hujusmodi voces, & à natura habere, quod certis *signis* suos affectus significant & prodant.

Hinc viderelicet, ut præmonui, quam graviter decipiantur, sibi que imponant, qui ex eo, quod in Belluis motus humanis similes animadvertant, & organa in ipsis, ac in nobis similia, contemplantur; imaginantur, motuum illorum idem esse principium, & sicut in nobis ab Anima proficiuntur, ita & in Bestiis animam similem debere assignari, à qua eorum motus pendeant. Sed nos animadvertentes duo in no-

41.

Duo sunt in
Homine.
motuum
principia,
mechanicum,
& spirituale.

bis reperiri motuum nostrorum principia, *Mechanicum* scilicet unum, & corporeum, quod à sola organorum dispositione, & continuo spirituum Animalium affluxu pendet; cuiq; *Animæ corporea* nomen attribui potest; quippe Animæ sensitivæ essentia in vi motrice dumtaxat consistit. Aliud *spirituale*, & incorporeum, nimirum Mentem, seu Animam illam, quam, in præcedentibus, Substantiam cogitantem definivimus, eo quod tota ejus natura, ac indoles, in cogitatione posita est. Statuimus omnes motus, qui tam in nobis, quàm in Animalibus deprehenduntur, à principio *Mechanico*, & corporeo manere posse, ac proinde nullam urgere necessitatem, Animam in Brutis effingendi, præter spirituum vim, ac membrorum conformationem,

42.

Omnes motus in Animalibus per principium mechanicum explicantur.

Res evidentius patebit, si breviter, & quasi per transennam, ostendamus, omnes motus in Homine *mechanicè* fieri, hoc est, sine Animæ impulsu: sed sola organorum, & instrumentorum ope, quales in Machina peragi possent. Quod ut feliciter exequamur, & ordinem debitum servemus, à motu sanguinis exordiendum esse videtur, quoniam ab ejus circuitu Animalis vita pendet, & eo cessante extinguitur.

43.

Motus cordis sine animæ auxilio peragitur.

Supponendum est igitur, secundum Illustrissimum *Cartesium*, in Corde, parte scilicet Animalis principe, quendam ignem esse, non lucidum, ejusque non absimilem, qui in aqua forti, injecta pulveris chalybei satis magna copia, excitatur; nec non illius, qui in *fermentationibus* animad-

animadvertitur. Vel ut nonnullis recentioribus placet, calorem quendam in corde sanguinis ope excitari, haud multum ab eo abhorrentem, qui ex olei tartari, & olei vitrioli mistura oritur, Sed à quacumque causa ille cordis calor proficiscatur, seu à *calido admoto*, seu à *salinis corrosivis* invicem, vel sulphureis commissis, in se mutuo agentibus: aut denique à *Sanguine* per illud continuo gyran- te; certum est, debere Sanguinem fervore impregnatum dilatari, & locum ampliorem affectare. Caloris enim natura in *motu* sita est, eique maxime competit, corpora, in quibus dominatur, *expandere*, & eorum molem partium divisione augere. Ut in *lacte*, *oleo*, aliisque *liquoribus* manifestum est; qui Igni oppositi sensim turgescunt, & concepto fervore ampliantur. Quare quum latenti illo igne, sanguis, quo cordis cavitates oppletæ sunt, dilatetur, & majus spatium occupare debeat, ex cavitate dextra in venam *arteriosam*, & è læva in *magnam arteriam* transmigrare necessum est. quoniam hæc duo vasa semper cruore repleta sunt, & eorum orificia, quæ *Cor* spectant, tunc obturata esse non possunt. Hac evacuatione facta, non ob id cordis motus propterea desinit, quia sanguis, qui in utroque cordis ventriculo rarefactus fuerat, per *venam arteriosam*, & *Aortam*, erupit, id exiguum sanguinis, qui tunc in istis cavitatibus remanet, & is qui novus, in eas cordis auriculas delabitur, ad instar prædictorum liquorum se habent, quorum unus fermenti vices subit, ad alterum nempe di-

latandum, & calcificandum. Et id solum est, quod *Cordi* motum tribuit, efficitque, ut indefinenter fluat, & in universum corpus citissime diffundatur.

44.

Eadem operatione mechanica

Sanguis per unum & eundem corpus circulator.

Verum, ut facilius concipere valeamus, quo pacto, hic *motus* perseveret, & sanguis è corde in arterias, & ab iis in venas, quamdiu vivimus, devehatur, imaginari debemus, quod quotiescumque vena arteriosa Sanguinem recipit, jam tam in dextro cordis ventriculo dilatatum, is ipse Sanguis alium propellit, quo repletus erat, atque efficit, ut magna ejus parte se exoneret, eumque in arteriam venosam transmittat, in quam non modò per *anastomoses* illas, quæ oculis cernuntur, defluit, sed per infinita alia spiracula, quæ in extremitatibus ramorum venæ arteriosæ sunt, quæque cum extremitatibus ramulorum arteriæ venosæ copulantur. Idem imaginandum est, quod quoties cumque *Aorta* sanguinem, qui nuperrimè in sinistra Cordis cavitate se dilatavit, haurit; is Sanguis alium in illa cavitate contentum protulit, cogitque, ut eo onere se liberet, eumque in ramos Venæ Cavæ abigendo, in quam penetrat, non per sensibiles dumtaxat *anastomoses*, sed & per innumeros alios meatus, qui oculos nostros fugiunt. Ex tali vasorum, quæ Sanguinem continent, dispositione necessariò sequitur, totam Sanguinis massam universum corpus circumfluere, & ad *Cor*, è quo, ceu è fonte primo profluxerat, iterum atque iterum reversus, in orbem perpetuò agitari. Sunt enim Arteriæ & Venæ

Venæ Corporis, instar *Rivorum*, per quos Sanguis indefinenter manat, & quidem citissime, ex Venis scilicet in arterias, per Cordis ventriculos traductus; ut in Animalibus adhuc spirantibus sit manifestum. Quippe *secta Arteria* totus Sanguis effluit, sensimque venæ laxantur, exhausto nimirum liquore, quo antea turgabant. Sanguis igitur à Corporis extremis, versus Cor impulsus, per venam Cavam, dextrum Cordis thalamum transfluit, tum in Arteriam magnam exprimitur, quæ illum tam sursum, quam deorsum, & ad latera, in Arterias majores, deinde in minores, ac in ipsam subinde carnis substantiam adigit. Quippe Arteriæ magnæ *rami*, per totum Corpus sparsi, Venæ Cavæ ramis connexi sunt, qui denuò eundem sanguinem in dextrum Cordis ventriculum deferunt, ut novam tibi circuitionem exordiat.

Ab hoc perenni Sanguinis circuitu Cordis & Arteriarum pulsus dependet; Quia quum hæc duo aliud non sint, quam alterationis quædam species, qua alternis vicibus peragitur, eaque mensura, ut *Arteriarum* pulsus *Cordis* pulsibus respondeant, facile conjici potest, eos motus ab eodem principio procedere, ac proinde id principium aliud non esse, quam ipsam Alterationem, quam Sanguis in Corde subit. Rationi igitur maximè consentaneum est, credere, quod quotiescumque aliqua Sanguinis portio, in binas *Cordis* cavitates decidit, se cum alia ejus portione, quæ ibi mansit, misceat, quæ intimos ventriculorum cordis recessus replens

45.

Unde oriatur cordis & arteriarum pulsus.

novum ibi caloris gradum, & quandam veluti fermenti naturam, ut dictum est, adipiscitur. Quo fit, ut cordis substantia se dilatare, & extendere cogatur. Majore postmodum sanguinis portione, quæ in iis cavitatibus includebatur, per Aortam, & Venam Arteriosam erumpente, Cor subsidit, & in longitudinem porrigitur. Et in hac perpetua *figura* Cordis mutatione, motus ejus consistit. Ejus *Diaſtole*, dum intrâ ejus ventriculos, sanguine rarefacto, mucro versus basim adducitur; *Systole* verò, dum Sanguine expulso, Cor detumescit, ac sese explicat. Nam aliud non sunt *Diaſtole*, & *Systole* Cordis, quam ejus intumescencia, & subsidencia, dum nimirum protruso per vices sanguine, alternatim intumescit, & deprimitur.

46.

*A motu
Cordis pen-
des arteria-
rum pulsus.*

Arteriarum *pulsus* Cordis motum sequitur, atque in hoc potissimum consistit; quod à Sanguine in Corde dilatato & presso, & per earum tunicas vibrante, inflantur: Ut in Animalis adhuc spirantis, præsertim fatiſcentis thorace aperto, experiri licet. Quippe eo temporis puncto, quo digitus Arteriæ ad motum impellitur, mucro Cordis ad basim adducitur, & flaccida ejus latera, quæ dextras & sinistras costas spectant, versus *mediastinum* Cordis parietem attoluntur, & Cordis latus, quod *Sternum* versus dirigitur, totum, præsertim ad basim erigitur: atq; ita ad sensum Cor inflatur, tenditur, pectus concutit, & quem sentimus pulsum, procreat. *Detumescunt* autem Arteriæ, dum Sanguinis vis remittitur, amissa nimirum aliqua agitationis suæ

suæ parte ; quoniam tunc sponte Arteriæ decidunt. & ad statum pristinum revertuntur. Quod non visu modo, sed & tactu, in spirantis Animalis pectore, & præcipuè affatim dehiscentis, discernere licet, nam ipso temporis momento, quo *Arteria* ab impulsu cessat, apparet Cordis latus, *sternum* respiciens, subsidere, & collabi, ac totam ejus substantiam mollem, & flaccidam evadere, Ex quo clare deducitur, Cordis, & Arteriarum motus ministram esse Sanguinis *circulationem*, atque hunc motum reiterari, quoties novus Sanguis *Cor ingreditur*, atque variari, pro qualitatum diversitate in sanguine reperiatarum, quæ illum promptioris, aut magis lentæ dilatationis susceptivum efficiunt.

Si à principio mechanico Animalis *vita* pendeat, si Cordis *motus*, si Arteriarum *pulsationes*, si Sanguinis *fluxus*, si ejusdem per universum corpus *rotatio*, à corporali & mechanica dumtaxat causa procedunt, nulloque Animæ interventu peraguntur ; Quidni & cæteri alii motus, exempli causa, *Ciberum coctio*, *Nutritio*, *Respiratio*, & similes eidem principio assignentur, quum videamus hæc omnia, otiantibus nobis, & impeditis per somnum Animæ functionibus fieri. nullamque immaterialem causam, in suum auxilium adsciscere. Enimvero quid mentis, quid substantiæ spiritualis, in *Chylosi*, & *Chymosi*, sive in prima, & secunda alimenti coctione intervenit ? Quid in cibo in chylum converso contingit, quod membrorum conformatione perfici non queat ? *Cibus* bene mansus, & sali-

47.

*Uti Vita
Animalis,
ita & Cibo-
rum coctio à
principio
dumtaxat
corporeo
pendet.*

va maceratus, in stomachum trajicitur, cujus opera? non alterius profectò, quam linguæ, & *Oesophagi*, quorum prior cibum aliquandiu in ore versarum, veluti ventriculi manus, *Oesophagi* ori admoveat, & vi quadam ingerit. Posterior autem, suis fibris auxiliantibus, repentis *lumbrici* ritu, se contrahens, ingestam materiam sorbet, & introrsum adducit. Verum, quia non nisi leviter cibus dentibus teritur, & alia in ventriculo cibi dissolutio fieri debet, ut in chylum abeat, liquor quidam *acidus* & mordax ex arteriis effluit, & in ventriculum delabitur, qui inceptum in ore opus peragat. Cum enim plures sint Arteriarum rami, in interiorem ventriculi superficiem desinentes, magna humoris prædicti copia per illas distillat, quæ *saliva*, quæ macerati sunt cibi, admixtus, eorum digestionem juvat, imò & illam perficit. Est enim is liquor veluti quædam aquæ fortis species, quæ inter ciborum comestorum particulas irrepens eorum dissolutioni auxiliatur, atque ex iis chylum componit. Cibi, hoc modo digesti, ad intestina delabuntur, ubi *chymosis*, & *hamatosis*, sive secunda, & tertia coctio dici possunt celebrari. Quia *Fel*, quod in illa defluit, quodq; cibi colorem impertit, quam primum è ventriculo egrediuntur, ultimam, ut ita dicam, manum apponit, & ad perfectionem ducit, quod à præcedentibus liquoribus dumtaxat erat inchoatum.

48.

Quomodo
sanguifica-
tio fiat in
corpore ani-
malis.

Cibus sic in *chylum* dissolutus, ubi in intestinis leniter gradatimque defluxit, foras exprimitur, atque per venas lacteas promovetur, quæ

quæ exilibus quidem, sed innumeris propemodum ductibus excurrentes, albicantem liquorem excipiunt, eumque in conceptaculum, *Pecquetianum* dictum (quoniam illud à se inventum gloriatur D. Joannes Pecquetus in libello, quem hac de re scripsit) deferunt, ex quo receptaculo, alii ductus chyliiferi emergunt, qui sursum per pectus ipsum, recta via pergentes, ad *subclavios* Venæ Cavæ ramos, illum traducunt. Unde chylus, eo loci in decurrentem sanguinem infusus, eidemque probe commixtus, per venam *Cavam*, tam superiorein, quam inferiorein, cor ingreditur, ubi per fermentaceam effervescentiam, à Cordis calore peculiariter ibi excitatam, colorem suum mutat, & alium nempe rubrum adipiscitur. Unde apparet, quam falso sibi persuaserint veteres, Sanguinem in *Hepate* fieri, & chylum per venas *Mesenteris* *Mesaraicas*, mox in venam portæ, & ex ea in cavum Hepatis deferri, ubi peculiariter fermentetur, & ut *Chymici* loquuntur, digeratur, à bile admixta sejungatur, & in *chylum* rubrum evadat. Quandoquidem nulla prorsus chyli portio ad *Hepar* perveniat, ut ab eo queat in sanguinem immutari. Quomodo enim fieri potest, ut Hepar Sanguinem procreet, aut ruborem *Chylo* inferat, cum ne quidem minima chyli pars ad ipsum usquam deferatur, & per ramos *subclavios*, & ab eis per brevissimum cavæ truncum in Cor, innumeris Animalium dissectionibus ostendatur infundi.

Hæc

49.

Ope sanguinis per totum corpus currentis fit Animalis nutritio.

Hæc præter mentem, è calamo elapsa sunt, quum mihi animus hoc in scripto, dumtaxat fuerit paucis verbis. Animalis *Oeconomiam* describere, ac manifestare omnes Corporis functiones posse *mechanicè* explicari. Sanguinis igitur semitam teneamus, feramurque, quo ejus profluvio impellimur. Sanguine in Corde rarefacto, & cum impetu in Arterias egesto, fieri non potest, quin plurimæ ejus particulæ in membris subsistant, ad quas accedunt, ibique aliquarum partium *locum* occupent, quas inde expellunt, & secundum figuram, aut situm, aut exilitatem pororum, quos offendunt, quasdam potius in certa loca confluere, quam alias: modo non absimili, quo fieri solent quædam cribra, quæ per hoc unum, quod diversis foraminibus sunt pertusa, variis *frumenti* speciebus, à se invicem separandis inserviunt. Aut quemadmodum eadem pluvia varii generis plantæ se adaptat, & in *sinapi* arescit, amarescit in *Ruta*, dulcescit in *glycyrrhiza*: Ita Sanguis per universum corpus delatus, in uniuscujusque partis substantiam sese transmutat, & secundum diversos earum meatus dispensatur, atque per arctam quandam unionem agglutinatur. Dixi, Sanguinis particulas, in *membris*, ad quæ accedunt, subsistere, atque aliarum *locum*, quas eo expellunt, occupare. Quoniam ambigi nequit, ipsa experientia teste, quin continua fiat insensibilium particularum, per corporis meatus transpiratio, & nonnullæ quasi mortuæ fierent, foras eli-

eliminari. Nam si rem putemus, ait celebris Glissonius de anatom. Hepatos, altero fere tanto amplius expiramus quàm inspiramus: spiritusque aliquoties in speculum illico, nubecula statim roris instar, oboritur. Atque ad aliarum partium exhalationem quòd attinet; Si calidioris pollicis interiorem partem, prope argentum, aut stannum expolitum admoveris: halitus inde emigrans, Metallum illico inficiet. Cogitanti verò, idem à reliquis quoque omnibus corporis partibus, idque singulis momentis fieri: Haud multum profecto absotus videbitur *Sanctorii* calculus; qui observationibus ad trutinam factis, se deprehendisse affirmat, eorum, quæ comedimus, & haurimus, plusquam dimidium per insensiles halitus absumi. Imò & tantum alimenti per latentes curis Meatus, in unica die evacuari, quantum per alvum in quindecim.

Simili facilitate *Respiratio* per idem principium explicari potest. Quippe thorace, musculorum ope, ac præsertim *diaphragmatis*, seu septi intermedi motu dilatato, pulmones ampliantur, vel contrahuntur, hocque modo aërem hauriunt, mox illum vaporibus admixtis expellunt, & amandant. Est enim *Diaphragma*, Musculus quidam, Pectus à Ventre interiori dividens, singularis indolis, ac fabricæ, tum ad seipsum movendum, tum ad costarum cartilagine, quibus adhæret, impellendas maxime idoneus. Unde illo se deorsum porrigente, necessum est, quod Aër pulmones per *Tracheam*

50.
*Respiratio
mechanice
etiam per-
agitur.*

cheam, sive asperam arteriam subeat, & *Inspiration* peragatur. *Diaphragmate* vero sursum ascendente, & pristinum situm repetente, thorax contrahitur, pulmones premuntur, & auram contentam per eandem *asperam* expriment; & id est, quod *Expiratio* appellatur. Non vero cum Nonnullis imaginandum est, in Inspiratione, Aërem in pectus, ob *vacui metum* ingredi, aut sponte, nulloque cogente, in illud penetrare. Hujusmodi enim attractio, vel ingressus spontaneus, merum figmentum est; quum corporum motus, non nisi per pulsionem fieri queat. Adducitur igitur Aër externus in pulmones, non aliam ob causam, nisi quia thoracis cavitas ampliatur, & vi pectus intrare cogitur. Quia cum vicinus aër, pectore explicato, propellitur, & ob suam crassitiem, non satis copiose ac celeriter illud subire possit, neque ob subtilem materiam, illum intercurrentem atque dilatantem, condensari, consequense est, ut in *thoracem* per tracheam adigatur; Uti in *folli*s ventilatione fieri cottidie cernimus, ubi Aër in ejus cavitatem, dum expanduntur latera, propellitur. Est igitur *Diaphragma*, inter omnes partes Respirationi inservientes, *primum movens*, & à quo, velut à fonte, omnium earum partium motus oritur, & pendet. Ad quod credendum, hac ratione maxime excitor, (quanquam plures alias non minoris momenti adferre possim,) Quod in thorace aperto statim pulmonum *iobi* subsidant, & ab omni motu per aliquantulum

temporis feriantur, dum Diaphragma nihilominus suum motum non intermittit, sed ita reditq; sursum ac deorsum, attrahitque, ut loquitur *Gassendus*, & movet simul cartilagineas, extremasq; spuriarum costarum, quibuscum cohæret; fitque ex eo, ut Aer attrahatur per vulnus in capacitatem pectoris. Nihilq; mirum, si, referente eodem authore, attracta fuerit aliquando candela, vulnusque penetraverit. Nam cum *Bontanus* Chirurgus empyema Diaphragmati vicinum curaret, & ex putri educendo, introspeciendoque, vulneris labia in pectus penetrantis diduceret, jussu tumulo, *cereæ candele* frustulum admove, Aerem per vulnus sic fuisse attractum, ut detenta negligentius candela, & abrepta, & absorpta fuerit, & post gravia quædam intra octiduum *symptomata*, ore cum nisu expectorata. Adeo ut videre licet, ad Respirationem naturalem, quæ nobis, aut dormientibus, aut non advertentibus fit, unicuique Diaphragma conferre, & musculos omnes, seu *Abdominis*, seu alios, nihil aliud quam ejus motui obsequi. Quanquam ad Respirationem *violentam*, & non naturalem, seu quam pro arbitrio acceleramus, retardamus, inhibemus, intendimus, remittimus, aliud præter Diaphragma conferat: Quoniam organa voluntarii motus, musculi sunt, idcirco facere tum ipsum Diaphragma, quatenus species est musculi, tum musculos alios, quatenus trahunt, diducunt, premunt, urgentque partes varias, quibus Diaphragma illigatum est, aut contingunt.

51.
Quid spiri-
tus Anima-
les sint, &
quibus par-
tibus mu-
sculus con-
stat.

guum, adeo ut pro illorum *motu* cogatur.

Præter præfatos Animalis motus, quorum origo, & causa in præcedentibus ostensa sunt; alius, *Muscularis* dictus, supererit explicandus; is nempe, qui *spiritum* animalium influxu peragitur, & ab eorum actione omnino pender. Ut id verò clariùs, faciliusque exequamur, supponendum est *primo*, spirituum animalium nomine, nihil aliud intelligi, quam *vivaciores*, atque defæcatiores sanguinis partes, quæ per arteriarum *carotidum* ramos, veluti per *cribrum* percolatæ, se à crassioribus sejunxerunt, atque deinde in cerebri vasa delatæ sunt, è quibus per nervos, in musculos omnes diffunduntur. Quare autem Sanguinis partes, quas calor in Corde rarefecit, ad Cerebrum potius, quam aliò contendant, alia non est, quàm quod Arteriæ, quæ eas illuc deferunt, rectissima omnium linea, à Corde procedant, & in Cerebrum citra ullam declinationem adigantur. Secundum autem mechanices regulas, quæ eadem sunt, ac *regula* naturæ, cum Res variz ad locum eundem tendunt, ubi sat spatij non est, ad omnes recipiendum, quia viæ valde exiguz sunt, ut in Cerebri *poris* contingit, subtiliores, & magis agitatæ, solæ Cerebrum penetrant, reliquis sese, per omnes corporis partes diffundentibus. Undè quæ Cerebrum subeunt, veluti venti subtilissimi, aut flammæ purissimæ existimantur. Supponendum est *secundo*, musculum non solum *carneum* esse, hoc est substantiæ raræ, & quodammodo spon-

spongiolæ, ad spiritus animales facilius recipiendos, sed etiam nervum, ligamen, tendinem, membranam, arteriam, ac venam complecti. Musculus enim *nervo* constat, veluti quodam canali, per quem è cerebro, medullaque spinali, spiritus animales in eum deducuntur. Constat *ligamine*, quo firmior reddatur, & membris incumben- tibus resistere valeat, atque motus suos liberius exercere. *Tendine* constat, præsertim, qui validum, ac vehementem edit motum, ad motum suum promptè efficiendum, & actiones suas fortius regulandas. Constat *membrana*, ne prædictæ organi motorii partes, integumento orbatæ, corporum externorum injuriis obiciantur, & ne animales spiritus, in ejus substantiam deducti, per transpirationem dissipentur, & avolent. Constat *venis & arteriis*, ut per eas ei alimentum, calorque vitalis suppeditetur, cujus influxu, cuncta corporis membra vivificentur, & corroborantur.

Veteres Anatomici Musculi fabricam, secundum *Caput, Caudam, & Ventrem*, descriperant, accipientes pro *Capite* Musculi, extremitatem parti, ad quam fit contractio, connexam. Pro *Cauda* musculi, finem, seu portionem, parti movendæ insertam. Pro *Ventre* denique partem Musculi intermediam, quæ carni- um mole tumidior conspicitur. Hæc addidi, ut facilius musculus simplex à composito discernatur, & quod discrimen inter geminos ac pares, ut loquitur *Riolanus*, & pares ac solitarios interesse innotescat. Est igitur Musculus, ut Clarissimus

52.

Quid musculus, & cur veteres illum in caput, caudam, & ventrem distinxerunt.

VVillis ex Doctissimo *Stenone* annotavit, vel *simplex*, qui unico ventre, & binis tendinibus constat, cujusmodi plures in brachio, & crure, qui sunt digitorum motores, quin & ferè ubiq; passim in aliis corporis partibus prostant. Vel *Compositus*, qui plures habet ventres, quorum singulis duo tendines oppositi appenduntur; ita tamen, ut cum ipsi tendines compositi scilicet duo simul conjuncti fuerint, unus *tendo compositus* medias carnes ingrediatur, ac alter *medias* utrinque amplectatur carnes. Hoc in musculo *massetere*, *deltoide*, & quibusdam aliis evidentissimè cernitur, in quibus omnibus pariter, ac in musculo simplici, duæ fibræ carnes (ad quas solas potentia motiva spectat) contrahuntur, anguli oppositi, juxta tendinum insertiones, ampliantur, proindeque ventres breviores, simulque crassiores facti intumescunt.

53.

Motus muscularis, fit opera spirituum animalium.

His itaque obiter explicatis, dicimus *motum Musculorum* in genere fieri, dum spiritus animales celerrimè moti, ac instar partium flammæ ex face exeuntis, Nervorum ductu in Musculum adducti, ibidemque velut in promptuariis idoneis copiosè reconditi, ac sua agilitate se dilatantes, fibras carneas insiliunt, ac inflant. Quia tunc spiritibus turgens Musculus contrahitur, & secundum latitudinem expanditur, ac partem, cui inseritur, versus ipsius musculi *caput* adducit. Ubi vero spiritus alium in locum recesserint, finitur contractio, & musculus antea contractior, fit longior, & pristinae suæ positioni redditur. Sola igitur membrorum omnium

omnium motuum, qui in Animali fiunt, causa est, quod quidam musculi manantibus spiritibus contrahantur, & qui iis ex adverso respondent, eorundem spirituum abscessu, dilatentur, & extendantur.

Si vero rôges, cur hic Musculus potius contrahatur, quam qui illi opponuntur, & hujus fibræ omnes carneæ, corrugatæ, tumidiores, & asperiores fiant, quam alterius? Respondeo id per hoc contingere, quod paulo plures spiritus ad eum confluant, quam ad alium, ac proinde eum brevior, imò crassior, & latior reddunt. Non quod spiritus, qui immediatè ex Cerebro proveniunt, ad movendos hos musculos sufficiant, sed quia alios spiritus determinans, qui jam in duobus his musculis sunt, ad celeritè egrediendum ex uno eorum, & in alium transeundum, Qua ratione, is ex quo egrediuntur, fit longior & remissior, & ille, quem ingrediuntur, celeritè ab ipsis influxus contrahitur, & secum membrum, cui innectitur, trahit. Quod facile concipi potest, ut advertit Clarissimus *Cartesius*, modo sciatur, paucissimos spiritus animales esse, qui perpetuò ex Cerebro veniant, versus unumquemque musculum; sed esse semper plurimos alios inclusos in ipsissimo musculo, qui in eo celeritè moventur: quandoque solum in circulum se movendo, in loco, in quo sunt, nimirum cum nullas vias apertas, per quas exeant, reperiunt, & aliquando fluendo in musculum oppositum; quia parvi hiatus sunt in unoquoque horum muscu-

54.
Quomodo,
fit, ut uno
musculo
contracto,
alius dilan-
setur, aut à
contra.

lorum, per quos isti spiritus fluere possunt, ex uno in alium, & qui sic dispositi sunt, & cum spiritus, qui veniunt ex Cerebro, versus unum ex illis, habent paulo majorem vim illis, qui versus alterum eunt, aperiant omnia orificia illa, per quæ spiritus hujus, possunt transire in alium; Qua ratione omnes spiritus antea contenti in his duobus musculis, confluunt celerrime in unum eorum; & sic inflant, & contrahunt eum, dum alter extenditur, & remittitur.

55.

Vis & efficacia spirituum animalium ad musculos movendos.

Quod vero spiritus animales hunc affectum præstent, evidentissimè ex eorum agilitate & mobilitate probatur; quandoquidem oculi nictu, universum corpus permeent, & veluti Animæ immaterialis naturam aliquo modo sortiti, in musculos citissimo impetu feruntur, figuræque mutationem in membra, momento inducunt. Hinc Galenus de motu musc. primo, capit. 13. *Est in cerebri ventriculis (ait) spiritus, Anima primum instrumentum, quo & Sensum, & motum per universas partes Anima transmittit.* Secundo, videmus in nobis, nullam vitæ actionem edi, nisi adhibita animalium spirituum opera; Hinc Homo spiritibus exhaustus, languet, & deficit. Hinc obstructo spiritibus ductu, *Apoplexia*, & *Paralysis*, imo *Epilepsia*, & *Vertigo* oriuntur. Hinc nimis intenso studio, caput debilitatur, magna; fit spirituum dissipatio: sicut & in vehementi passionis motu, eorundem perturbatio. *Tertio* spirituum animalium influxus luculenter in *limace*, vase vitreo inclusa, ad sensum decernitur, ut animadvertit D. Re-

gius.

gius. Quippe ubi illa prorepere incipit, mox spiritus alii atque alii, cum bullis conspicuis, à cauda ad corpus medium, & inde ad caput perpetuò propelluntur. Simul vero limax quiescit, mox bullarum à cauda ad caput fluentium motus etiam sistitur. Sed illa deinde rursus moveatur, mox etiam *bullarum* istarum conspicitur à cauda ad caput progressus. Videtur autem in limacis motu spirituum quædam fieri circulatio, ita ut illi à cauda per ventrem transeant ad caput, & à capite per tergum redeant ad caudam, inde rursus ad caput progressuri.

Si quis regerat, non videri tantum *roboris* spiritibus animalibus inesse, ut totam corporis molem agitare queant. Nam cum subtilissimæ sint Sanguinis partes, unde tanta vis tenui admodum materiæ accedere potest, ut Animalis non *crus* modo, aut *brachicum* agitet; sed totam machinam moveat, regat, attollat, transferat? Quis sibi persuadebit, quod *Tauri* aut *Elephantis* corpus à tam exili substantia propellatur, & ad velocem gressum, imo etiam tripudium disponatur, & excitetur? Respondeo, id minime videri nimirum debet, si spiritus animales ad instar purissimæ flammæ se habere meminerimus; cujus vis non minor in Animalis corpore elucet, quam in igne, ex *pulvere pyrio* excitato, aut intra tormentum bellicum incluso; quod licet ponderis sit tanti, retrorsum tamen adigitur, dum simul globus adeo gravis, ea vi perneciter antrorsum exploditur. Cum igitur Animal machina quædam sit, ac ejus omnes motus me-

56.

*Unde tanta
vis spiriti-
bus, ut to-
tum corpus
movere
queant.*

chanicè peragantur, ad modum aliarum machinarum, exempli causa, *vectis*, *libra*, *cunei*, *trochlea*, se habet, quibus, exigua vi adhibita, maxima moliri licet.

§7.

*Dua Vectis
species, quæ
analogiam
habent ad
organum mo-
tus Anima-
lium.*

Duæ enim sunt *vectis* species, inquit Doctissimus *Gassendus*, quæ quia chordis, funibusque onera attrahunt, ideo specialiore quendam analogiam ad organum motus Animalium habent; quippè cum is motus, & attractio sit, & per tendines, quasi chordas fiat. Eæ vero sunt *Trochlea*, qua notius nihil est, & *Tympanum*, seu *Peritrochium*, quod etiam familiare est, intelligiturque cum axe Cylindrove ipsi ad unum sui extremum infixo, & aliunde duobus fulcris sustentato, supra quæ circumvolvi possit, & sibi circuminducere chordam uno extremo sibi affixam, & alio onus attrahentem; possit, inquam, dum *Tympanum* per scytalas circum sibi infixas revolvitur; vocant etiam Latini machinam hanc *suculam*, nostri vulgo *Tornum*. An in *Trochlea* quidem *vectis* vicem gerit diameter orbiculi, quæ axiculo immobili, quasi hypomoclio, fulcimentove, seu vocatæ pressioni innixa, vim prementem habet in eo extremo, quo chorda ab attrahente pressa urget, & quia onus non aliâ extremo incumbit, sed extremæ chordæ illigatum est, efficitur, ut dum id extremum vi prementi cedit, ceu attollitur, ea quoque pars chordæ, cui appensum est onus, attollatur, & diameter alia, hoc est, *vectis* alius, aliusque continenter succedat, sicque attractio oneris fiat. In *Tympano* vero, *suculave*, manifestus *vectis* est quæ-

quælibet scytala, in cuius extremo vis incumbens à manu deducente est, & cum fulcimentum in ipso cylindro intelligatur, extremum aliud ad adversam cylindri partem intelligitur, cui quia onus non incumbit, sed funi-ductario appensum est, efficitur, ut dum illud cedit, funis cylindro circumvolvatur, & parte pendente brevius, pondus attollat, idque continuetur, scytalis, hoc est, vectibus continenter mutatis. Jam in Animali non observantur quidem trochleæ; sed vicem tamen illarum suppleant toridem quasi corrugationes, quibus tendines contrahuntur, musculique ipsi secundum longitudinem breviantur: Quippe ex iis fit quasi quædam trochlearum *series*, imitatione *polyspastorum*, quorum immensa prope est vis, non apparet etiam ulla circumductio, qua revolutus tendo brevietur, sed tamen vicem illius præstat ipsa tendinis in seipsam, opè spirituum animalium, contractio & quasi complicatio, ex qua proinde sequitur, ut pars attracta magis magisque versus muscoli principium accedat.

Ex hac vectis cum Animalis machina similitudine, & ex modo, quo corporis functiones supra fieri ostendimus, satis dilucide evincitur, nullam in Bestiis Animam requiri, ad Cordis, arteriarumque pulsus & ciborum *coctionem*, nutritionem, Respirationem, ac spirituum procreationem, sed citra ullam Cogitationem haberi, ac proinde instar Automatorum *pneumaticorum*, aut *hydraulicorum*, Animalium corporis partes de loco in locum moveri.

58.

Concluditur, Animalia mera esse automata.

E 4

Non

§9.

Unde oritur
motuum di-
versitas in
Animali-
bus, quum
Animâ ca-
rent.

Non obstat, quod *motus*, qui musculorum opera, spirituumque animalium influxu perficiuntur, varii sint, & non semper eodem modo in Animalibus excitentur: exempli causa, quod *Bestia* nunc ambulent, nunc cito, nunc tardo gradu procedant, quod hæc, quod illac se inflectant, &c. Quia ea motuum diversitas, non cognitionem in illis arguit, quasi quid moliantur, quid fugiant, aut prosequantur, intelligant: sed solum, quod ejus sint constitutionis, ac fabricæ, ut pori in eorum Cerebro, alio & alio modo aperiantur, & spiritus in varias fibras, nervos, musculos diversimodè influant, prout organa ab objectis moventur, & multiplices eis species ingerunt. Exempli causa, si *Canis* algeat, & intempestivo cœlo, frigore corripitur, viso eminens Igne, accedit non alia ratione, pulsus, quam quod tale objectum Cerebri meatus referat, qui in *cervicem* musculos terminantur, & spiritus animales in eos transmittuntur, quò ille ad ignem accedit. Ubi *Canis* accesserit, & igni admotus, blandientem inde calorem, sibi que gratum exceperit, ea fit in Cerebro spirituum commotio, ut illico in musculos illos dirigantur, qui ipsum prope ignem remorentur, efficiantque, ut *membra* ibidem prosternat. Si autem dimisso jam humi corpore, & in somnum etiam vergente, contingat, ut Ignis nimium ferveat, aut inajuscula aliqua *scintilla*, ex ardente ligno, in ejus cutem prosiliens, ipsum exurat, illa ardoris agitatio, incunctanter illos Cerebri poros aperit, qui ad *colli*,

colli, oculorum, & pedum musculos deducuntur, eorumque motibus famulantur, quo nempe statim se erigit, ignem contemplatur, & citato gressu, ab illo recedit. Si *Hervus* forte, ædibus succedat, & *Canis* oculis commodum objiciatur, ita ab ejus aspectu, Cerebri meatus aperiantur, utpote per consuetudinem sic dispositi, ut versus illum, gressus dirigat, lætitiā testetur, & tremulo caudæ motu ei aduletur. Sin peregrinus ingrediatur, cujus vultus corporisque habitu ignoti sint, ejus *aspectus*, insolitusque *odoratus*, ad motum contrarium *Canem* concitat, apertis scilicet musculis, qui latratui inserviunt, & ad morsus inferendos, iramque patefaciendam auxiliantur. Adeo ut omnes motus, qui in *Cane* peraguntur, ab objectis excitentur, qui sensoris recepti, spiritus determinant, ad influendum in varias corporis partes, iis movendis aptas, & utiles.

Non Peripatetici angi debent, quod soli organorum dispositioni Animalium motus assignemus, & omnes eorum sensitivas actiones, absque ulla *anima* ope explicemus. Cum si se ipsos intime contemplarentur, probeque quid interius peragatur, examinarent, idem prorsus in seipsis invenirent. Nam quis est, qui non varios *motus* in corpore suo cottidie oriri experitur, non advertente, imo invita sæpe ac reluctante *Anima*. In *Convulsionibus*, aut passione *colica*, quædam abdominis partes, vellicantur, unde acutus dolor nascitur; contrahuntur viscera, umbilicus veluti cum perfora-

60.

In homine etiam multi motus fiunt non advertente, imo invita Anima.

E s

tione

tione quadam retrahitur; sæpe intestina, in-
 verso fibrarum motu, sursum convelluntur,
 ureteres, & vasa urinaria, ita ad se invicem
 adiguntur, ut toto *paroxismo*, urina aut suppri-
 matur, aut partius defluat. Et tamen nemo
 dicet, his motibus Animam connivere, quum
 is, qui talia patitur, contrarium optet, & de *do-
 lore, spasmo, inflatione, adstrictione* conqueratur.
 Id in infinitis aliis exemplis, potest common-
 strari; sed hæc pauca sufficiant, ne in re per se
 perspicua, nimium immorari videamur. Illi,
 qui ex alto decidunt, manus in Terram præ-
 mittunt, ut *caput* tueantur; quod nullo sane
 rationis consilio faciunt, sed quia impendentis
 casus visio, ad Cerebrum usque pertingens,
 spiritus animales in nervos determinat, eo mo-
 do, quo necessarium est, ad hunc motum tan-
 quam in machina producendum. Vel si quis
 inopinato, manum in oculos nostros extende-
 rit, tanquam nos percussurus, quamvis de ejus
 amicitia & candore nobis constet, & id non
 nisi *joco* agere, nihilque minus, quam nobis
 malum aliquod inferre, moliri: vix tamen nos
 cohibere possumus, quin illos claudamus.
 Quod ostendit, eos non claudi Animæ nostræ
 opera; cum id fiat contra *voluntatem* nostram;
 quæ sola, aut saltem præcipua illius est actio:
 Sed quia nostri corporis Machina ita sit com-
 posita, ut motus illius manus ad oculos no-
 stros excitet alium motum in nostro Cerebro,
 qui spiritus animales deducit in eos musculos,
 qui palpebras dimittunt, ac deprimunt. Idem

de cæteris aliis Corporis motibus sentien-
dum est: viso enim *delicato* suavique cibo,
non modo intimæ fauces illius cupiditate mo-
ventur, sed lingua & palato saliva humefactis,
quædam quasi præmansio sit; eo quod cibi il-
lius species efficit, ut spiritus cursum suum ver-
sus eos musculos dirigant, qui *fancibus, lingua, &*
palato inserviunt, eisque motionem impertiunt.
Par est de *pruritu*, motuque venereo ratio, qui
conspicito aliquo objecto venereo, in iis parti-
bus excitantur, quæ ad hanc scenam peragen-
dam conducunt,

Enimvero, si omnes corporis nostri motus à
voluntate nostra penderent, & membra pro
lubitu regeremus, nulli profecto essent *para-*
lytici, nullique invenirentur, motu in toto cor-
pore, aut saltem in quibusdam partibus orbat.
Quia cum nemo sit, in quo *Voluntas* non sit,
membra sua movendi, & ab illa partium ner-
vosarum resolutione se liberandi, quæ illi Sen-
sum & motum adimit; quis sibi partium Cor-
poris usum eripipateretur, si penes eum esset,
meatus obstructos aperire, & viam spiritibus
animalibus facere, qua transmittantur, & ner-
vosas partes irradiant, inflect, & vigore
actuent.

Hinc patet, quam parum apte nonnulli Phi-
losophi ac Medici loquuntur, quanquam
grandia efferre videantur, dum inflatis buccis
pronunciant: Naturam *vacuum* abhorre; ad
versari quod sibi infestum est; medicamentum
humores, quos attrahat, *eligere*, alios autem

61.

Si omnes
corporis mo-
tus a vo-
luntate pen-
derent, nulli
forent para-
lytici.

62.

Quam im-
proprie lo-
quuntur
medici, qui
natura
quasdam
passiones as-
pre-tribuant.

præterire, & intactos relinquere : Naturam ad
crisim, veluti certamen se *disponere* : *Conari* ho-
 stilem ægritudinis materiam subigere, aut extra
 amandare : Victam quodammodo in *despera-*
tionem adduci, & velut arma abjicere, aut de-
 ponere. Quibus loquendi modis, non nisi
 suam celant ignorantiam & ne conticere omni-
 no videantur, occultis effectis aliquam, quan-
 quam non minus *occultam* causam assignant.
 Quia cum *Appetitus*, *Electio*, *Voluntio*, *Odium*, à
 mente nostra proficiantur, & aliud non sint,
 quam varii modi cogitandi, non possemus non
 eorum esse conscii, si in nobis reperirentur.
 Verùm cum nihil prædictorum, aut velimus,
 aut aversemur, imò ignoremus, quo pacto hi
 motus perficiuntur; dicere oportet, hujusmo-
 di motus in nobis non reperiri, aut si reperian-
 tur, solum corpus, hoc est, organorum dispo-
 sitionem, & spirituum animalium influxum pro
 principio habere. Quod asserere, quam ab-
 surdum sit, nemo abnuet, qui novit mentem à
 Corpore distingui, & diversas esse utriusque
 rationes. Alioquin quidni dicamus cum Illu-
 strissimo Verulamio, Corporibus omnibus,
 quacumque indole ac sensu destitutis, *aliquam*
in esse percipiendi facultatem; si verum est,
 quod cum corpori Corpus applicatur, *aliquid*
electioni cognatum deprehendatur in admittendis
gratis, & excludendis, rejiciendisque ingratiss.
 Quidni plantas cognitione donemus, si earum
 nonnullæ cum aliis *amicitiâ* contrahunt,
 quasdam Terræ regiones amant, in quibus ho-
 spiten-

spitentur, & certum sibi alimentum seligunt. Si alia è diverso, vicinarum contactum *refugiant*, arenoso, aut paludoso solo delectentur, & frigus æstumve nimium horreant. Quidni *intellectu* præditus sit Ventriculus, si noxium ab utili discernit, si sibi congrua dumtaxat appetit, & deprehenso veneno, ad vomitum provocatur. Hæ enim actiones ad Animam pertinent, & necessum est, rem illam Cogitatione polle-
re, quæ amat, quæ eligit, quæ averfatur, quæ horret, quæ delectatur, & appetit. Unde Clarissimo Harvæo assentiri nullatenus queo, dum censet, omnes Corporis partes, quæ contra irritamenta, & injurias motu suo nituntur, *Sensu quodam* naturali, quo ad motum sollicitantur, gaudere. Ac proinde motus & actiones, quas Medici naturales appellant, citra Sensum non fieri, sed eundem subesse, à quo excitentur, irritentur, & permutentur. Nam si ita esset, fateri deberemus in Corde ipso *palpitationem, tremorem, lipothymiam, syncopen, pulsusque* omnes alterationes in magnitudine, celeritate, ordine sive rithmo, & similibus, quæ à morbificis causis alterantibus, sensumque lædentibus fiunt, sensu prædita esse.

Neque magis Peripateticorum sententiæ accedo, qui sensum *Brutiis* Animantibus largiuntur, & eodem modo, quo nos, videre, audire, olfacere, &c. arbitrantur. Quod certe nemo agnoscet, qui veram Sensus ideam formaverit, & quid in ejus conceptu includitur, in-

63.

*Nec minus
impropre,
qui Brutiis
Sensum tri-
bunt.*

intellectu probe affecutus fuerit. Quippe Sensus à Cogitatione non distinguitur, & soli rei spirituali, ac incorporeæ competit, à qua separari non potest. Hinc Hippocrates aphorismo sexto, sectione secunda: *Qui parte aliqua corporis dolentes, dolorem non sentiunt, is Mens agrotat.* Si igitur cum Mens agrotat, alienataque est, ita ut Sensuum organis intenta non sit, etiamsi dolendi accedat causa, non sentitur, multo minus sentire potest res ulla alia eorum, quæ minus violenter Sensum pulsant, nisi adsit Mens; quod etiam in nobis ipsis experimur. Sæpius enim accidit, nos oculis literas scripti alicujus percurrere, & aures nostras, verborum sono percuti, licet id neque intelligamus, neque percipiamus; quoniam Mens nostra, aliis quibusdam rebus applicata est, quarum rerum tamen unaquæque postea redit, & cogitationi nostræ repræsentatur. Si igitur Homines, qui Mente præditi sunt, cum non attendunt, & alio occupantur, non sentiunt; multo minus sentire possunt Animalia amentia, sive mente destituta. Quapropter ritè infert Plutarchus libr. de sagacit. Animalium: *Mentem tantum videre, & intelligere, & reliqua omnia surda esse, & cæca. Quoniam passio oculorum, & aurium, quando ab objectis feriuntur, nullum Sensum excitat, si cogitatio mentis ab ea est remota.*

64.

*Aristoteles
censet men-
tem solam
sentire,*

Nec minus ad rem præsentem faciunt Aristotelis verba, quæ ex section. undecima problem. 933. erantur: Nam cum quæsisset Philo-

loso-

Iosophus, cur *nox* ad audiendum sit accommodatior, quam dies, post recensitam *Anaxagoræ* opinionem, qui id fieri existimabat, quod Aër interdiu, à Sole concalefactus, stridet, & obstrepat; Noctu vero requiescit, utpote cum omnis calor abfuerit: sic edisserit, quoniam corpora interdiu *vim* intelligendi multifariam dispartuntur, inque res varias deducunt: Itaque clare audiendi eripitur Sensus, & ex eo, quod omnia die magis quam noctu agimus, ipsa quoque intelligentia negotiis corporis impedita est, Sensus autem, ubi ab intelligentia sejunctus est, laborem velut insensibilem habet, unde dictum, *Mens Videt, Mens Audit.* Quod si igitur sola mens videt, & audit, hoc est, objecta percipit, quæ corporis organa feriunt, nullæ res aliæ à Mente sentiuntur, ac. proinde necessum est, quæ Mente carent, Sensu quoque destitui.

At, insurgent aliqui, qui hanc opinionem *crudelem* existimabunt, ac internecinam Animalium vocabunt, quid, inquit, non intelligentia solum, sed & omni Sensu omnia Animalia orbabis? ô Barbariem! Quid ab experientia, & communi omnium Hominum opinione magis abhorret: Annon cottidie Bestias saltem perfectiores videmus, objectas res *intueri*, sonos auribus *excipere*, & per eos ad laborem, ad cursum, ad cibum, ad potum, & similes actiones *excitari*? Qui nescit *Felem*, *Canem*, *Simsiam* pabulum odoratu discernere, & utile gratumque venari, fugere autem ingratum ac noxium?

Unde

65.
*Vulgaris
oblectio, ad
ostendendū,
Sensum
Animali-
bus inesse.*

Unde fit, quod Aranea in telæ medio residens, muscam in remotissima etiam parte, inpegisse sentiat, si Tactu destituitur? Quorsum hi verus,

Nos Aper aditu, Linx visu, Simia gustu,

Vultur odoratu, præcedit Aranea Tactu:

si illis nullus Sensus inest, & instar saxorum, & inanimatarum machinarum se habeant.

66.

*Tres gradus
in Sensu
sunt distin-
guendi.*

Nostrium igitur munus est, ostendere, qua ratione Sensem à Brutis removeamus, & qui fiat, ut Oculos habeant, & tamen non videant, Auribus instructa sint, & sonos non percipiant: Naribus gaudeant, & non odorentur: Lingua utantur, & sapes non discernant. Quod ut felicius exequamur, animadvertendum est, tres gradus in Sensu esse distinguendos. *Primus* gradus simplicem motum continet, quem objectum nervis imprimit: siue illud, quo corporis organum, ab objectis externis immediate afficitur, quodque aliud esse nequit, quam particularum istius organi agitatio, figuræ ac situs mutatio, ex illa agitatione proveniens. Sensus enim in motione consistit, & nullos, teste Aristotele, Tertio de Anim. cap. 13. *absque tactu haberi potest.* Quare necessum est, ut organum corporeum, modo corporeo tangatur, & motus rebus sensibilibus imprimatur. Dum dico motum objecti organo corporeo imprimi, non sic intelligendum velim, quasi motus in Oculo, exempli causa, tantummodò fiat, sed ad Cerebrum usque transire, à quo nervorum fibræ, veluti fides tensæ in testudine, ad reliqua membra

bra protenduntur. *Secundus gradus*, perceptionem complectitur, quæ isti motui alligata est, quando ea impressio ad glandulam pinealem, sive Animæ sedem deferatur. Tales sunt perceptiones *Doloris, Titillationis, Sitis, Famis, Caloris, Soni, Saporis*, & similia, quas omni ex unione substantiali Animæ cum Corpore dicimus. *Tertius* comprehendit omnia illa iudicia, quæ eas perceptiones sequuntur, sive iudicia illa, quæ occasione motuum organi corporei, de rebus extra nos positis, ab ineunte ætate facere consuevimus, vel ut paucioribus verbis tres illos gradus Sensus complectar; *Primus gradus*, est affectio, seu motus organi corporei. *Secundus*, perceptio illius impressionis, quæ Intellectui est propria. *Tertius* iudicii determinatio, ad aliquid affirmandum, vel negandum. Ut res etiam exemplo reddatur illustrior, dum quis lunam, exempli causa, videt, *movetur*, seu afficitur *organum* corporeum, nempe oculus, à lumine, quod à lunari corpore reflectitur: & in hoc *primus* gradus positus est. Mens confestim lumen, aut colorem percipit; & in hoc *secundus* consistit. Mens porro lunæ colorem assignat, seu iudicium promit, existimatque lunam esse coloratam; & in hoc *tertius* gradus situs est.

His ita præmissis, manifestum evadit, Animalia Sensu propriè dicto esse cassa: nisi quis *motum* illum corporeum, qui Perceptionem præcedit, & qui ad illam, ut quid inchoatum, & imperfectum se habet, pro vero Sensu admittat, Nam non nisi hujus Animalia capacia sunt,

F

& ni-

67.

Quomodo
Sensus Bruti-
is conven-
iat,

& nihil in ipsis deprehendimus, quod nobis persuadeat, illa sentire, si Sensus vocabulum pro alia re sumatur, quam pro objecti externi impressione in organum sensuum. Unde, qui organi corporci *motum* Sensus appellationem mereri censent, non minus absurde loquuntur, quam qui asserunt *cubiculum opticum* videre, dum externorum objectorum species recipit, & quæ foris aguntur, repræsentat. Mactati bovis *oculum* videre, in quo omnia, non minus quam super vivi Animalis retina, distinctè delineantur. *Homines* videre, qui, leporino ritu, luminibus apertis dormiunt, & non nisi reſeratis palpebris vigilare videntur. Quùm camera optica, mortui Bovis oculus, & dormientis retina, rerum externarum species recipiant, & eodem modo, quo illa objectorum picturam referant. Ac proinde, si motus corporeus Sensus nomine gaudeat, eadem rationis vi inferri debet, idem rebus inanimatis posse adscribi.

68.

*Sensus non
in motu or-
gani corpo-
rei consistit,
sed in per-
ceptione.*

Suspicio, quid adversus hoc ratiocinium re-
geri possit, corpus scilicet sentiendi esse *instru-
mentum*, cujus actionem nostris sensationibus
intervenire necessum est, ac proinde, ut Sen-
sus habeatur, requiri organum certo modo di-
spositum, in quod nimirum, spiritus Animales
influant, & cujus motus ad Cerebrum usque
pertingat, quod cirra motum fieri non potest.
Has omnes conditiones lubens in organo lar-
gior, fateorque oportere, ut sentiamus, orga-
num certis dispositionibus modificatum sit; sed
tantum insisto, quod neque objecti externi

actio,

actio, qua organum movetur, ac disponitur, neque figuræ ac situs *mutatio*, quæ actionem illam promovet, neque etiam illa, quæ ad Cerebrum fit *transmissio*, sensus sint, aut apprehensiones: sed tantum id, quod immediatè in mente, quæ organo corporeo ita disposito juncta est, resultat. Nam quo pacto intelligi potest illud Isaia, *Auditu audietis, & non intelligetis, & videntes videbitis, & non cernetis*, nisi primus gradus à secundo distingui supponatur, & corporeus motus posse à perceptione seu mentis attentione seungi.

Sed quorsum ad *Scripturam* Divinam recurrendi opus est, ut probemus Perceptionem ad Sensus rationem pertinere, & mentis operam requiri, ut audire, videre, olfacere, &c. dicamur? Cum in nobis illud non rarò experiamur: dum mente scilicet, in rebus contemplandis impensè occupata, prætereuntem ante nos Hominem non videamus, quamvis oculi pateant, & amoto omni obstaculo, versus illum dirigantur. Nec eius sermonem excipiamus, licet apertæ sint *Aures*, & in ipsas sonus affatim se ingerat. Nec cibi saporem gustemus, etsi *Lingue* fibræ esculenti corpusculis pulsantur, & totus organi plexus stringatur, irretiatur, & scalpatur. Nec dolorem sentiamus, quantumvis *corpus* inclementi aëri exponatur, & præ frigore quodammodo rigescat. Quæ omnia sat indicant, sensum strictè dictum, aliud à motu corporeo esse, & non membra, aut organa, sed solam mentem videre, audire, gustare, & sentire.

69.

*Potest haberi
ri motus
corporeus
absque sen-*

70.

Quam is
falluntur
qui ex actio-
nibus ex-
ternis judi-
cant, Bruta,
ut nos, sen-
tire,

Unde apparet, quam ineptè Hi ratiocinen-
tur, qui ex eo, quod advertant, Bruta Animantia, rerum externarum specie, moveri, & quem-
admodum homines, objectos cibos *deglutire*,
sonis concuti, & objectorum aspectu allici, aut
terreri, statim inferunt, Bestias quoque sentire,
hoc est, cogitare, & ad rem oblatam attendere,
Quum iis omnes motus in Animalibus absque
Animæ ope peragantur, & cæca organorum,
animaliumque spirituum impulsione perfici-
antur. Nobiscum à juventute crevit hic er-
ror, ut bene animadvertit *Clanbergius* in prole-
gom. Logicæ, eo quod tunc temporis, eo ipso
momento, quo organa nostra corporea à rebus
externis movebantur, mens corpori juncta
percipiebat aliquid, utrumque pro uno sumen-
tes, corporeis sensuum organis Perceptionem
tribuimus, quam *Sapiens* soli tribuit *intellectui*.
Ita videre *Oculum*, *Aurem* audire, *Linguam* gu-
stare, *Nares* olfacere, *Manum* sentire familiari
sermone dicimus. Quod vero amplius est, quia
dum corpus à rebus externis afficiebatur, &
Mens percipiebat aliquid, illico etiam aliquid
judicabat; hinc organis quoque corporeis exi-
stimationem & iudicium adscribimus, ad quod
Philosophus corpus quidem non desiderari, at
præter intellectus apprehensionem voluntatis
assensum requiri novit. Nimirum quemad-
modum in aliis sæpenumero contingit; ita et-
iam in hisce intellectus, imaginationis, perce-
ptionis, iudicii actibus, ut pro eodem habeantur,
& inter se confundantur, tantum eam ob

cau-

causam, quod simul tempore existant : Ita quia dum oculus *movetur* à lumine, simul Mens Corpori juncta, aliquid *percipit*, simul *judicat*, ideo tria ista diversa, nempe corporis motus, Mentis perceptio, judicium, à vulgo, pro uno eodemque reputantur, atque uno videndi vocabulo exprimuntur, ut cum dicunt, video Solem. Sed ab hoc loquendi modo maxime abhorrent Sapientes, qui magnam differentiam statuunt inter id, quod in Sensationibus nostris ad corpus spectat, & id quod pertinet ad mentem. Motus enim, quem objectum externum imprimit, & organi mutatio, ad corpus quidem spectat, verum nullam involvit *Perceptionem*, seu Cogitationem, utpote soli Menti propriam, & à qua se jungi nequit.

Hanc opinionem sequitur Divinus Plato apud Marsilium Ficinum, argum. in Thetæum. *Advertendum est*, inquit Ficinus, quod Plato, nullum Corpori cognitionem tribuit. quemadmodum nullam vitam. Quod vivit, id sentit: vivit Anima, & Anima sentit. In Corpore autem nec vita nec sensus, sed vita sensusque opera declarantur. Ideo quos sensus quinque alii vocant, ipse organa quinque sensus appellari vult, nihilque his instrumentis sentire, sed per hos quasi meatus, ab una quadam Anima vi sentiri singula putat, quem sensum communem vocat, in quem undique è singulis corporis organis, ut ad centrum circuli è circumferentia linea, varia passionem influunt. Colores quidem per Oculos, per Aures soni, per Nares odores, sapesque per Linguam, denique

71.
Secundum
Platonem
nullus sensus nisi Anima compet-
rit.

que per totum corpus, calor, frigus, humidum, siccum, grave, leve, molle, durum, lene, asperum, rarum, densum, acutum similiter & obtusum. Quod anima ista non multis, sed una vi sentiat, patet: quia sentiendo calorem, dicimus, non esse vocem: & saporem sentiendo, non esse odorem pronuntiamus. Non potest aliud ab alio distinguere, qui non utrumque cognoscit, nullum organum eadem, quæ & aliud organum, porrigit: & si eadem, non eodem modo. Idcirco eorum, quæ sentiuntur, distinctio non in organis est, sed in una quadam vi Animæ percipiente singula, & singula simul à singulis distinguente. *Quæ cum ipsa hæc omnia sola possit, quod nec etiam Peripatetici negant, quid multis sensibus opus est?*

72.

*Organa
Corporea
nihil perci-
piunt.*

Ex quibus Platonis verbis, ita argumentari licet: si sensus in organo corporeo resideret, dici posset, Oculus videt, sicut & Auris audit: atqui è Platonis mente, nec Auris audit, nec Oculus videt, imo *in corpore nulla vita est, nec sensus, sed vita tantum sensusque opera* per illud tantummodo declarantur; & Animus est, ut alibi loquitur Marsilius, qui *dolet, aut letatur, non corporis moles*: Igitur non est sensus in organo corporeo. Ex iis etiam clare deducitur, Belluas, quum mente careant, nihilque præter motum corporeum habeant, non sicut nos, exempli causa, *videre*, hoc est sentiendo, sive animadvertendo se videre, sed tantummodo sicut nos, dum menta aliò *avocata*, licet objecto-

rum

rum externorum imagines in retina nostra pingantur, & forte etiam illorum impressiones in nervis opticis factæ, ad diversos motus membra nostra determinent; nihil tamen eorum profusus sentimus. Qui casu etiam nos, non aliter quam automata movemur, ut antea variis exemplis declaratum est.

Celebris Doctor *Vallis*, exercitatione de Anima Brutorum, ubi Animam corpoream in Brutis Animantibus agnoscit, eamque naturæ cujusdam igneæ esse arbitratur, & flammæ affinem; non absurdum putat, in Animalibus potentiam dari, quæ sensibilibus imagines, in cerebro delineatas speculetur, & discernat, nec non, juxta impressiones ibidem susceptas, appetitus aliarumque facultatum actus respectivos eliciat. Quia etsi Anima, & Corpus, si seorsim spectentur, talem potentiam non habeant, nihil tamen obstat, quo minus ex certa creationis lege, ut ipse loquitur, sive Dei opt. max. instituto, corpus animatum ita comparatum sit, ut ex Anima & Corpore simul commissis, ejusmodi facultatum confluentia resultet, quibus unicuique Animali in fines, & usus ei destinatos opus fuerit. In plerisque mechanicis, vel arte humana conditis, materiam superavit opus, ecquis enim putaret, ex ferro & ære, utpote fixissimis & inertissimis metallis, instrumentum parari, cujus orbes cœlestium æmuli, absque motore externo, motus fere continuos observarent, quorum periodi, vice constanti renovata, temporum spatia certissimè emetirentur?

3.
Doctoris
Vallis opinio circa
Brutorum
cognitionem

nemo miratur à vento fistulæ inspirato, sonum quendam rudem, & simplicem edi; At vero à flatu organis musicis immisso, eoque per multiplices valvularum aperturas, in has aut illas fistulas variè traducto harmoniam gratissimam, & modos cujusque generis compositos creari; hoc, inquam, merito obstupescimus, & effectum hunc tum instrumenti materiam, tum musici pulsantis manum, lōge præcellere agnoscimus; porro licet organum musicum pulsantis operam ut plurimum requirat, cujus scilicet directione spiritus nunc in has, modò in illas, aliasque tibiae admissus, multiplices concentus, & infinitas fere modorum varietates efficit. Ita perfectioribus quibusdam Brutis, quorum actiones, ad plures & præstatiores usus ordinantur, facultas quædam attribui debet, ipsa nimirum *Anima Brutalis*, naturaliter ita dotata, ut circa res quasdam ei necessarias *cognoscens*, & *activa* sit, per varia accidentia, quibus quotidie affici solet, postea res alias cognoscere, & actiones longe plures, intricatioresque edere docetur.

74.

Disputatur
sententiæ D.
Villii circa
cognitionem
Bruto-
rum.

Hanc similitudinem facile admitto, ex qua plurimum lucis, antedictis rationibus accedit, ad demonstrandum Bruta merè *machinas* esse, quæ secundum leges, à Conditore stabilitas, agunt, & instrumenti musici ritu, quod flatu immisso harmoniam gratissimam procreat, sanguinis per universum corpus circuitu, omnes suos motus absolvunt. Verumtamen assequi non valeo, quomodo ex duarum substantiarum

ma-

materialium, ac proinde insensilium, unione, Sensus, & Perceptio oriatur, nam quantumvis materia in mechanicis ab *arte* superetur, & ex diversorum Metallorum mixtione instrumenta parentur, miris patrandis idonea, nunquam tamen eo perfectionis materia evchi potest, ut res oblatas apprehendat, & se illas sentire sentiat, At potest, ex cerda Conditoris lege, Corpori suis organis instructo, & ad certos usus destinato, vis aliqua sentiendi tribui, quæ non Corpori, non Animæ scorsim spectatis competat, sed composito dumtaxat ex utrisque resultanti. Sed lubens à Viro eruditissimo, salva pace, quærerem, quodnam sit illud sentiendi principium, an modus quidam substantialis, quo res animata ab inanimata & insensili discriminatur, cujus accessu Animal constituitur? Verum nihil in Animali reperitur, quod illud à rebus inanimatis discernat, præter sanguinem, qui indefinente motu, in Venas, & Arterias impellitur ad partes corporis alendas. Quæ verò sanguini activitas, ut Corpori sentiendi facultatem impertiat? An forsitan generalis quædam Anima, materię cœva, quæ illam secundum varias ejus dispositiones actuat, & perficit? Sed ea admissa, quis non videt, non Animalia modo, sed & plantas & saxa sentire oportere; quandoquidem potentia illa actuosa, & *energica*, pari jure, sit eis à naturæ Conditore infusa. An vero ex Anima & Corpore conjunctis, principium aliquod emergit, quo Animal objectorum impressiones cognoscendi idoneum red-

ditur: Sed quodcunque illud esse fingatur, cum materiale esse debeat & extensum, potestate agendi, sentiendi, percipiendi, attendendi præditum esse non potest. Intelligi enim non potest, quomodo ex rebus insensibilibus aliud sensile & perceptivum exurgat; qua ratione res corporea actus spirituales eliciat, & quod extensum est, id quod omnis extensionis expertum est, pariat.

75.

*Motus localis
idea, quid
distinctum
est ab idea
cognitionis.*

Si vero clarissimus Author, dum cognitionis principium Brutis Animantibus largitur, nihil aliud esse eorum cognitionem velit, quam materialis speciei *receptionem*, sive varium partium alicujus Cerebri interioris *motum*, damus manum, ejusque judicio subscribimus: Cum motus hujusmodi diversos in Brutis agnoscamus, fateamurque à variis objectorum impressionibus affici. Nequaquã verò eò adduci possumus, ut concedamus, motus localis ideam cum Cognitionis idea consentire, sive Perceptionem & organi corporei motum à se invicem non distingui. Quia quum Corpus & Mens, toto genere differant, & distinctio, quæ est inter modum unius substantiæ, & modum alterius substantiæ, si realis, oportet ut perceptio, & motus organi corporei, pari discrimine dirimantur; ac proinde ab eodem principio proficisci nequeunt.

97.

*Si Bruta cognoscere
Homines
perfecti
excederent.*

Eam forte ob causam, aliqui recentiores Philosophi, Ratiocinationem, seu *Discursum* à Belluis quidem remonent, utpote à materialibus organis alienum, cum Bestias existiment

inca-

incapaces aliquid cum reflexione intuenti. Verum, sibi persuadere non possunt, illas non percipere, dum objecta intuentur. Quid oculis objecta *spectabunt* & sonos auribus *admittent*, & diversas has tamen species, seu imagines, in certa Cerebri parte depictas non concipient? Quidni sicut duplex datur memoria, *Sensualis* nimirum, & *intellectualis*: Ita perceptio una *Sensitiva* dicatur, & altera *intellectiva*. Nihil præter jam supra dicta aliud, quod respondeam, suppetit, nisi quod illi talem in Brütis perceptionem admittendo, æqualem illis, ac Hominibus, si non majorem perfectionis gradum concedant. Nam quid est, in quo illi Sensum à *Ratione* distinguere arbitrantur? in eo scilicet, quod Sensus cognitio apprehensiva sit & *simplex*, nullique ideo falsitati obnoxia: Cognitio vero *Rationis* sit paulo magis *composita*, & per syllogismorum ambages fieri possit; quod majorem perfectionem arguere, nullo modo videtur: cum præsertim iidem, *Dei* & *Angelorum* cognitiones, etiam simplicissimas esse dicant, & intuitivas, sive apprehensivas tantum, nullisque discursuum involucris alligatas: Adeo ut, per ipsos, si fas est dicere, Animalium Sensus ad *Dei* & *Angelorum* cognitionem magis quam humana Ratio accedat.

Quantum ad memoriam *sensitivam*, seu rerum materialium, facile illam Bestiis asserimus, quum illa organo corporea affixa sit, & ex vestigiis in Cerebro manentibus, postquam ima-

77.

Reperitur
in Animalibus
memoria
sensitiva.

go aliqua illi impressa fuit, pendet. Quippe vestigia illa, ut fuse in *Institutione Philosophia* explicui, aliud non sunt, quam tramites quidam, quos spirituum animalium cursus inter Cerebri fibras reliquit, per quas prima vice transierunt: ad eum modum, quo *plica* in charta, aut linteo faciunt chartam illam, aut lin-teum, ad easdem, quas antea, plicas admittendas, magis *idoneam*, quam si nullæ plicæ fuissent: quo fit, ut fibræ Cerebri, attrahendi, spiritus-que determinandi virtute polleant, ut vice proxima, per eadem vestigia, eodem modo egrediantur, quo prima vice egressi sunt. Adeo ut talis memoria *sensitiva* in Cerebri partium dispositione consistat, ab objectis per Sensus inducta. Quam dispositionem si inverti, aut perire contingat, illico & memoriam labefactari, aut penitus perire necessum est. Ut multis exemplis probari potest, in iis, qui vel lapidis *ictu*, vel ægritudinis *sevitia*, aut è summo loco *lapsu*, Memoriae jacturam fecerunt, omnium eorum, quæ prius noverant, obliiti. Vide *Historiam Natur.* parte ultima. Imo sunt, quorum Cerebri vestigia *Nicotiana* fumus adeo perturbavit, ut res omnes signatas aboleret, & characteres etiam diu impressas deturbaret. Unde patet Memoriam facultatem esse corpoream, quæ ope vestigiorum, quæ ex objectorum speciebus conservat, vim habet, eas imagines de novo excitandi, & rerum antea actarum ideas procreandi.

Nihil vetat igitur, quominus Animalia recorderentur,

78.

Carent autem Bruta intellectiva memoria

Itque ipsa memores redeant ad tellus Capella, ut in Georg. loquitur Virgilius, dum objectorum corporeorum imagines, eo ordine, quo primum Cerebri loculos subiere, recurrunt, & idem genus motus in illorum nervis excitant. Non tamen se meminisse percipiunt, nec quæ opus habent, neglectis aliis, eligunt, nec nova scrutantur, aut priores configurationes recognoscunt: sed Fidicinum ritu se habent, qui sine animadversione *cytharam* pulsant, chordas stringunt, & varios concentus edunt. Sic *Argus* canis *Ulysses* post viginti annos agnovit. Sic *Aves* ex nido in sylvam pabulatum evolantes, ex longinquo revertuntur. Sic *pisces*, ad signa data, ad cibum projectum in stagnis accurrunt, suasque latebras postmodum repetunt. Sic *Fera* in cubilia sua, etiam longe diffita redeunt, & amissam forte viam odore vestigant. Quia spiritus animales. poros Cerebri, per quos antea cursum suum coeperunt, reperientes, eos facilius, quam alios subeunt. Qua ratione, motum specialem in glandula pineali excitant, quo illis idem objectum repræsentatur. Horum forte vestigiorum defectu, *Tucani* minima, aut nulla pollent memoria, dum antro suo egressi, illud repetere amplius nesciunt, sed aliud fodiunt, in quo condantur.

79.

Ordo dicendorum in hac secunda dissertationis parte.

Quamvis firmis jam satis rationibus ostensum sit, Bruta Animantia Sensu, ac Perceptione esse

esse destituta ; sive nihil cognitionis posse in eorum operationibus inveniri , ac proinde concinnam membrorum structuram , & præcisam spirituum animalium , per certos meatus , directionem debere omnium eorum actionum esse principium : Nihil tamen adhuc egisse arbitramur , ni ad particularia descendamus , manifestumque faciamus , omnes animalium *actiones* mechanice posse explicari , & motus , quos ab Anima quadam in Bestiis proficisci arbitramur , iis affines esse , qui in automatibus sola virtute *manucla* , & rotatum figura producuntur. Arduus quidem hic *labor* , sed tamen suscipiendus , si inceptum opus ad finem perducere velimus , & meditatam molem jactis fundamentis superstruere. Ut autem aliquem in altera hujus Dissertationis parte ordinem etiam servemus , lubet omnes Brutorum operationes ad quinque classes reducere. *Prima* earum erit , quæ Bestiis ingenitæ sunt , & ad quas exercendas innato quodam impetu feruntur. *Secunda* , quarundam actionum erit , quæ *Astutiam* in eis arguunt , & nonnulla intellectus , judicii , ac discursus signa præ se ferunt. *Tertia* , eorum erit , quæ Animalium docilitatem , instructionisque aptitudinem insinuant , prædicantque in illis , non minus quam in nobis , aliquam Rationem elucere. *Quarta* , actionum erit , quæ mutuum Belluarum sermonem revelant , videnturque illis loquelam nobiscum communem concedere. *Quinta* denique , nonnullarum actionum erit , quibus

Ani-

Animalia, Hominum *solertiam*, sagacitatemque excedere videntur, & peculiarem in ipsis, supra Hominum sortem, providentiam & futurorum præscientiam existere.

Quantum ad primum spectat, in propatulo est, cuique Belluarum *speciei* proprias inesse 80.
actiones, & ita ad certos actus determinari, ut *Nonnullorum Brutorum operationes per instinctum Naturalem*
omnes idem citra ullum discrimen moliantur
& peragant. *Cameli* puras undas refugiant, *lululentas* autem ac turbidas captant; hinc ni-
liquor, quem hauriendi gratia flumen ingre-

diuntur, cœnoscunt, limum assidua procul-
catione, ut turbetur, excitant. *Cuniculi* ter-
ram assidue fodiunt, & foveas, in quibus sta-
bulentur, arena contegunt, ne eorum rece-
ptacula pateant, & à Furonibus deprehendan-
tur. *Cervi*, jaculo confossi, *dictamnium* quæ-
runt, ut vulnus curent, & dolorem, quo pre-
muntur, abigant. Si *Radix Valeriana* ante *Ca-*
tos projiciatur, accurrunt, lambunt, basiant, &
tripudiantibus similes, circumcursant, & alios
gaudii voluptarisque indices edunt. *Gallina* *Mil-*
vum conspiciat, crocitat, & velut pullos ad fu-
gam hortaretur, extensa in longum voce, sub
alase convocat.

Hæc omnium actionum causa in aliud, 81.
quam in naturalem inclinationem, seu *Natura ead-*
dem in
omnibus
eiusdem spe-
cies Ani-
mantibus
refundi non potest, quo Animantia ad ta-
les motus instigantur, & quæ sibi convenien-
tia sunt, decernunt. Quo fit, ut tota Bruta-
lis illa species una propensione feratur, ac in
omnibus eadem vis idemque impulsus repe-
riatur.

riatur. Sic omnis *Lepus* meticulosus est, & pari calliditate, pericula, & vitæ incommoda declinat. *Canis* quisque sagax est, atque in se-
ctandis feris industrius. *Vulpes* omnes subdo-
læ, & astutæ sunt, & simili arte, insidias Avi-
bus struunt. *Simia* quælibet humanas gesti-
culationes exprimit, & quicquid illi obijcitur,
eodem ritu, imitatur. Unde manifestum est,
nihil Rationis in hujusmodi operibus interce-
dere, sed Bruta, ad ea quadam necessitate im-
pelli, & juxta illud in scholis familiare effa-
tum, *patis* potius quam *agere*. Enimvero qui
scire potest *Camelus* limpidioris aquæ potum,
ventris tormina ei allaturum? aut propter ejus
substantiæ *simplicitatem*, minus corpori alendo
sufficere? Quo pacto novit *Cuniculus* Furo-
nes illis insidiari, & ni cavernam arena coope-
riant, in eam esse penetraturos, & morfu, tru-
sione, & pedum fricatione, expellendos esse?
Novit *Cervus* Dictamnium, telo amovendo
utilem esse? *Gallina*, milvum pullos prose-
qui, ut surripiat, ut devoret? Certe si ita es-
set, forent Bestiæ, Hominibus sapientiores,
quæ, quod nunquam expertæ sunt, explorata
haberent, & res callerent, antequam ad illo-
rum sensuum organa pervenissent. Nam *Apes*
vix in lucem editæ, favos extruunt, mella col-
ligunt, Regem comitantur, Reipublicæ spe-
ciem tuentur; *Formica* juvenes, non minus
providentiam testantur, quam ætate provectæ;
pulli gallinæci vix ovo exclusi, milvum hor-
rent, & fugiunt; *milvus* nullo instructe galki-
nam

nam persequitur; *Lupus* inter Homines ab ipsis, ut ita dicam, incunabulis Ovem infestat, *Hirundo* nidum, *Aranæus* telam, nullo doctore præcunte, ædificat, & texit. Patet igitur, Animalia in iis omnibus nequaquam à Ratione dirigi, sed solo naturæ ductu, qui in omnibus pari ratione decurrit.

Sed occurrunt nonnulla naturæ opera, quæ sine sensu ac Ratione perfici posse non videntur; ut in principio hujus dissertationis notatum est. Nam quomodo fieri potest, ut *Aranææ* telas suas tam *Geometricè* texant? quomodo *Apes* tam concinnè cellulas suas componunt; ut quasdam ad mel recondendum, alias ad prolem excludendam, destinant? Unde illas primum oblongas, ad corporum formas capiendas, & ex altera parte apertas exstruunt, ut liber exitus regressusque pateat? Ex quo tamen efficitur, ut non nisi duo cellarum ordines sibi invicem opponi possint, ad verticem scilicet, & ad oclusam partem alteram. Præterea, quum compingendis cellarum parietibus, necessum sit, ut cera secernatur, & circumegeratur, quomodo illud *Apes* ita præstant, ut unaquaque ape se pressis alis circumducente, simul sex aliæ ipsi proximè ad latera, & totidem ad verticem circumducantur, idque ob circularis figuræ conditionem, quæ ita comparata est, ut à sex aliis æqualibus, similibusque contingi possit. Ad hæc autem *hexagonicam, hexahedricamque* figuram, tam ad latera, quam ad verticem conformari necessum est, quatenus dum sex

82.

Quo pacto Apes tam concinnè cellulas suas componunt.

*ber, quod magis miremur, quam Canum, aut Felium instinctus, qui excrementa sua, quasi contecturi, terram scalpunt, quanquam illa fere nunquam contingunt. Quod probat illos ex instinctu tantum, & incogitantes facere. Quod si quis igitur obstinax permaneat, velitque in Bestiis intellectum, vel rationem requiri, ad miras illas operationes eliciendas: quid obstat, quominus quæcunque naturaliter fiunt admiranda, à Ratione proficisci dicantur? quidni horologium, intellectu præditum asseramus, dum Index rato ejus motu volubilis, modo aquæ defluxu, modo ponderis appensi nutu, modo chalybis intorti renisu circumactus, horas designat. Quidni acus chalybea ad Magnetem propinquum Ratione advolare dicatur, ut ejus complexibus frui liceat. Apes igitur habitacula parant, ut præclare loquitur *Harveus*, naturaliter, connato ingenio, & tanquam fato, seu mandato quodam, secundum leges operante: Non autem providentia, disciplina, aut consilio quicquam agunt. Nam quod in nobis operationum artificialium principium est, diciturque *Ars*, Intellectus, aut providentia; Id in naturalibus illis operibus est *Natura*, à nemine instructa.*

At si exigas, quo igitur pacto fit, ut tanta inter 84.
Belluas oriatur *actionum* diversitas? quomodo *unde*
cuique Animalis propria est machinatio? si *oriatur*
secundum ingenitas impressiones operantur, & *actionum*
velut certo pondere impelluntur. Respondeo *diversitas in*
id ex varia Cerebri, & organi dispositione con- *Brutis.*
tingere, quæ propter diversæ speciei Animalibus

bus mutatur, efficit, ut ejusdem objecti affectio ad motus diversos determinet. Quippe nihil aliud instinctus naturalia nomine intelligi potest, quum *motus localis*, ut totius, & partium etiam exiguarum, certa magnitudine ac figura præditarum, secundum quas res naturales distinguuntur, & varias sortiuntur denominationes: motus autem illi, qui corporales dispositiones sequuntur, ad tria capita reduci possunt. *Primum* earum est, quibus Animalis insito quodam impulsu, ea *oderunt*, ac *aversantur*, quæ ipsis insensa sunt: ut *Ovis* Lupi aspectum horret, & ubi eumprehenderit, totis viribus aufugit. Cuncta ferme Animantia *Leonem* pavescunt, & ad ejus intuitum, terrentur. E diverso *Leo* Gallum metuit, & non minus ejus cantu, quam conspecta ejus crista, contremiscit. *Pullæ* Milvum fugiunt, &c. *Secundum* est eorum, quibus Bestiæ suæ speciei *propagationi* incumbunt, & ad sui similium generationem accinguntur. Sic *Bombyx* ovum texit, sic Animalia, & Pisces, ingenita quadam indole, plurima agunt, quæ ad prædictum finem spectant. *Tertium*, est eorum, quibus Bruta propriæ *conservationi* vacant, & ut se ab interitu tucantur, pabulatum eunt, cibos seligunt, annonam in futuram hyemem recondunt, & similia agunt, quæ ad hunc finem conducunt.

85.

Unde ori-
tur inter
quadam
Anima-
lium
odium,
seu Anri-
nashia.

Primi generis *motus*, facili negotio explicantur, si dicamus, talium objectorum intuitu, impressiones quasdam, per nervorum fibras, in Cerebrum transmitti, quæ spiritus animales in ner-

nervos delegant, qui vertendo tergo, & cruribus movendis, ad fugam capeffendam famulantur, & partim in eos, qui dilatant, aut contrahunt orificia cordis, aut qui alias *partes*, ex quibus sanguis ad ipsum mittitur, ita agitant, ut hic sanguis rarefactus, alio modo, quam solet, spiritus ad Cerebrum mittat, qui passioni *Terroris* fovendæ ac nutriendæ sunt idonei, id est, qui apti sunt ad apertos tenendos, aut rursus aperiendum Cerebri meatus, qui illos, in eosdē nervos deducunt. Sic lumen è *lupi* corpore, in *Ovis* oculos reflexum, vim habet spiritus determinandi, & illos in nervos eo pacto diffundendi, quo necesse est, ad hoc, ut *Ovis* fugam arripiat. Pari ratione de *Pullis*, qui *Milvum*, de *Leone*, qui *Gallum*, & de cæteris *Belluis*, quæ Leonem fugiunt, est ratiocinandum. Quia ea est Cerebri ac plexus fibrarum in illis Animalibus, in quem fit talis impressio, ut talem affectionem inducat. Quod vero talis dispositio, ac temperies in Bestiis reperiatur, sat indicat erumpens è *Cameli* corpore halitus, quo *Equus* adeo percellitur, ut pugnae inhabilis evadat. *Equi odor*, quo *Elephas* in furorem agitur. Radicis *Valeriana* effluvium, quo feles commoventur, & corde exhilarato, ad cursum, ad tripudium excitantur. Quippe talis affectio, non per se ipsam grata est, aut ingrata; sed ex eo, quod talis sit organorum conformatio, ac fibrarum plexus, qui in his Animantibus reperitur. Nec alia forte ratione, *Gallus* ante lucem experscitur, diemque venientem cantu nuntiat,

quam quia Sol, noctis mediæ circulum prætergressus, & auroræ imminens, frigidam noctis auram sua adventu propellit, cujus frigore Gallus excitatus, ita commovetur, ut cantum edat, & mortales ad curas laboresque revocet. Hinc Lucretius explicans, quemadmodum Leo Galli aspectu & auditu terretur, ita loquitur :

*Quin etiam gallum noctem explodentibus alis
Auroram clara consuetum voce vocare,
Neve queunt rapidi contra constare Leones.
Inque tueri ; ita continuò meminere fugai.
Nimirum quia sunt Gallorum in corpore quædam
Semina, quæ cum sunt oculis immissa Leonum,
Pupillas interfodiunt, acremque dolorem
Præbent, ut nequeant contra durare feroces ;
Cum tamen hæc nostras acies nil ladere possint,
Aut quia non penetrant, aut quod penetrantibus illis
Exitus ex oculis liber datur in remeando,
Ladere ne possint ex ulla lumina parte.*

86.

*Quomodo ad generationem bestiarum im-
pelluntur*

Non majori difficultate, secundi generis motus explicantur ; nam quod Bestiæ ad generationem, propagationemque, statis temporibus incitentur, ex mutatione in illarum corporibus facta provenit, qua fibræ fibrarumque plexus ita disponuntur, ut ex illa affectio quædam, in illis præsertim organis, quæ generationi famulantur, derivetur, quæ ad prædictos motus determinet. Est enim libido, quædam phantasiæ Animalis dispositio, ex partium genitalium motu profecta, dū illa scilicet, à spiritibus

bus fervidis titillantur, & ad coitum impellunt. Sic ubi *Canicatella* catuliens offertur, illa odore suo, ita irrequietos in Canis Capite spiritus determinat, ut illi in partes propagationi idoneas, ad coitum perficiendum confluant. Unde *Tentigo* illa, quæ in plerisque maribus libidinem comitatur, à spiritibus animalibus fieri solet, dum in *fungosos* membri masculini nervos defluunt, & ne revertantur, à *prostatibus* fervido semine turgentibus, & fungosorum istorum nervorum spiracula cludentibus, impediuntur. Dum *fætificant* igitur Animalia, ea sunt dispositione, ut facile ad eos motus determinantur, quibus propagationi dent operam, & genus suum tueantur. Ut latius postea dicetur de Avibus.

Tertii generis motus, pari claritate explicari possunt; natura enim omnibus Animantibus benefica fuit, dum quodlibet eorum organis instruxit, eumque corporis habitum indidit, quorum opera eos motus ciere valent, quibus vitæ propriæ consulant, & ea prosequantur, quæ ad sui custodiam sunt necessaria. *Omni* Animantium generi, ut inquit *Latinus Orator*, à natura tributum est, ut se, vitam corpusque tueatur, declinetque ea, quæ nocitura videntur, omniaque, quæ sunt ad vitam necessaria, inquirat & paret. Quare mirum non est, si Bruta tanto studio suæ conservationi incumbunt, latibula exstruendo, cibum quærendo, rapiendo, recondendo, discernendo, & familia agendo, quibus vitam sustentent, & ab interitu

87.

Qui sit, ut Bestia sui curam habeat, & vitam suam conservet.

se protegant. Quia Belluæ ita sunt à natura compositæ, ut à cibis, à latibulis, &c. ad eos motus determinantur, quibus pasci solent, ac recondi. Quo fit, ut cibum convenientem, ab alio discernant, & res quasdam *fugiant*, alteras *prosequantur*. Nam ad morbos curandos, infirmitatemque restituendam, *Palumbus*, *Merula*, laurum adhibet, ad alvum purgandam: *Canis* gramin, *Gallina* parietariam: *Hirundo* chelidonia utitur contra oculi vitium: *Testudo* organo adversus venena: Ad quam sane electionem non nisi ab ipsa herbæ inspectione determinantur, propter diversam corporis temperiem, & varium fibrarum plexum. Quippe ex arboribus illis, aut herbis, *halitus* quidam emanant, qui cum sensorio ita affectio commensurantur, & non pari modo proportionantur, qui ex aliis profluunt. Ac proinde sicuti Animantia, dum fame premuntur, non ab omnibus cibis promiscuè alliciuntur: Ita dum morbo laborant, non eodem impetu, ad easdem herbas feruntur, sed ad eas dumtaxat, à quibus determinantur, & odore quodammodo attrahuntur. Nec alia ratio assignari potest, cur *Ciconia* rostro, & longiore collo, *clysteris* usum adhibeat, ad alvum humoribus gravem evacuandam: Nec quare *serpens*, sceniculi affricu, ægris oculis medeatur, nisi quia ventris, & oculorum affectio, ad hos motus determinat, allicit, ac impellit. Unde liquidò constat, quam Rationis prodigi sunt, qui eam Brutis Animantibus concedunt, & ad nescio quam Animam, in eis latentem recurrunt,

runt, ut eorum operibus principium assignent, quum in illis nulla deprehendatur mutatio; res uno semper, & eodem ritu perficiantur, & loci, temporis, ætatis varietas, nullam in eorum operibus diversitatem pariat. Quod ipsum in Homine, utpote Rationis particeps non contingit; siquidem innumeræ sunt humanarum actionum rationes, ac modi: nec omni Homini una actio, unaque propensio est, ut in Belluis, sed in singulis diversæ, & pro Animæ conditione alia alii: unde emergit tanta Hominum animis opinionum varietas, ut pauci idem sentiant, idem oderint, idem prosequantur. Verum de prima actionum Animalium classe, sat dictum est, ad alias examinandas properemus, in quibus, non *perceptionis* modo, sed quædam *judicii*, ac *rationis* simulachra deprehenduntur, quales sunt, *Dubitatio*, *Inventio*, & *determinatio*, &c.

Ambigi vix potest, quin Animalia interdum 88.
dubitare videantur, & veluti in æquilibrio ponantur. Videmus *Equum* duobus graminis fasciculis, aut duobus avenæ modiis apposis, unum seligere, relinquere alterum. Haud injucundum aliquando est, contemplari *Catam*, qui cibo, sed fervente nimium, injecto, incertus manet, num illum respuat, aut deglutiat: quippe illum levi pede attendens, summoque ore delibans, succussis auribus hæret, veluti animo volvens, quod horum præferat, esum nimirum, an abstinentiam; donec demum uno relicto, alterum eligit, constanterque prosequitur.

Explicatur, quomodo Animalia dubitant.

Hi & similes actus, qui aliquam in Brutis libertatem & indifferentiam arguere videntur, diversistantur motibus, qui in Cerebro fiunt, assignari debent. Objecta enim diversa diversos motus in Sensuum externorum organis producant, qui nervorum ope in Cerebrum delati, nonnullos alios motus excitant, quibus determinati spiritus *conarion* variè impellunt efficiuntque, ut in æquilibrio consistat, & non in unam magis quam in alteram partem inflectatur. Unde oritur, ut Bruta Animantia, veluti *indifferentia*, maneant, & ad cibum, aut capiendum, aut respuendum indeterminata videantur. Nam cum hi spiritus corpora sint, oppositos motus in *glandula* excitant, qui sibi adversantes, illam immotam detinent, nec patiuntur in partem unam declinare. Id non Belluis modo, sed Hominibus etiam nonnunquam contingit, qui à mente discefferunt, & sua absque consilio aggrediuntur. Meminit *Medina* infani cujusdam, qui duobus pomis propositis, inæquali distantia; non poterat ex se, in alterum involare, & cruciabatur appetendo, nec gustando, donec ab aliquo ad alterutrum eorum produceretur. Unde evidenter ostenditur, quam à *judicii* suspensione differat Brutorum hæsitatio; nam quando perceptione rem aliquam detegimus, quæ nos antea latebat, & de qua nondum aliquid judicaveramus, mens nostra, opera *Voluntatis*, hoc est, ejus facultatis, quam habet, seipsam movendi, ac determinandi, anceps manet, judiciumque suspendit, si ali-

quam

quam in ea obscuritatem deprehendit, postea deliberat, & simul ac clari aliquid in ea animadvertit, ei assensum præbet, eundemque rebus aliis denegat, quæ ipsi non eadem evidentia elucescunt. Cum vero Bestiæ *Voluntate* careant, & ab objectis corporeis dumtaxat determinentur, mirum non est, si verè non dubitent, nec aliquid iudicio eligant. Quia id non reflexio, sed certarum imaginum solummodo recursus efficit.

Astutia, quam plurima Animalium præ se ferunt, & *techna*, quas in suis actionibus adhibent, non pari facilitate explicari possunt: Quippe in iis tanta Rationis vis elucet, ut quibusdam videatur, ea Animantia cognitione duci, & *finis*, seu propositi intuitu agere. Sed quia *Vulpes* dolis astutiaque bestias superat, & à Scriptoribus in calliditatis exemplum ac solertiæ adducitur, iuvat quasdam ejus machinationes referre. Quippe iis probè explicatis, quo ritu reliquorum Animalium opera administrentur, commode apparebit. Narrat *Plinius*, *Vulpes* in *Thracia* ea esse indole instructas, ut nihil inconsulte aggrediantur; quippe amnes congelatos transiturae, non illicò se eis committunt, sed primùm levi pede incedentes auriculam apponunt, quo certius crassitudinem conjectent: quia ubi subterlabentis *aqua* murmur percipiunt, sistunt gradum, & nisi à tergo discrimen immineat, nusquam pedem promovent; nullo autem strepitu excepto, flumina lacusq; trajiciunt, & nullo dato pavoris indice, transmittuntur. Nam apud se

80.

Quatuor
dam Ben
fiarum
astutia
& dolus.

se hoc modo ratiocinari videntur; quod *strepit*, movetur, quod *movetur*, firmum non est, quod *firmum* non est, necessum est, diffluere, ac liquidum esse, quod autem *liquefcit*, retineri non potest, sed impelli ac cedere; igitur *trajici* flumen non debet. Alia de eodem Animante, ab eodem *Authore*, refertur subtilitas, qua prædam captat, & assequitur. Avium siquidem gregem, ubi volare conspexerit, in rubra argilla corpore volutato, ut cruentata appareat, spiritu compresso, exertaque lingua, mortem simulat; sed insidentes in corpore suo aviculas corripit, ac devorat. Si *Canes*, dum à Venatoribus *Vulpes* insectatur, nimium urgeant, comprehendique vereatur, eo dolo utitur: Caudam reddita *urina* profundit, eandemque hinc & inde excutendo, foetore *Canes* avertere nititur, & ab impendente injuria vindicare. Similem fraudem adhibet, ut *Taxos*, sive meles antris suis expellat: nam ubi egressos observat, eorum latibula excrementis conspurcat, foetoreque replet, ut alia extruere cogantur. Nec minor *Vulpium* vafricies elucet, dum se à *pulicibus*, si iis nimium vexentur, liberare volunt. Quippe fœni manipulo, aut molliore stipula assumpta, posteriore Corporis parte palatim demerguntur, ut fuga gelidæ pulices ad caput ascendant, quo etiam immerso, in fœni manipulum, aut stipulam infiliunt, qua abjecta, evadunt *Vulpes*, hospitibus post se relictis. Majorem iis omnibus astutiam de *Vulpe* refert Illustris *Digbaus*, quæ *Canibus* à tergo pressa, Vivarium ingressa est, ubi dentibus

bus se inter occisarum animantium cadavera suspendit, donec à Canibus locum illum prætereuntibus perderetur Idem de altera, *qua* simili necessitate urgente, genistam, quæ fortè imminabat speluncæ suæ in prærupto clivo positæ, & ad quam facilior per aliam viam aditus patebat, oreprehendens, se in illam injicere solebat, Canibus, qui festinè eam insectabantur, nec periculum suspicabantur, præcipiti per scopulos lapsu, sese interficientibus.

Ut harum operationum causa commodius 90.
detegi possit, *duo* præsertim ex supradictis supponenda sunt. *Primum* quod Appetitum sensitivum aliquis semper *Affectus* comitatur: fieri enim nequit, ut Animal quicquam aut appetat, aut aversetur, quin aliqua in ejus corpore perturbatio oriatur, quæ à sanguine, & spiritibus originem ducens, cordis vasa, ac ventriculos dilatat, aut constringit, atq; etiam alias corporis partes agitat. Quo fit, ut pro variâ spirituum receptione, quidam nervorum meatus, ad apertionem, vel clausuram vellicentur, ac proinde Animal, ad aliquid assequendum, vel fugiendum proclive efficitur. Hinc Belluæ, si fame premuntur, irrequietæ sunt, nullo in loco consistunt, & *nervo* sextæ conjugationis, in ventriculo inordinatius agitato, ad membrorum motus, alimento prosequendo idoneos impelluntur. *Secundum*, cum omnis corporis Animalis motus, ab objectorum exteriorum contactibus ciatur, fit, ut in cerebri ventriculis, quidam pori, spirituum animalium transcursu aperiantur.

Appetitus passio semper sequitur; & in motibus corporis, Animalium spirituum alteratio fit.

riantur, qui majorem facilitatam se denuò aperiendi retinent, quam ii, per quos spiritus nondum penetrarunt. Unde oritur, ut, si simile ei objectum, ad cujus præsentiam distincti illi protractus delineati sunt, occurrat; spiritus animales in motum conciti, in vestigia prius facta incidant, & eodem, quo antea, ritu, corporis membra commoveant. Ut si *Taurus*, exempli causa, à fertili agro pluries removeatur, & in sterilem alium & infœcundum transmigret, stomacho fame incitato, pungenteque membranas acri humore, ventriculi meatus à spiritibus vellicantur, qui ad Cerebrum delati, & per orbitas antea efformatas decurrentes, *Tauro* cibum lautio-rem, agrosque olim fertiliores repræsentant, quique nervorum origines ingressi, in musculos transmigrant, cruribus movendis idoneos, & velut ad pristina pascua repetenda adigunt. Etenim licet *Memoria*, haud magna activitate polleat, & facilitas ista, istique protractus, qui in Cerebro excuduntur, & quos spiritus in fibris, per quas devecti sunt, relinquunt, parum præstare posse videantur; omnes tamen mirabiles illos effectus producant, qui in Brutis Animalibus deprehenduntur, quique maximam generis humani partem ad credendum alliciunt, illa cognitione uti, & à spirituali quodam latente principio dirigi. Imo si res intimè examinetur, Memoria quamplurimarum actionum causa effectrix est, quas inadvertenter, & citra intentionem elicimus, ut antea de *fidicinibus* insinuavi.

lis præmissis, ad *Vulpes* nostras revertamur. 91.
Vulpes igitur, quæ in *Thracia* annibus conge- Ut Vulpes
 latis se committere detrectant, ni prius de gla- in Thra-
 ciei soliditate ipsis constet, non id iudicio, sed cia flu-
memoria beneficio peragunt. Fieri enim potuit, men
 ut excepto alias sub eodem tegumento, strepi- transitua
 tu aquarum, in ipsas delaberentur, aliquod- ra autem
 que indè corporis incommodum paterentur. prius gla-
 Vel quod Brumali tempore, explorato aqua- ciei appen-
 rum cursu, frigore correptæ fuerint, cuius re- dunt.
 cordatio phantasiâ feriens, illas à natatu, ea
 tempestate deterret. Quod verò ad glaciem
aurem, crassitudinem exploraturæ admoveant,
 à timore provenit, quo excitati spiritus se in il-
 los musculos conferunt, qui capiti inclinando
 famulantur, & ad aurem glaciei applicandam
 determinant. Unde liquet Vulpem eo in ca-
 su, non *ratiocinio* uti, sed *affectû* impelli, non co-
 gnitione pollere, sed sola passione ad tales mo-
 tus agi.

Quod verò mortuas se insidiosè simulant, ut 92.
Aves incautas improvisò aggrediantur. Quod Quomo-
prone interdum capite, & anterioribus innixæ do Vulpes
 cruribus, sese attollunt, atque arboris stipitem, aliud se
 erecta subinde cauda feriunt, quo Gallinis ter- esse simula-
 rorem incutiant, aut illis alterius animalis spe- lant, ut
 cie, per arborem enitentis, imponant. Quod decipio-
 noctu, contexto tenebris corpore, radiantes ant.
 oculos in Gallinas dirigunt, ut eorum fulgore
 allectæ, perticas, quibus insident, deserant, & in
 terram devolvent, non tam eorum solertiæ,
 quam fortuito casui tribuendum est. Contin-

gere enim potuit, ut Vulpes itinere defessa, atque somnum capeffens, humi procumberet, ad quam instar *mortuæ* jacentem Gallinæ accedentes non pertimescerent, quod expergefacta animadvertens Vulpes, cum postea quietis statum simulavit, ut tutius in eas impetum faceret. Sicuti fecisse eam verisimile est, cujus *Petrarcha* meminit, quam cum Piscatores ad Urbem cum pisce deferrent, quod æstate, libenter noctu faciunt, quippè eam, ceu exanimem, calle medio transversam habuerant, & arreptam decoriaturi ex commodo, supra sarcinam projecerant: illa ubi se piscibus affatim implevit, subito prosiluit, mirantibusque illis, ac indignantibus effugit. Pari fortuna accidere potuit, ut dum Vulpes *Gallinas* in arbore confidentes invadere conaretur, & circa eam cursitaret, gradum Vestigans. quo superius eveheretur, præda in ejus fauces incidere, & citra ulteriorem laborem, quæsito potiretur. Unde iis rudimentis, feliciter succedentibus, verisimile est, ut vacuo postmodum stomacho, fameque stimulante, spiritus eos cerebri meatus repeterent, quos primum subierunt, dum humi cubans, aut arborem candere nixa, præda potita est. Quod artificium sæpius repetitum, in consuetudinem abiit, memoriæque firmiter infixum est. Quare cum cibum postea venatur, prædamque captat, easdem actionum series repetit, & prospera felicique antea machinatione utitur. Reverà multæ actiones, quæ in Animalibus satis admirandæ apparent, primo, *casu*

quo-

quodam, ab iis peragebantur, quæ deinceps crebra experientia repetitæ, in habitus, qui plurimum solertiæ & sagacitatis referre videntur, transeunt. Quemadmodum uni vulpeculæ sylvestri usu venisse verisimile est (prout nuntiatum audivisse testatur Clarissimus VVillifius) quæ, ut Gallum Indicum, super arboris ramo pernoctantem, in captum suum vocaret, hoc dolo, usa est; arboris truncum gyratione celeri circumiens, oculo intento, *Avem* continuo suspiciebat, quo facto, Gallus, ut Vulpem circumcitus facientem usque intuitu suo assequeretur, simul caput suum circumducebat, donec vertigine affectus, è sublimi in hostis fauces corrueret.

Nec alia ratione Vulpes, coniectis in Gallinas oculis, eas aut seducunt, aut attrahunt. Quippe casu fieri potuit, ut dum Vulpes edendi cupidine urgerentur, & præda sublimè confedenti inhiarent, oculos in Gallinas tamdiu dirigerent, donec vel scintillantibus oculis perstri-
ctæ, vel timore percussæ delaberentur, & insidiantibus in prædam cederent. Quippe Gallinæ, ingesto per continuum fulgorem metu, & jam se ab hostibus captas existimantes, stuporem contrahunt, & spiritibus in confusionem actis, non corporis munia, non functiones naturales amplius obire queunt. Quo fit, ut primum *vacillent*, mox, nervorum resolutione in cruribus facta, in terram semianimes *corruant*. Id etiam in aliis avibus cernitur, si feles tempore nocturno super arborum ramis quiescentes,

92.

*Ue Vulpes
gallinas
decipi-
unt, dicitur
An in eas
oculis.*

eas fixius intueantur: nam veluti timor Cerebro vertiginem incuteret, ex arboribus defluunt, & deorsum labuntur.

94.

Quomodo imminuentibus canibus Vulpes eandem urinam aspergit.

Quantum ad astutiam, qua Vulpes, in extremo posita periculo, urinam cauda exceptam spargit, canumque oculos offendere molitur: Dico id non ab ejus solertia, sed à pavore, quo corripitur, provenire. Omnibus enim Animalibus familiare est, ut ingruentis mali approximatione, timore quodammodo compuncta, *urina* nam profundat: Quia spiritus tunc perturbati, à solitis functionibus inhihentur, & laxatis in visceribus nervis, fit excrementorum *profluvium*. Cumque eodem metu caudas contrahant, easque intra crura recondant, necessum est urinam profundi, ac proinde illis excussis, Canum oculos urinæ acore lædi, & visum hebescere.

95.

Explicatur, quomodo Vulpes se à pulicibus eximit.

Nec in altiore causam astus ille refundendus est, quo Vulpes *pulicibus*, quarum moribus infestatur, se liberat. Nam quum tempore æstivo, in ejus corpore pruritus cum calore excite-
tur, cum amolitura, flumen ingreditur, ubi aliquam primo in pedibus refrigerationem experta aquas altius penetrat, cæteras paulatim corporis partes demergendo. Ne veronimis profundè dimittatur, & natandi molestiam, quæ novum ei calorem conciliaret, avertat, arborum ramos, aut stipulam molliorem, quæ forte occurrit; dentibus comprehendit, ad quam *pulices* frigore pullæ accedentes, eiq; adhærentes, & naufragium evasuræ, vacuum *hospitem* derelin-

linquunt. Vulpes interim, artubus jam refrigeratis, in sylvas regreditur, ab importuno suo comitatu libera; & pruritus, quo antea angebatur, prorsus expers. Unde voluptatis, ac utilitatis, quam in aquis recepit, postea memor, quotiescumque casus similis occurrit, eam ferriem aggreditur, similesque actiones elicit, donec frequenti usu in familiaritatem abeat, & reiterato opere consuetudo nascatur. Quia, postquam Memoriae vestigia primam rei imaginem super glandulam reduxerunt, spiritus per eisdem meatus revertentes, in eisdem musculos fluunt atque ita *Vulpis* corpus ad easdem denuo actiones edendum disponunt, quos occasione objecti edidit, quod eas prima vice excitavit. Adeo ut omnes artes, quas Animalia in variis occasionibus testantur, ejusmodi sint, ut ex observatione pendeant, qua quod prius successerit, aut non successerit, memorentur. Ut in *Thaletis Asino* facile ostendi potest, qui quum *sale* onustus flumen transiret, casu immersus, colliquato sale, se onere levatum sensit, quo successu factum est, ut quotiescumq; onere gravatus, amnem ingrederetur, corpus sponte dmitteret, & se onusque suum in aquis volutaret, nec ab hoc agendi modo retrahi potuit, donec salis loco, sacci *lana* referti dorso imponerentur, qui undarum haustu ponderosiores effecti, asininam hanc subtilitatem eluserunt, & in commodam magistro consuetudinem amoliti sunt.

Quod Vulpes dolo utatur, ut *Taxum*, seu

H 2

96.

me.

Ulpes

*Taxum
& Canem
suis de-
pellit,*

melim latibulo deturbet, urinam scilicet reddēdo, aut ventris excrementa emittendo, haud video, cur ad aliquod *judicium*, aut providentiam recurrendum sit; quandoquidem solo naturæ actu id perfici queat. Nam quid magis naturale omnibus Animantibus, quam locum conspurcare, si in eo per aliquod tempus immorentur, aut etiam mingere, si eo temporis intervallo necessitas urgeat. Quare dubitari nequit, quin *Vulpes*, melis foveam aliquando ingressa, tantum post se fœtorem relinquat, ut hujus horrore *Melis* aliud antrum aut quærat, aut exstruat.

97.

*An ra-
tionis in-
dicium
fuerit,
quod
Vulpes,
dum Ca-
nes inse-
queren-
tur, pen-
derit in-
ter cada-
vera ani-
malium.*

Arduum fateor, explicare est, quomodo citra cognitionem *Vulpes* illa, quæ ab insectantibus magno cum clamore *Canibus* tueretur (si, quod refertur, verum est) occisorum Animalium cadaveribus, quæ casu in vivario pende- bant, se interposuerit, nisi cum illustrissimo *Digbaio* dicamus, id fieri potuisse, ut *Vulpes* præ timore ac lassitudine latebras quærens, nec in tam plano telluris tractu, qualis esse solet viva- riorum, rubum, aut collem, vel omnino locum ullum, quo se reciperet, reperiens, præter pati- bulum quoddam, ex quo istiusmodi cadavera undique pende- bant, moveretur, (suggerente id phantasia) præsertim cum ulterius cursu tendere non valeret, se cadaveribus istis adungere, quæ alta illic quiete frui videbantur: Cumque id aliter fieri nequiret, quam si dentibus se sus- penderet, ea se positione aliquamdiu conti- nuit, donec Canes subtus currentes, prædæ suæ,

suæ, quam in aëre pendere minime suspicabantur, odorem amitterent, quem dum recuperare nituntur, ad proximam sylvam vel latebras festinando callidum illud Animal, per aliam viam furtivè se proripiens, ex iis angustiis evadit.

Vulpes illa, quæ apprehenso *ramo*, in latibulum suum, (ordinarium scilicet effugii locum, si in propinquo sit) se conjecit, canibus a tergo urgentibus, ita premebatur, ut ingredi quæ facilius in illud aditus patebat, minimè permitteretur. Verum hinc ingressu ipso totam phantasiam occupante, illinc præcipitio, quod sæpe viderat, in eandem è memoria evocato; fieri non potuit, quin, his duobus concurrentibus, admoneretur, magnam in ingressu cautelam adhibere. Et quidem tantum adituræ discrimen naturale erat, quidlibet, quo se in saltu juvare poterat, arripere. Cumque in præsentī nihil occurreret, præter genistæ ramum, qui latibulo forte imminebat, ore eundem apprehendit, nactaque inde opportunitatem, novo se saltu liberandi, in *latibulum* se conjecit. Canes interim, loco isti minimè assueti, magna, ut antea, vehementia & celeritate insequentes, ad præcipitii marginem ante accedunt, quam ullum illic præcipitium sensere; quo in periculo constituti, nec vel referre pedem, vel reprimere cursum *valentes*, lapsu opprimuntur. Neque vero necesse est, ut Vulpes, hoc illis *exitum* machinata, fraudulenter illos in semitam istam duxerit, sed effugium hoc, cum canibus ita premeretur, primo occurrens, memoria deinceps,

98.

De Vulpe, quæ genistæ ramum apprehendit, supra præcipitium pendens.

in qua reconditur suggerit, quoties ejusdem periculi declinandi necessitas redit.

99. Non hic prætereunda sunt *phenomena*, quibus nonnulli ratiocinandi facultatem Brutis Animantibus tribuunt, & non judicio tantum, sed & discursu pollere arbitrantur. Exempli causa, dum Canis in *Bivio* positus, viam, quam herus ivit, agnoscit: quippe ita secum discurrere videtur: *Herus* meus alteri viæ se non commisit, ut ex vestigiorum odore manifestum est, verum unam earum ingressus est: igitur hanc. Item dum Canis prædam insecutus, ad trivium pervenit: prima, ac secunda semita explorata, citra cunctationem, ne admoto quidem terræ naso, per tertiam pergit.

Verum harum duarum actionum causa, alia non est, quam hujus Animalis, ut quidam Poëta loquitur.

Venandi que sagax virtus, viresque sequendi.

Nam cum ex *Homine*, *cervo*, *dama*, *lepori*, odoratus halitus perenni effluvio avolet, & aliis corporibus adhæreat; Canis *heri*, aut *Leporis*, *Cervi*, &c. odorem vestigiis impressum explorat, & quum ab alterius corporis vestigiorum odore non moveatur, mirum non est, si illam dumtaxat viam, per quam *Herus*, aut *Lepus* ingressus est, ineat. Non obijciendum est, Canem absque olfactu id facere, & non nisi hoc ratiocinio inductum: *Lepus* per unam ex suis tribus viis elapsus est, sed non per hanc, neque per istam: igitur necessum est, ut per illam sit elapsus; scilicet itineri commisisse, quia hoc merè figmentum est,

est, & non *Canis*, sed *Hominis* est *rationatio*: quia *Canis*, non nisi percepto *odore*, in eam semitam fertur, ad quam sagacibus naribus ducitur. Quare ubi eam apprehendit, capite erecto, magno cum impetu, prædam insectatur; quia odorato halitu ejus nares implente, opus non est, ut amplius caput dimittat, illum excepturus. Unde patet, quam hic operandi motus à *discursu*, seu *ratione* dissentiat, quia *Canis*, non ab una cognitione, ad aliam progreditur, nec veritatem aliquam ignotam, ope alterius manifestæ detegit, talis enim potentia intellectus particeps est, propter *Perceptionem*, & *Voluntatis*, quia intellectum applicat ad inquisitionem, & considerationem sui objecti; quæ facultas videtur esse ad instar consecrarii mentis creatæ. *Bruta* autem *Animantia*, ut habet *Vives secund. de Anim.* non ab *A* exordiuntur, ut inde transeant ad *B*, ad cognoscendum *C*; nec ab *A* ad *B* tanquam conjunctum, & progrediens ab *A*: sed quia non placet *A*, quærunt aliud, inciduntque in *B*, veluti cum *Canis Herum* suum, & *feram* vestigat: odoratur enim hunc *Hominem*, vel aspicit, si odorem aspectumque *Heri* referat, acquiescit in eo, etiamsi non sit *Herus*; sin secus eo relicto confert se ad alium, inde ad alium, nullo nexu coherentem cum priore, quoad in eum incidat, quem quærît.

Inter *Brutorum* astutias referri solet *Torpedinis* vafri- 100.
cies, qua se in locis cœnosis recondit, Ut *Tor-*
ut piscibus, quibus nutritur, torporem injiciat, pedo alios
ut postmodum emergentes capiat, ac devoret. pisces cor-
ripit.

Imò tradunt *admirandorum* Scriptores, tangentis manum, immisso per virgam, aut longam etiam hastam, veneno ita ligare, ut Hominis etiam validissimi lacertos sopitos reddat, atque pedes ad currendum penitus ineptos. Non hujus rei causam assignare difficile erit, si perpendamus, huic, sicut & aliis frigidioris naturæ piscibus, insitum esse, ut limo se obducant, ad quem ubi accedunt *pisces*, statim emissio veneno, instar fumi penetrante, *torpore* corripuntur, ac si frigore contracti forent. Evibrantur siquidem à Torpedinis corpore spiritus, qui piscium substantiam penetrantes, aut manus, pedes, membræve alia eos tangentium subeuntes, spiritus ibi obvios hebetant, ac proinde corporis partes stupefacièdo, tremulas, & ad motum inhabiles reddunt. Id autem tam efficaciter, ut priusquam pisces capiantur, per rete, vel arundinem id efficiant. Pari ratione de *Sepia* differendum est, quæ cum à piscatore imminere sibi periculum cernit, *atrum* quendam humorem emittit, quo infecta & nigrum colorem aqua induente, piscatorum artes eludit, & securè elabitur. Verum neque dolus ille à discursu aliquo rationis proficiscitur, sed à nervorum laxatione, & metu orta, uti antea de *Vulpe* diximus, quæ ut timore perculsa urinam reddit: ita *Sepia* liquorem atramento similem eructat, ex cujus per aquas diffusionem prædictus effectus sequitur.

COI.
101.
Unde fit
ut Bestia

Neque plus Rationis arguit, quod Bestiæ Homines vereantur, & tanquam hostes passim fugi-

fugiant, eorum conspectum declinent; quia id tantum ex *damni* memoria, quod aliquando passæ sunt, oritur. Passionum enim causa, tam in Brutis animantibus, quam in nobis, aliud non est, quam agitatio, qua spiritus *Glandula* cient, in medio Cerebri constitutam, ex quo, rum agitationis inæqualitate, & partium, quibus constant, varietate, spiritus ipsi in musculos diversimode deducuntur, & diversas affectiones procreant. Unde quando spiritus, qui rei alicujus ideam constituunt, viam sibi semel delinearunt, & inter filamenta, ex quibus Cerebri substantia componitur, se intruserunt, non tanta vis requiritur, qua secunda vice adstringantur, ad istam viam repetendam, quanta opus fuit, ut illam sibi primò pararent. Quo fit, ut quando species similis super glandula effingetur, sola facilitas, quam per primam suam orbitam, pergendi inveniunt, suffectura, ut eam rursus ingrediantur. Quare mirum non est, si Bruta Animantia, ob *damna* illis, ab Hominibus illata, aut *terrores* incussos, Homines postmodum intueri non valeant, quin illico *damni* idea occurrat, & ad fugam concitentur. Ut in nonnullis videmus, qui pharmacum aliquod hauserunt magna cum aversione, eos non posse postea aliquid ejusdem saporis edere, aut bibere, quin eadem denuò aversione afficiantur: nec similiter de *aversione* posse cogitare, haberi solita circa pharmaca, quin idem ipsis in mentem redeat. Atq; genuinam hanc esse causam, cur Homine belluæ fugiant, ex eo confirmari potest,

H s

quod

*Homines
metuant,
eorumq;
aspectum
fugiant.*

quod multæ sunt *Regiones* detectæ, in novo præferti orbe, in quibus deprehensum est, neque *volucres*, neque *quadrupedes* eo modo metuere, *Hominis*que conspectum fugere, quemadmodum apud nos, qui eas inhumanius tractamus, & nihil aucupiis, venationibusque intractum esse patimur. Notum est etiamnum in *Cbio Insula*, aliisque locis, *perdices* non avolare, sed gregatim nutriri, & sese perinde in villas *Homines* inter recipere, non modo dissimili, quo oves ad nos divertunt, & in stabulis hospitantur.

102.

Verum difficultas adhuc solvenda manet, nam licet *Bestiæ* quæ ab *Hominibus* injuriam passæ sunt, corporeæ memoriæ beneficio illorum conspectum paveant, & iis detectis, statim fugam captent: Unde tamen oritur, quod juvenes, primo *Homines* metuant, & quod nondum videre, aversentur? Huic quoque difficultati, fiet satis, si in memoriam revocemus, quæ in *Instit. Phil.* & in *Historia Naturæ*, de ingentis quibusdam *Hominum* inclinationibus, & odiis dicta sunt, nimirum rei visæ imaginem in Cerebro depictam, spirituum animalium opera, ad commune sensorium deferri, & ab illo, sanguine, & spiritibus mediantibus ad uterum, & per venam umbilicalem ad ipsum fœtum, in quo visæ rei imago, ob mollitiem suam fortiter imprimitur, quæ licet initio parva sit, paulatim tamen ampliata fœtus substantia, augefcit: quemadmodum *litera*, in *peponibus* & *arboribus* scalpello exarata, dilatatur, & sensim per corticem,

tionem, incrementum accipit. Nam ambigi nequit, quin Animalia, damno ab Hominibus accepto, aut timore incusso, ejus speciem in fœtum transmittant, quandoquidem iis motibus; eorum temperamentum alteretur, totaque partium dispositio invertatur. Quæ postmodum proli per semen communicata, eandem in ipsa propensionem generant. Non raro enim usu venire videmus, ut *Mathematicorum* filii, figuris delineandis, proportionibusque contemplandis delectentur, imo adeas disciplinas addiscendas quodam naturæ instinctu ferantur, quod certe iis aliundè innasci non potest, quam quia ex parentum imaginatione, quæ seminis naturam immutans, totius quæ corporis temperiem invertens, fœtum inde proditurum iisdem propensionibus imbuat.

Tempus nunc flagitat, ut ad tertiam classem actionum transeamus, ad quas Animalia exercitio & disciplina attingunt, & quæ contemplantibus ad eam miræ videntur, ut illis cogitationem inesse, non levis suspicio ingerat. Accipiter ab instructore ad venandum informatur, cujus voces erectis auribus excipit: ubi ad prædam captandam dimissus est, vociferantibus Aucupibus, & ad pugnam validius urgendam hortantibus, sævit magis, & hostem cum ingenti ardore prosequitur. Canis meminit Inclytus vir *Justus Lipsius* centur. 1. epist. ad Belgas, generis Britannici, qui doctus fuit, ad macellum ire, pecuniam ferre, carnem referre. Id ita fiebat: Corbem vimineum collo appendebant,

103.
Nonnulla bestia
instru-
tionis
& do-
ctrina
capaces.

debant, pecunia in tot libras carnis imposita; ille recta, & nusquam resistens ferebat, in macello apud notum lanium se sistebat, carne accepta, redibat. Canes *Cubitores* vulgo *Chiens couchans*, quibus innatum in visas perdoes impetum facere, ita arte edocentur, ut ad earum conspectum immoti consistant, & non, nisi dato signo, assurgant & moveantur. *Arrianus* apud *Cardanum*, *Elephantem* se vidisse narrat, qui cum in auribus bina haberet cymbala, *promusci* de alternatim ea tangebatur, ad rhythmum, saltabatque pro rhythmî ratione, cæteris eum invitantibus, choreamque ducentibus.

104.
Causa
diversi-
tatis mo-
tuum in
anima-
libus.

Hæ Animalium operationes dilucidius explicabuntur, si supponatur, Brutorum indolem a diverso fibrarum plexu ac humorum ratione proficisci: Quo fit, ut quædam ad hunc passionis motum, quædam ad illum propensiora sint. Ad quod etiam non parum confert, *inequalis* in ipsis spirituum commotio. Nam cum quædam ex illis partibus, quibus spiritus constant, crassiores aliis sint & concitatiores, transeunt ulterius linea recta in cavitates Cerebri, & sic deducuntur in alios musculos, in quos non deducerentur, si minori vi pollerent.

105.
Ut acci-
piter in-
struitur
ad præ-
dam ca-
piendam

Accipiter igitur, natura vorax, & ad prædam insectandam genitus, ad eam ad nos referendam haud egrè edocetur, si ejus indolem sequamur, & ingenitæ ejus inclinationi nos accomodemus. Quippe totum illud negotium, ex eo pendet, ut somnus primum ab *Accipitre* pellatur, continuoque manuum contractu, ita *cicur*

cva.

evadat, ut non nisi eis insidens cibum sumat; ea per dies aliquot familiaritate comparata, assuefit escam ad modicum spatium projectam quærere; deinde *columbam* oculis captam, per aërem demissam venari: quam si comprehenderit, ea ex unguibus erepta, alia ei carnis portio injicitur, quam devoret, veluti in laboris mercedem datam. Quo exercitio aliquoties repetito, *Accipiter* in quascumque Aves sævire assuefit, & Captas Domino relinquere, exigua ipse mercede contentus. Unde patet, totum illud opus in hoc potissimum consistere, ut *Accipiter*, quodei insitum est, *Arti* se accommodet, & eam pascendi normam, quam ipsi natura præscripsit, pro nostro arbitratu exsequatur. In quo *Accipitris* obsequio, nihil prorsus *Rationis*prehenditur, sed sola instructoris industria elucet,

Pari cura & arte Canes edocentur litteras, aut res alias, ad certum locum ferre. Quemadmodum de Cane *Bruxellensi* narrat *Lipsius*, qui indubie ad id efficiendum assuefactione instructus est. Dubium enim non est, quin *Herus*, aut famulus, *Canem* primum ad macellum commitatus, in laboris præmium, cibum porrexerit, mox corbe vimineo, collo ejus appenso, ad eundem locum redierit, repetita quoque mercede; cui ministerio ita *Canis* assuevit, ut quoties corbis collo apponeretur, ultro macellum peteret, & onere recepto, domum reverteretur. Nemo autem est, ut opinor, qui hanc actionem *judicio*, ac *Rationi* acceptum referet, sed assuefactioni

106.

*Qua arte
instru-
tus est
Canis
Bruxellis
ad macellum
petendum.*

factioni potius, & consuetudini, longo usu comparatæ. Quod ex eventu facile convinci potest; nam si eveniebat, ut idem *Lipsius* animadvertit, ut in via Canes alii, odore moti, aspirarent, & accederent, quasi crepturi: tum ille corbem propugnare, fugare, & si copia, aut robore vinceretur, unâ irruere, & partem prædæ capere. Quod evidenter ostenditur, Corbis ad Herum devchendi imaginem in Cerebro effici m, ab alia validiore, nimirum in vafores repellendi, fuisse perturbatam; hanc vero posteriorem imaginem altera ordine sequebatur, carnem nempe devorandi, pro qua conservanda certamen inierat. Qua postmodum, spiritus in musculos, qui movendo corpori inserviunt, deducente, ad illo objecta conformis elicebatur, quæ id temporis in Cerebro delineabatur; & hæc alia esse non potuit, quam carnis esus, qui ut sibi conveniens, sibi que proficius repræsentabatur. Nec multum dissimili à supradicta arte instructus fuit *Canis* ille, qui narrante Plutarcho, varia argumenta, & personas in scena repræsentabat, ut nemo histrio doctius, aptiusque: atque inter alia, Hominis veneno, in specie, tollendi panem sumebat, sive offam, sapore temperatam (fingebatur enim venenum esse) ac repente ad simulabat temere, lapsare, gravedine tentari. Denique cadebat, ac porrectis membris, in mortuum jacebat: tractus, sublatus, elatus, ut argumentum poscebat. Dein cum tempestivum esset, ipso sermonis articulo, primum, quasi ex somno ad se reverti, leviter caput, & membra

bra movere, oculos aperire & circumferre; tum denique surgere, & latus gestiensque ad illum ire, & se exhibere, cui debebat.

Quod verò quædam Animalia contra *instinctum* proprium agere edoceantur, & id omit-
tant, ad quod quadam naturæ vi impelli videntur, non ipsa ratione aliqua imbuta esse demonstrat: Cum videamus in *Hominibus* varios fibrarum aut spirituum motus, qui menti certa objecta referunt, vel quosdam affectus excitant, longo usu, aut nonnunquam etiam ex accidenti, alios & alios motus excitare. Quia etsi motus, ut præclare more suo *Cartesius*, tractat de *passionibus*, loquitur, tam glandis, quam spirituum, & Cerebri, qui repræsentant Animæ certa quædam objecta, sint naturaliter juncti, cum iis, qui excitant in illa quasdam *passiones*, possunt tamen per *habitum* inde separari, & jungi aliis valde differentibus; imo hic habitus potest acquiri per unicam actionem, nec longum usum postulat. Sic cum reperitur ex inopinato, res quædam valde *sordida* in cibo, qui magno cum appetu comedebatur, inopinatus ille casus ita potest mutare dispositionem Cerebri, ut postea videri talis cibus nequeat, nisi cum horrore, cum antea comederetur cum delectatione. Quod in Bestiis observatur: nam etsi ratione & omni cogitatione careant, omnes tamen motus spirituum & glandis, qui excitant in nobis *passiones*, in illis quoque sunt, & interserviunt conservandis & confirmandis, non ut, in nobis, affectibus, sed motibus nervorum,

107.

Quid Cartesius edoceatur ad perdiscibundum.

301

302

303

304

305

306

307

308

309

310

311

312

313

314

315

316

317

rum & musculorum, qui eos comitari solent. Sic cum *Canis* videt *perdicem*, naturaliter fertur, ut in eam incurrat, & cum audit *sclopetum* disploti, ille strepitus naturaliter eum ad fugam excitat: attamen ordinariè ita instituuntur Canes venatici, ut visa perdice subsistant, & ad displotionis strepitum, quem postea audiunt, ad eam currant. Ad quod faciendum, non *judicio*, ut dixi, adducuntur, sed verberum *metu*, aut quadam institutione, quibus spirituum & nervorum motus, cum certis objectorum impressionibus, à natura conjuncti, prorsus divelluntur, & in alias transferunt.

108.
Ut doce-
tur Ele-
phantus
cymbala
pulsare.

Quod vero *Elephas* appensa auribus cymbala pulsaret, mirandi locus non est, cum ad id faciendum, levi etiam industria & institutione adigi potuerit. Est enim hoc Animal capaci ac calido præditum cerebro, ac proinde facile, quæ ipsi proponuntur, imitatur. Accedit etiam, quod promptam & expeditam proboscidem habeat, qua cymbala ita alternatim tangere potuit, ut rudem quandam, si ita loqui fas est, *harmoniam* procrearet, qua cæteri, qui aderant, ad saltationem, secundum præscriptas ipsis antea leges, invitabantur.

109.
Causa
horum
operum
in Brutiis,
est sola
memo-
ria. &
partium
corporis
dispositio.

Ex paucis iis exemplis plane innotescit, non *cognitionem* ad ea opera, quæ in Animantibus Brutis spectamus, requiri, sed *memoriam*, membrorum corporis habilitatem, & consuetudinem sufficere. Aut si illa quis Rationis ac intelligentiæ opera nuncupet; sunt equidem, sed non Animalium Rationis, sed eorum, qui Bruta insti-

instituerunt ac docuerunt. Si quis velit Bestias ab exemplo, & aliorum ejusdem speciei imitatione, institutioneque actiones quasdam doceri, iis respondet *Vives* loco supra citato : Docent, inquit, Bruta sobolem suam, ut citius faciant, quod per se nihilominus facerent ; ut *avis* pullum volare, *felis* venari mures, ut quam citissime videant eos sui similes, hoc est, in sua specie perfectos ; nos vero docemus illa, ut, quod vel nunquam facerent vel aliter, faciant, uti nos volumus ; neque aliud est nostra in eis doctrina, quam assuefactio, ad nihil fere aliud, quam ad corporale exercendum aliquod, ut *loqui*, *currere*, aut modo aliquo corpus, seu corporis partem aliquam movere.

Quantum ad sermonem spectat, quo Animalia sese alloquuntur, & quid cogitent, molianturque, aperire videntur, is maxime in *Galilina* elucet, quæ pro lubitu variat, & quibus pellitur, affectus, diversis vocibus manifestat. Nam si pullos evocet, *Corvi* sonum effingit, si imminet *Milvus*, vocem *protrahit*, & aliquatenus elevat ; si comprehendatur, veluti timorem suum testata, *ingemiscit* & eam cum singultu repetit, &c. Hinc æstimavit *Porphyrius*, Bestias sermonem inter se miscere, atque earum voces *Thaletem*, *Melampum*, *Tiresiam*, & *Apollonium Thyanæum* intellexisse, quemadmodum de *Helene* narrat *Virgilius*, tertio *Æneid*,

110.

*Quibusdam
exemplis
ostenditur
Bestias sese
alloqui, &
humanum
sermonem
intelligere ;*

- - - *qui sidera sentis,*

Et volucrum linguas. - - -

Plittacus è Palatio *Henrici Octavi Anglorum*
I. Regis,

Regis, in præterlabentem fluvium, *Tameſim*, forte delapsus, exclamare cœpit, *cymbam, cymbam, vel pro viginti libris*: cumque à nauta exceptus, & plumis adhuc madentibus, ad Regem delatus esse, nautæ promissam mercedem exigenti, reposuit *Psittacus, Tet the Zogue habe a shilling* / hoc est, detur huic nebuloni solidus. Pica Venatoris vocem interdum exacte imitatur, ut canibus imponat, eosque ad se, dum Herum esse credunt, simili sono attrahat. Idem de *Hyenâ* refert *Plinius*, qui sermonem humanum inter pastorum stabula simulat, nomenque alicujus addiscit, quem noctu foras vocatum invadit, & lacerat. *Equi, Canes, Cercopitheci*, humanum sermonem probe intelligunt, præcepta capessunt, & exequuntur. Exemplum hujus in *Cane Lovanii* adfert. *Justus Lipsius*, qui postquã audiisset, quo perferendæ essent epistolæ, eas millo, sive collari insertas, cursim *Bruxellas* deferrebat, in notam ibi, certamque domum.

III.

*Uo gallina
Vocem suam
Variat,*

Quod quædam Animantia voces attemperant, & sonos varios quodammodo pro arbitrio edere videantur, non id à Ratione proficisci existimandum est, quasi in ipsis mens quædam lateret, à qua eorum sonitus dirigerentur: sed à *passionibus* dumtaxat, quibus eo tempore agitantur. Quæ passiones variam in organis dispositionem inducentes efficiunt, ut spiritus diversimode per *tracheam*, sive asperam arteriam immittatur, ac proinde Bestiæ varias voces edant. Quod in nobis ipsis experimur, qui alio modo, amore incensi loquimur, & alio, dum odio, aut ira

ira percellimur. Et quamvis passionum nostrarum motus Cogitatio comitetur, (quia nimirum cogitandi facultate præditi sumus) clarissimum tamen est, illo ab ea non pendere, quandoquidem invitis nobis sapenumero exoriuntur: ac proinde Brutis inesse possunt; imo & vehementiores, quam in Homi nibus; neque tamen concludere licet, illa cogitare. Diversa est igitur in Gallina *pipatio*, quia alia passione tangitur, dum in *escam* incidit, alia, dum *Milvum* conspicit, alia, dum *capitur*, alia, dum *Pullos* deducit, alia, dum *tubat*, &c. Unde eos non satis vanitatis insimulare possumus, qui se olim Bel-luarum linguas intellexisse jactarunt, & quid meditarentur, aut agerent, ex eorum sermone cognovisse.

Psittaci voces quidem articulatas formare discunt, & multa verba per consuetudinem elo-qui: non ob id propterea proprie loqui dicendi sunt. Ad locutionem enim duo potissimum re-quiruntur, organi corporei motus, & mentis per-ceptio. Nam sicuti tres in sentiendo gradus, ut supra monui, distinguuntur; *motus organi corpo-ri*. Mentis Cogitatio, & voluntatis determina-tio ad judicandum: ita in Loquendo, *Primus* gradus est mentis perceptio. *Secundus* judicium ac voluntas alteri, quod concipimus, deregendi. *Tertius* organi corporei motus. Est quidem in Animantibus quibusdam *Tertius* loquendi gra-dus, nequaquam verò primus, aut secundus. Quia quum Bestiæ mente careant, non verbis illis, quæ proferunt, internos suos conceptus a-

112.

*Psittacus non proprie lo-
quuntur.*

perire intendunt, sed ea solum enuntiant, quæ ab Hominibus longo labore didicere, & quorum significatio illos penitus fugit. Quod si Aves quædam ita instructæ sunt, ut rebus aliquibus sua nomina imponant, & promptè ad interrogata respondeant, id earum *memoria* tribuendum est, non intellectui aut rationi: ut in Psittaco illo, ex palatio Angliæ Regis in profluentem fluvium delapso, videre licet, qui *cymbam* evocavit. Quia dubium non est, quin illas voces pronuntiare antea didicerit; quo factum est, ut eorum speciebus creberrima repetitione cerebro impressis, spiritus & organa ad similes sonos edendos determinata fuerint. Sicut in Pica illa, quæ conspectæ, advenientique Dominæ Xaipe dicere solebat, quia hic sonus seu vox tantum affectum comitabatur, *spem* nempe, quam de esca conceperat: quia hoc prolato semper assueverat aliquid delicatioris escæ donari. Pari ratione, ea omnia, quæ docentur *Canes, Equi, & Simia*, aliud non sunt, quam illorum spei, metus, aut latitiæ motus; ita ut ad hæc facienda cogitatione neutiquam indigeant.

113.

Quomodo
Hyana hu-
manas vo-
ces effingit,
ut pastores
devoceat.

Quod vero *Pica, Hyana, &* similes Bestiæ voces humanas imitentur, in aliud refundi non potest, quam inplexum sentientem, organorumque earum dispositionem. Sunt enim illarum corpora, ita disposita, ut quando humanus sonus, aut accentus, earum aures ferit, id spiritus animales in musculos deducant, qui voci efformandæ famulantur. Et quod *Hyana*, voce ad humanam accedente, pastores evocet, ut

corri-

corripiat, ex eo oritur, quod inani stomacho, species Animalium, quibus se pascere solet, efficiat, ut *glans* sese inclinans in eam cerebri partem spiritus impellat, in qua vestigia sunt, quæ illorum animalium aspectus reliquit; & cum objecti imago in cerebrum non recurrat, nisi quum illud quoque, quod ipsum comitabatur; mirum non est, si *Hyana* Hominis vocem effingat, ac imitetur, quum magna organorum corporalium docilitate prædita sit, & audita quæq; prompte exprimere valeat.

Si *Equi*, *Canes*, *Cercopitheci*, ad certa quædam verba, aut signa, nobis obediunt, imperataque exequuntur, non propterea æquum est, ut ratione & intellectu donentur, quia experimur, quod si ipsis alia quædam signa, in re etiam faciliori faciamus, sed quæ non ita ad insitam propensionem accedant, non iussa capeffere. Exempli causa, si imperemus, ut *Canis* strophium requirat, quod a mense in *Horto*, *Conclavi*, aut certo alio loco amisimus: quemadmodum eum jubemus, ut *Baculum* in stagnum, jam jam projectum quæsitum eat; non ad hortum aut conclave, in quo ipsi insinuatur, amissum esse strophium, pergit, sed ad stagnum, baculum quæsiturus. Ex quo manifeste constat, Canem non id, quod ipsi mandatur, facere, quia verba, aut signa apprehendit; sed quia tota ipsius corporis machina, ita labore, repetitisque instructionibus, eam nacta est dispositionem, ut quamprimum tale illi sit signum: animales spiritus statim in nervos & musculos devehantur, qui illum ad

114.
Qui sit, ut
canes, equi
&c. nostris
verbis ob-
temperant,
& iussa exequantur.

hoc, aut illud agendum determinant. Atque ita mirum non est, si Canis Lovanii, litteras millo insertas, illico *Bruxellas* peteret, certas ædes adiret, & inde ad Herum recta reverteretur. Cum omnia, quæ à *Bestiis* fieri videmus, & quæ etiam admirationem nostram excitant, suarum passionum & motuum effectus sunt, quibus eas, longo exercitio, labore ac usu, quem in instruendis impendimus, docemus, ut alligamus.

115.
Actiones
quædam
Animalium,
quibus
Hominum
solertiam
superare
videntur.

Nunc explicandæ supersunt Brutorum actiones, quæ quintam classem constituunt, hæc nimirum, quibus Animalia tantam solertiam testantur, ut etiam rationem, qua illis Homines discrepant, supergredi videantur. Imprimis est ordinarius ille processus, quo Aves nidos suos exstruunt. Nam ubi *Hirundines*, exempli causa, illam mutationem sentiunt, quam propagationis cupido, & ardor inducit, nidum hoc pacto moliantur: solidioribus primum festucis seu fundamento jactis, molliores postmodum adjiciunt: *Lutum* verò, quo cæmento ad fabricandum utuntur, & tanquam glutino nidum illinunt, ubi deesse percipiunt, ad stagnum vicinum advolantes, alarum extremitate, sic aquas stringunt, ut liquore humescant quidem, non autem graventur: Deinde pulvere his concepto, aspera illinunt, hiantia glutinant, & operis formam corpori suo in orbem actò accommodant, ut scilicet ovis incubare commodè possint, ac sese volvere, ut omnibus æqualem caloris vim impertiant. Mox nido paleis, musce, ac plumis

plumis substrato ova pariunt, iis incubant, pullos excludunt, ac pascunt. Aliud *providentia* in Animalibus argumentum est, quod, hyeme imminente, in alienas *regiones* transmigrent, ut saluti suæ consulant, & locum commodiorem sibi parent. Cujusmodi sunt *Grues*, quæ quotannis, verno tempore, ab Austro in Boream, advolant. & Autumno, ex Borea in Astrum revolant. *Tertium* est, quod nonnulla Animalia futura præfagiant, & quæ in aëre imminet, certa cognitione prænuntiant: ut *Ardea* futuram pluviam indicat, dum altissime volat, & supra nubes præter morem effertur. *Milvus* contra, serenitatem portendit, dum altissimam aëris regionem petit, ibique ad vesperam usque hæret. Idem de aliis Animalibus experimur, exempli causa, in *Fele*, *Talpa*, *Tauro*, *Aricte*, *Delphino*, *Anate*, *Gallo*, & similibus, quæ aut voce, aut cantu, aut saltu varias tempestates præfagiunt.

Quod *Aves* certa anni tempestate nidificent, 116.
 ovis postmodum infideant, pullos excludant, *Quo impetu*
 alant, defendant, tegant, &c. à sola corporum *ferantur*
 eorum temperamenti mutatione oritur, qua fibræ *Aves in ni-*
 fibrarumque plexus, in iis præsertim organis, *dis extruen-*
 quæ propagationi inserviunt, ita disponuntur, *dis, &c.*
 ut affectio illa facile inde derivetur, quæ ad nidum extruendum, pullis incubandum, eosque jam exclusos pascendum, &c. determinat. Nam ut cum Clarissimo Digbæo dicam, neminem iturum inficias existimo, quin appetitus coëundi in Avibus, non ex cupidine quadam, vel proposito foetum gignendi, sed ex *sanguinis*, spirituum-

tuumque temperamento, orto ex qualitate cibi, quo vescuntur, annique tempestate, proficiatur. Post coitum vero necesse est, crescere in ventre fœminæ ova, auctaque molestiam illi creare, adeoque quiescendi, seseque onere illo liberandi excitare. Atque quemadmodum Canes felesque, necessitate eos urgente, circumspicere solent, commodum quærentes locum, non solum ut fœtum excludant, verumetiam ut excrementis se exonerent. Ita Aves, quas ovorum pondus gravat, ineptasque volatui reddit, incipiunt multum se quieti dare, mollique ac tepenti loco delectari: hinc *palea*, *muscus*, aliâque id genus mollitie sua placent, quæ proinde ad nidos suos portant. Hanc vero actionem non ratione dirigi, vel ex modo, quo peragitur, manifestum est. Nam cum in paleam, aliudvè aliquid substernendis nidis accommodum incidunt, (ut sæpissime variis in avibus observavi) non illam statim ad *nidos* deferunt, sed primò arboris alicujus ramum, vel recti fastigium petunt, ibique rostro illam gestantes aliquantisper hinc inde saltitant; mox hoc relicto, ad alium locum volant, ubi simili modo se gerentes, tandem se ad nidos recipiunt; in quibus si confusè jacerent paleæ, acutioribus earundem extremitatibus pungerentur; versant eas igitur hinc inde, donec asperitas omnis auferatur. Quod nos effectum dumtaxat intuentes, ejusdemque productionem, cum *methodo*, qua ipsi in similium actionum exercitio uteremur, comparantes, prudentem forte, rationeque directam

rectam palarum dispositionem appellabimus: cum tamen, ut ab ipsis avibus procedit, nihil aliud sit, quam corporum, quæ sensum offendunt, crebra in omnem partem versatio, donec nullum amplius dolorem, molestiamvè inferant. Quod *nidum* oblinant, vehementi, qui tunc temporis in iis dominatur, calori adscribi potest. Hinc enim fit, ut in *luto, aqua, glareaque* versari eas delectet: (sine quibus Aves omnes cito ægrotarent, visuque ac deinde vita privarentur) porro lutum istud, quia refrigerat, rostris pedibusque ad nidos suos ferunt; idemque mox ubi durescere, adeoque molestum esse incipit, abstergunt, partes eo illitas loco, in quo quiescunt, affricantes, deinde evolant, novum, quo refrigerentur, petituræ. Vide *Histor. Natur. part. 8. art. 7. numer. 6.*

Quod Aves ab una *Regione* in aliam, dum hyems advenit, discedant, non idearum *prudentia*, aut providentiæ adscribendum est; sed earum indoli, qua facile impelluntur, à frigidiori loco, ad tepidiorem transmigrandum; in quem postea temperie succedente remeant; modo illæ *Regiones* haud multum à se invicem distitæ sint, & aditu faciles. Alioquin facile crediderim, volucres se in quædam latibula recipere, & instar *Glirium, Serpentum, Insectorum*, sopitas hyemem transigere. Quod certè multis experimentis ostendi potest. Hirundines in stagnis

117.

*Non prudentia dis-
cuntur aves
que ab una
regione in
aliam
transmi-
grans.*

gnis *Polonia* congelatis toto tempore brumali immotas, & quodammodo mortuas manere, quæ postmodum calore gelu solvente, & glacie in aquam resoluta, è stagnis emergunt, & volatum repetunt. Quod cum *Possevinus* ille, apud Gassendum, in *Moscoviam* legationis ergo profectus, non crederet, afferri iustum est, intra hypocaustum glaciei frustum, *Hirundines* agglomeratas continens, quæ, quum tepore loci glacies liquaretur, observatæ sunt sensim pedes, alas, caput, totum corpus movere, ac demum ita evolare, ut, peractis tamen paucis aliquot intra hypocaustum circuitibus, in terram mortuæ deciderint, tanquam præpoperam, nimisque insolitam aëris mutationem expertæ. Idem de pluribus aliis avibus suspicari licet; quum in *Germania*, in quercubus, & cavis aliis arboribus, sæpè, dum cæduntur, *Milvi*, & *Cuculi* deprehenduntur, se per hyemem occuluisse. Simile quid de *Ciconiis* sentiendum est, quum adhuc incompertum sit, quonam è loco veniant, & quo se referant. Unde *Plinius* lib. 1. cap. 23. *Nemo vidit agmen discedentium, cum discessurum appareat, nec venire, sed venisse cernimus; verumque nocturnis sit temporibus, & quamvis ultra, citrave pervolent, nunquam tamen advenisse usquam nisi nocte existimantur.* Ex quibus verbis satis apparet *Ciconias*, non è longinqua Regione, ad nos pervenire, neque in valde remotum à nobis locum transmigrare: sed stagna, lacusque ita subire, ut earum seu ingressus, seu exitus, à nobis non observetur.

Demum


Demum quod Bestiæ, nonnulla *præscire* videantur, non opus est, ut aliquid Divini accersamus, aut latentem in eis rationem agnoscamus, ad præfagia illa explicanda: quoniam ab illis solis mutationibus pendent, quæ in exterioribus objectis contingunt: quas ubi in corporibus suis exceperint Animalia, certis affectionibus tanguntur, quæ illa aut ad cantum, aut alarum concussum disponunt. Sunt enim semper in aëre quædam *serenitatis, tempestatum, ventorum præludia*, quæ quum Animantia præsentiant, fieri non potest, quin affectiones quædam in illis organis oriantur, quæ ad motus nominatos determinant. Nam Bruta, sensuum vivacitate, Homīnibus præcellunt, & quemadmodum, qui oculis orbantur, cæteris exactius audiunt, ita videtur, quod Animalia sensibus acutioribus polleant, quoniam mente carent, & omni perceptione destituuntur, Quippe ut non minus verè, quam eleganter Juvenalis Sat. XV.

118.

*Quomodo
quædam
animalia
futura indi-
care vide-
antur.*

- - - *Venerabile soli*

*Sortiti ingenium divinorumque capaces,
Atque exercendis capiendisque artibus apti,
Seorsum à cælesti demissum traximus arce,
Cujus egent Bruta, & terram spectantia mundi
Principio indulsit communis conditor illis
Tantum Animas, nobis animum quoque.*



Summa Rerum, quæ in hac Dissertatione continentur.

1. **Q**uid nonnullos Philosophos moveat, ad credendum, *Cognitionem Brutis inesse,* Pag. 7
2. *Aranearum industria suspicionem ingerit latentis Rationis.* 8
3. *Anima Brutorum, secundum quosdam Veteres, à nostris non distinguuntur.* 10
4. *Sunt secundum illos partes Animæ generalis mundi,* ibid.
5. *Admissa veterum opinione, Bruta ab Hominibus non discrepabunt.* 11
6. *Ordo dicendorum in prima hujus dissertationis parte.* 12
7. *Animæ definitio ab Aristotele data, futilis & vaga,* ibid.
8. *Imo obscura, & nihil distinctè explicans.* 14
9. *Duo tantum sunt rerum genera, materialis, & spiritualis.* 15
10. *Gassendi opinio de natura Animæ in Brutis.* ibid.
11. *Honoratus Fabrii censet animam Brutorum esse Ignem purum.* 17
12. *Cartesius æstimat animam Brutorum sanguinem esse.* ib.
13. *Animalium vita in continuo sanguinis motu consistit.* 18
14. *Quid Cognitionis, & in quo ejus natura consistat.* 19
15. *Omnis Cognitionis includit conscientiam.* 20
16. *Cognitio in quatuor species dividitur.* 21
17. *Ut res corporea ab immateriali & incorporea discrepat.* 22
18. *Anima Brutorum, qualiscumq; fingatur, Cogitationis est expers.* 23
19. *Materia passiva est & omni actionis incapax.* 24
20. *Aristotelis autoritas ad probandum, materiam inertem esse & otiosam.* 26
21. *Explicatur, quid Atomus in aëre moveantur, & arcus tensus reducatur.* 27
22. *Subtilis materia à primo motore suæ activitatis vim mutuatur.* 28
23. *Nulla*

Summa Rerum.

23. Nulla est gravitas corporibus intrinseca. 28
24. Sive partes in materia homogenea sive heterogenea sint,
movere se non possunt. 29
25. Ut materia expers est motus, ita & percept. est incapax. 30
26. Cogitatio non convenire potest extensioni, neque ut pars
essentialis, neque ut proprietas, aut modus. 31
27. Argumentum Regii contra prædicta. 32
28. Solvitur argumentum D. Regii. 33
29. D. Hobbes ratio, qua probat Cogitationem esse motum
corporeum. 34
30. Hobbes hypothesis examinatur, & falsitatis arguitur. 35
31. Non partes materia, non totum ex iis conflatum, capax est
cognitionis. 37 (bus fieri possit. 38
32. Quomodo Res sensilis secundum Gassendum, ex insensili-
33. Repugnat, Sensum ex rebus insensilibus oriri. 39
34. Gassendi exemplis non probatur, rem sensilem fieri posse
ex insensili. 40 (potest 41
35. Cogitatio nulla ratione Anima corporea competere
36. Potest Deus machinas creare, qua Brutorum actiones imi-
tentur. 42
37. Comparatio Canis vivi cum automatib. arte fabricatis. 43
38. Eorum error, qui ex externa membrorum forma in Bru-
tis judicant, ut nos cognitione uti. 46
39. Quid inter Homines & Bruta intercedit 47
40. Bruta nullis signis possunt Cogitationes suas detegere. 49
41. Duo sunt in Homine motuum principia, mechanicum &
spirituale. 51 (explicantur 52
42. Omnes motus in Animali, per principium mechanicum
43. Motus Cordis sine Anima auxilio peragitur. ibid.
44. Eadem operatione mechanica, sanguis per universum cor-
pus circulatur. 54
45. Unde oriatur Cordis & arteriarum pulsus. 55
46. A mo-

Summa Rerum.

46. A motu Cordis pendet Arteriarum pulsus. 56
47. Uti vita Animalis, ita & ciborum coctio a principio dumtaxat corporeo dependet. 57
48. Quando sanguificatio fiat in corpore Animalis. 58
49. Ope sanguinis per totum corpus decurrentis fit Animalis nutritio. 60
50. Respiratio mechanicè etiam perficitur. 61
51. Quid spiritus animales sint, & quibus partibus musculi constet. 64 (& ventrem distinxerunt. 65)
52. Quid musculus, & cur Veteres illum in caput, caudam, 66
53. Motus muscularis sit opera spirituum animalium. 66
54. Quomodo sit, ut uno musculo contracto, alius dilatetur aut e contra. 67 (vendos. 68)
55. Vis & efficacia spirituum Animalium ad musculos motus. 68
56. Unde tanta vis spiritibus, ut totum corpus movere queant. 69
57. Due videntur species, quæ analogiam habent ad organa motus Animalium. 70
58. Concluditur Animalia mera esse automata. 71
59. Unde oritur motuum diversitas in Animalibus, quum Anima careant. 72
60. In Homine multi etiam motus fiunt, non advertente, imo invita Anima. 73 (forent Paralytici. 75)
61. Si omnes Corporis motus à Voluntate penderent, nulli 74
62. Quam impropiè loquuntur Medici, qui Naturæ quasdam passiones attribuunt. Ibid.
63. Nec minus impropiè, qui Bruti sensum attribuunt. 77
64. Aristoteles censet solam mentem sentire. 78
65. Vulgaris objectio ad ostendendum Sensum Animalibus in- 79
66. Tres gradus in Sensu sunt distinguendi. 80. (esse. 79)
67. Quomodo Sensus Bruti conveniat. 81 (prione. 82)
68. Sensus non in motu organi corporei consistit, sed in percep- 83
69. Potest haberi motus corporeus absque Sensu. 83

70. Quam

Sunima Rerum.

70. <i>Quam ii falluntur, qui ex actionibus externis judicant, Bruta, ut nos sentire.</i>	84
71. <i>Secundū Platonem nullus Sensus nisi Anima competit.</i>	85
72. <i>Organa corporea nihil percipiunt.</i>	86
73. <i>Doctōris Willis opinio circa Brutorum Cognitionem.</i>	87
74. <i>Discutitur sententia D. Willis.</i>	88
75. <i>Motus locali idea, est quid distinctū ab idea Cognitionis.</i>	90
76. <i>Si Bruta cognoscerent, Homines perfectione excederent.</i>	ib.
77. <i>Reperitur in Animalibus Memoria sensitiva.</i>	91
78. <i>Carent autem Bruta Intellectiva memoria.</i>	93
79. <i>Ordo dicendorum in secūda parte hujus Dissertationis.</i>	ib.
80. <i>Nonnullorum Brutorum operationes, per instinctum naturalem producta.</i>	95 (ibid.
81. <i>Natura eadem in omnibus ejusdem speciei Animalibus.</i>	
82. <i>Quo pacto Apes tam concinne cellulas suas consciunt.</i>	97
83. <i>Totum Apum opus non a Ratione, sed a natura prodit.</i>	98
84. <i>Unde oritur actionum diversitas in Brutiis.</i>	99
85. <i>Qua causa odii, seu antipathie, in Bestiis.</i>	100
86. <i>Quomodo ad generationem Animalia impelluntur.</i>	102
87. <i>Qui sit, ut Bestiis sus curam habent, & vitam suam conservant.</i>	103
88. <i>Explicatur, quomodo Animalia dubitant.</i>	105
89. <i>Quarundam Bestiarum astutia, & dolus.</i>	107
90. <i>Appetitam passio semper sequitur, & in motibus corporis, animalium spirituum alteratio sit.</i>	109
91. <i>Ut Vulpes in Thracia, flumen congelatum transitur a, autem glaciei prius apponunt.</i>	111 (ibid.
92. <i>Quomodo Vulpes aliud se esse simulant, ut Aves decipiant.</i>	
93. <i>Ut Vulpes Gallinas fallunt, directis in eas oculis.</i>	113
94. <i>Ut Vulpes in sequentibus Canibus caudā urina aspergit.</i>	114
95. <i>Explicatur, quomodo Vulpes a pulicibus se eximit.</i>	ibid.
96. <i>Quomodo Vulpes Taxum e cavea depellit.</i>	115, 116.
	97. <i>An</i>

Summa Rerum.

97. *An Rationis indicium fuerit, quod Vulpes, dum insequerentur Canes, penderet inter cadavera.* 115. 116
98. *De Vulpe, que genistarum apprehendit, supra precipitium pendentem.* 117
99. *Quaedam phenomena, quibus Ratiocinatio Brutis conuenire probatur.* 118
100. *Ut Torpedo alios pisces corripiat.* 119
101. *Unde fit, ut Bestia Homines metuant eorumque aspectum fugiant.* 120. 121
102. *Cur iuvenes Belluae Homines auersentur in primo etiam illorum intuitu.* 122
103. *Nonnulla Bestia instructionis & doctrina capaces.* 123
104. *Causa diversitatis motuum in Animalibus.* 124
105. *Ut Accipiter instruitur ad predam captandum.* ibid.
106. *Qua arte instructus est Canis ad petendum macellum.* 125
107. *Qui Canis edocetur ad perdices incubandum.* 127
108. *Ut instruitur Elephas cymbala pulsare.* 128
109. *Causa horum operum in Brutis sola est memoria & partium corporis dispositio.* ibid.
110. *Quibusdam exemplis patet Bruta sese alloqui.* 129
111. *Ut Gallina vocem suam variat.* 130
112. *Psittaci non loquuntur proprie.* 131
113. *Quomodo Hyena Humanas voces effingit, ut decipiat.* 132
114. *Qui fit, ut Bestia nostris verbis obtemperent.* 133
115. *Actiones quadam Animalium, quibus Hominum solertiam superare videntur.* 134
116. *Quo impetu feruntur Aves in nidis exstruendis.* 135
117. *Non providentia ducuntur Aves, qua ab una regione in aliam transmigrant.* 137
118. *Quomodo quadam Animalia futura indicare videntur.* 139

F I N I S.

144
1655758